

**NATIONAL ASSEMBLY OF  
SEYCHELLES**

*Tuesday 13<sup>th</sup> July, 2021*

*The Assembly met at 09am*

*National Anthem*

*Moment of Reflection*

*Mr Speaker is the Chair*

**MR SPEAKER**

Bonzour tou Manm Onorab. Bonzour tou telespektater, oditer ki pe swiv nou. Byenveni pou avek nou ankòr enn fwa.

Bon, mon pou adres serten size konsernan deroulman Lasanble swivan serten lensidan semenn pase, ki'n en konsern pou mwan, e ki an parti in osi ganny leve par Onorab Gervais Henrie koman en *matter of privilege*.

Bann fe ki'n fer mwan donn latansyon sa bann size se:-

Mardi pase in annan plizyer lenstans kot Lasanble in ganny enteronpe. Kot mon santi mon Lotorite in ganny met an kestyon e kot mon krwar in annan mank respe pour Lasanble.

An rezilta bann enteripsyon, swivan en remark par Onorab Sandy Arissol, mon

ti demann Onorab Audrey Vidot e *Leader* Lopozisyon Onorab Sebastien Pillay kit lasal.

Ler in sorti dan lasal Onorab Vidot, ti klak laport deryer li. En aksyon ki mon krwar i en mank respe dan nenport sirkonstans. Apre ki zot in sorti dan lasal apre premye peryod Lasanble, tou bann Manm Lopozisyon pa'n retournen pou larestan lazournen e zot in absan pou *Sitting* Merkrede le 7 Zilyet.

Mon'n pas lo bann Lalwa e regilasyon ki aplikab lo bann size ki ganny leve, par sa bann lensidan. E mon le met sa bann regilasyon devan latansyon tou Manm e osi pour latansyon piblik ki swiv deroulman Lasanble.

Premye;- *Standing Orders* Lasanble, Lartik 9(1) i dir ki en Manm pa devret manke pou asiste Lasanble, amwen ki annan lotorizasyon Speaker pou li absan.

9(6) i dir ki en labsans tanporer swa koman protestasyon, oubyen pou lot rezon pa bezwen lotorizasyon Speaker.

Dezyenm, *National Assembly Member Emoluments Act*, seksyon 4, i dir ki si en Manm pa asiste Lasanble san ki in ganny lotorizasyon Speaker pou en *Sitting* oubyen plis, son

saler i devret ganny koupe par R1000 pou sa mwan, pou sak *Sitting*.

Si en Manm pa asiste Lasanble pou 2 *Sitting* konsekitiv, oubyen plis. Son saler i kapab ganny sispann ziska ler i retournen oubyen ziska ler Speaker i otorize.

Trwazyenm, *National Assembly Members Privileges Immunities and Powers Act*, seksyon 19 ki adres *contempt*, ouswa mepri pou Lasanble, i dir ki en dimoun i komet en lofans si i koz en *obstruction* oubyen en *disturbance* dan en *sitting* Lasanble.

Si i montre mank respe pou Speaker, si i fer okenn aksyon ki montre mank respe pou deroulman Lasanble oubyen en dimoun ki pe prezid en *Sitting* Lasanble.

Seksyon 28, i dir ki ler en Manm i komet en tel lofans, Lasanble i kapab pas en rezolisyon ki demann Speaker pou reprimann sa Manm, oubyen Lasanble li menm i kapab sispann sa Manm pou larestan sa *meeting* Lasanble, oubyen larestan sa sesyon Lasanble.

Saler e *allowance* pa ganny peye pou peryod ki en Manm in ganny sispann. Prezan mon le prezant mon

desizyon lo sa bann pwen, ki mon'n leve.

Enn, lo size enteripsyon, kriye, *disturbance* e mank respe:

Koman Speaker mon responsab pou tou deroulman Lasanble e sa i donn mwan lotorite pou aplik serten mezir.

Mon pa anvi pe kontinyelman met en Manm oubyen lezot Manm deor. Me mon pa kapab tolere ki Lasanble i ganny enteronpe konstaman.

Me mon'n fer remarke, se par mwan ki Lotorite final lo sa size. Lalwa i dir, ki sa bann ka mepri pou Lasanble i kapab ganny konsidere par Lasanble li menm, ki kapab pas en rezolisyon pou sispann Manm ki responsab, oubyen Lasanble i kapab demann Speaker pou reprimann sa Manm.

Mon pa oule ki nou ariv lo sa pwen, kot mon bezwen demann Lasanble pas en rezolisyon, akoz mon santi sa i pou ganny deside par en kote Lasanble ki annan en mazorite. Me si i neserer mon pou aplik sa regilasyon.

Dezyenm:

Lenteripsyon ki ti arive, pou mwan demann Onorab Pillay e Onorab Vidot sorti ti arive apre ki Onorab Sandy Arissol ti fer serten remark.

Dan Lasanble mon ti size ki sa bann parol, pa ti'n ganny adrese pou Onorab Vidot. E ki i ti zis enn sa bann *statement* politik ki Manm i fer souvan. Me mon'n al revwar rikord, sa moman Lasanble.

E mon aksepté ki i kapab ganny enterprete en lot fason. Parol Onorab Arissol i kapab ganny enterprete konmkwa i pe akiz Onorab Vidot, kontrerman avek lareg ki dir avek en Manm pa devret *impute improper motives* lo en lot Manm.

Alor pou rektifye sa, mon pe demann Onorab Arissol pou retir sa koneksyon dan son parol avek Onorab Vidot. E retir okenn akizasyon ki ti kapab annan dan son parol kont Onorab Vidot. Onorab Arissol.

### **HON SANDY ARISSOL**

Mersi Mr Speaker. Bonzour Mr Speaker. Premyerman bonzour tou Manm a lekout. Zabitan Bel Ombre ki pe ekoute, mon ti a kontan retir sa koneksyon Mr Speaker ki ou'n fer referans avek lo Onorab Vidot dan mon *statement* ki mon ti fer, ki ti fer zot kit lasal pou ale. Mersi bokou.

### **MR SPEAKER**

Mersi Onorab Arissol. Lo size Onorab Vidot klak laport letan i sorti, mon krwar sa i klerman

en mank respe pou Lasanble. E mon pe demann Onorab Vidot pou prezant son leskiz avek Lasanble pou sa. Onorab Vidot.

### **HON AUDREY VIDOT**

Mersi Mr Speaker. Bonzour tou dimoun ki a lekout. Mr Speaker mon apresye ki ou'n fer Onorab Arissol *apologize*. E mon osi mon ava demann leskiz pou ler mon'n sorti mon'n tap laport for avek Lasanble. Mersi.

### **MR SPEAKER**

Mersi Onorab Vidot.

Katriyenm: Lo size labsans bann Manm Lopozisyon dan Lasanble:

Mon konsidere i zot laba san Mardi le 7 Zilyet i kapab ganny pran koman en protestasyon ki pa ti bezwen lotorizasyon Speaker.

Me mon zize ki labsans Merkrede le 7 Zilyet, pa ti zistifyab. Alor mon krwar ki bann Manm i devret ganny sanksyonnen anba Lartik 4 *National Assembly Members Emolument Act* par koup lapey par R1000 pou sa mwan, amwen ki annan okenn fakter ki eskiz zot parey tel koman en sertifika medikal.

Etandonnen ki *Leader* Lopozisyon ti dir mwan, ki serten Manm ki ti pe al se zot akoz zot pa ti santi zot byen.

Mon ekspekte ki si i annan okenn faktor ki mon devret ganny konsidere, i a ganny prezante devan mwan. E mon esper sa avan mon donn mon desizyon final lo la. Mersi bokou. Wi Onorab *Leader* Lopoziyon.

### **HON SEBASTIEN PILLAY**

Mersi Mr Speaker e mersi bomaten pour ou *Ruling*.

Premyerman mon apresye ki serten size in ganny regarde. In fini ganny *deal* avek. Mon pa pou relev zot.

Mr Speaker mon ti a kontan met a ou latansyon ki, i enportan dan konsiderasyon ou *Ruling, as a matter of privilege* mon met devan ou, ki lo sa kote latab nou santi ki souvandfwa dan lamazorite ka kot nou, nou fer oubyen nou kree en lofans anver *Standing Orders*, nou, nou ganny demande pou fer, pou swa *apologize* ouswa nou Manm si i refize *apologize* i ganny demande pou kit lasal.

Ti enportan pour nou koman en *Caucus* lans en mesaz pou ou Mr Speaker, ki *whilst* nou respekte ou Lotorite nou egzize, e nou demande ki ou aplik sa lotorite dan en *fairness* ki Lasanble Nasyonal i demande.

Se tou ki nou ekspekte Mr Speaker. E lo mon kote Mr

Speaker mwan mon osi mon pare pou dir lefe ki ou'n *deal* ek sa sityasyon, pou *apologize*.

Si ou santi poudir mon'n kriye, oubyen mon'n enteronp Lasanble sete zisteman, akoz mon ti anvi lazistis pou mwan Manm, ki ti'n ganny akize pou en aksyon ki *Standing Orders* i fer kler, *imputation* pa devret ganny fer *towards* en Manm.

Prezan Mr Speaker si oule kontinyen baze lo bann largiman ki'n ganny avanse par lezot Manm, atraver bann *matter of privilege* ki'n ganny *raise* lo *floor*, apre ki ou menm ou Mr Speaker ou ti donn en *Ruling* ki si en Manm i annan en *matter of privilege*, i devret pe enform ou an ekrir avan i le *raise* son *matter of privilege*;-

Me ou les sa aksepte i ankor enn fwa montre Mr Speaker (mon pa pe mank respe pou ou), ki annan de pwa de mezir dan Lasanble Nasyonal.

So avek sa Mr Speaker, mon respekte ou *Ruling*. I annan dan nou *Assembly Members Emoluments Act* dan sa seksyon 4 i dir si Manm i annan son *leave of absence*, si i annan Manm lo sa kote latab ki annan son sertifika medikal, i a prezant son sertifika medikal.

Me dan lot kote, lo mon kote mon mentenir ki protestasyon dan Lasanble kan

nou kote pe ganny trete dan en fason ki mon santi i *unfair*, nou pou fer li, akoz nou krwar ki Lasanble Nasyonal i bezwen, i bezwen sa lenstitisyon ki montre pli o nivo lazistis, *fairness* e si oule i *encapsulate* nou moto.

Savedir 'Linite dan Diversite' pour nou servi en demokrasi modern parey sa *epitaph* lo laport i dir. Mersi Mr Speaker.

**MR SPEAKER**

Mersi Onorab Pillay.

**(APPLAUSE)**

**MR SPEAKER**

Mon a pran ou konsiderasyon. Onorab Georges.

**HON BERNARD GEORGES**

Mersi Mr Speaker. Bonzour Mr Speaker, bonzour tou bann Manm. Mr Speaker mon remerseye ou pou en *Ruling* byen balanse bomaten.

Me mon ti anvi eksprim mon latristes ki *Leader* Lopoziyon, olye sezi sa moman pou bouz devan, in prefere pou retourn deryer e ankor enn fwa, redwir lenpak ki ou *Ruling* ti a kapab annan lo nou tou. E sa i regretab.

E se pour sa rezon ki mon'n pran laparol ozordi. Mon

pa kontan fer li, me mon bezwen koriz en, en dir en keksoz ki Onorab *Leader* Lopoziyon in dir e sa se *matters of privilege*.

*Standing Order* 40 i fer kler ki si en *matter of privilege* i bezwen ganny *raise*, ou Mr Speaker ou bezwen ganny averti avan.

Amwen, (e sa en *proviso*), amwen ki sa *matter of privilege* i *arise* pandan en *Sitting* Lasanble e se egzaktaman sa ki ti arive ler Onorab Gervais Henrie ti *raise* son *matter of privilege* Mardi pase.

Alor nou bezwen, tout an respektan bann lareg, nou bezwen edik nou lekor ek nou piblik ki lo egzaktaman ki sa ki lareg i dir, e pa lo sa ki nou, nou ti a kontan tou bann lareg i dir. Mon remersi ou Mr Speaker.

**(APPLAUSE)**

**MR SPEAKER**

Mersi pou zot remark e mon a pran tou an konsiderasyon. Nou a avans lo nou *Order Paper*. Madanm Clerk mon ava apel ou pou Prezantasyon Dokiman.

**MADAM CLERK**

Mersi Mr Speaker. Bonzour Mr Speaker. Bonzour tou bann Manm e tou dimoun ki a lekout. Papye ki pe ganny prezante i: -

*The Annual Report for the Year Ended 31st December, 2020 for the Seychelles Civil Aviation Authority.* Mersi Mr Speaker.

**MR SPEAKER**

Mersi Madanm Clerk. Nou aprezan pare pou *move* lo bann kestyon. E nou ava apel delegasyon Minis pou *Private Notice Question*.

Mon oule zis rapel bann Manm, mon'n fer sirkile en pti *note* lo size kestyon. I pa mon lentansyon ditou, pou limit lakantite kestyon e bann Manm e bann pwen ki bann Manm i leve.

Me letan i primordyal, konsiderasyon letan i pas avan tou. Nou annan 7 Kestyon pou bomaten, e 6 pou apre midi. I en lazournen plen.

So zot a konpran mwan si mon bezwen limit lakantite kestyon siplemanter, kot i nesaser. Mersi mon demann zot konprenezon.

Bonzour e byenveni dan lasal *Designated Minister* Jean-Francois Ferrari, Minis pou Zafer Entern Mr Errol Fonseka e Mr Ted Barbe Komisyoner Lapolis.

E zot avek nou pou nou konsider *Private Notice Question Leader* Lopozisyon Onorab Pillay.

**HON SEBASTIEN PILLAY**

Mersi Mr Speaker e bonzour. Bonzour tou dimoun ki a lekout. Bonzour Minis Dezinyen e Minis Fonseka dan Lasanble. E byensir bonzour tou dimoun ki a leksteryer pe ekout nou.

Mr Speaker mon kestyon i anliny avek Lartik 63(3)(a) nou Konstitisyon ki fer par lefe ki si, lefe ki napa en Minis ki reprezant Kiltir, Prezidan i politikman responsab pou okenn Minister oubyen Departman ki Prezidan pa'n *assign* avek en Minis.

E mon kontan ki dan Lasanble ozordi, nou annan Minis Dezinyen e Minis Fonseka pou reponn sa kestyon. Mr Speaker mon kestyon i lir koumsa: -

In annan plizyer konsern eksprimen par bann artis e osi dimoun an zeneral, sirtou ler en group artis ki ti pe fer lavertisman pou zot nouvo prodiksyon dan Lari Bazar ti ganny anpese par Lapolis.

Me lo en lot kote bann video pe sirkile dan domenn piblik ki montre bann aktivite divertisman pe pran plas dan serten lotel.

Eski Lasanble Nasyonal i kapab ganny leksplikasyon lo sa bann size swivan: -

Akoz ki ziska la Lotorite responsab pou Kiltir pa ankor koz lo sa ki'n arive an relasyon avek bann artis ki'n ganny anpese zwe lanmizik dan Lari Bazar? E eski I annan en plan lo ki pou ganny fer pou ed sa bann artis?

Akoz ki bann artis lokal pa pe kapab fer zot bann aktivite, prenon kont ki avek sityasyon ekonomik, en kantite artis pe rankontre bokou difikilte pou zot kapab ganny en reveni, me lo en lot kote serten endividi e menm lotel pe ganny loportinite pou fer li?

Kestyon No.3

Eski Lalwa pe ganny aplike parey pou tou dimoun sirtou kot i konsern aktivite divertisman e menm rasanbleman? Mersi Mr Speaker.

### **MR SPEAKER**

Mersi Onorab Pillay. Minis Dezinyen mon a diriz bann kestyon pou ou e ou a diriz ou bann koleg.

### **THE DESIGNATED MINISTER** **MR JEAN-FRANCOIS** **FERRARI**

Mersi Mr Speaker. Bonzour tou Manm Onorab e tou piblik a lekout.

Mon ti a kontan reponn kestyon Onorab *Leader*

Lopozisyon e nou pou fer li an de parti avek ou permisyon Mr Speaker.

Mon ava met en lesplikasyon lo rol Departman Kiltir e answit Minis Fonseka i ava eksplik lentervansyon Lapolis dan sa lensidan.

E apre mon ava kapab partaz avek Lasanble bann mezir ki Ankour ki pe ganny diskite, ki'n ganny propoze pou ed en pe plis ankor bann artis e bann mizisyen dan sa moman difisil, sirtou bann ki pe bezwen vann serten zot bann *CD*.

Mr Speaker, sa kestyon *Leader* Lopozisyon i napa gran keksoz pou fer avek Departman Kiltir. Akoz Departman Kiltir li i pa *involve* dan bann aktivite komersyal.

E i pa, i napa okenn rezon pou li entervenir dan sa lensidan ki'n arive de trwa semenn pase Lari Bazar. Departman Kiltir i la pou ankouraz devlopman lakiltir dan tou son form.

E o moman kot, bann artis i antre dan en relasyon komersyal sa i sorti anba son responsabilite. E dan sa lensidan i kler ki ti en lensidan *public law and order*. E alors se pour sa ki Minis Fonseka i la ozordi.

Mr Speaker, Onorab *Leader* Lopozisyon i demande

akoz ki pa ankor koz lo sa ki'n arive;- Lotorite pa ankor koz lo sa ki'n arive an relasyon avek bann artis.

Mr Speaker Departman Kiltir parey mon'n dir in angaze avek bann diferan parti dan sa lensidan. E Departman Kiltir pa kapab pronons li pou tou keksoz. I annan bokou keksoz ki'n dan aktyalite dernyerman, ki pa'n ganny leve.

E parey mon'n tande zot in diskrit en pe lo la, parey bann zafer bonm pa'n ganny - personn pa'n lev en *PNQ* lo la.

So i annan plizyer kestyon ki pa - i annan plizyer kestyon ki pa totalman relevans sa moman. Alor mon ti a kontan ki Lasanble e *Leader* Lopozisyon i ganny son bann kestyon en pe pli, en pe pli byen kadre. E pour sa Lotorite ki pli konsernen.

Eski i annan plan ki pou ganny fer pou ed bann artis?

**HON SEBASTIEN PILLAY**

Mr Speaker mon annan en *point of order*.

(Off-Mic)

**MR SPEAKER**

En enstan. Wi Onorab Pillay ki *point of order*?

**HON SEBASTIEN PILLAY**

Mersi Mr Speaker. Mr Speaker anba nou *Standing Orders* mon pa kapab anmenn en kestyon lo en *matter* ki *subjudice*.

Si i keksoz i *subjudice* mon pa kapab anmenn en *PNQ* lo la. Sa size ki Onorab Minis devan Lasanble pe akiz mwan *for not bringing a PNQ about*, i en keksoz ki mon pa kapab.

So mon ti ava demann ou Mr Speaker, pou *remind* Minis ki si en keksoz i *subjudice*, e ki Onorab Georges i konn tre byen, mon pa kapab anmenn en *PNQ* lo la akoz baze lo etik i i en *live subject*, i en *live issue*. I kapab *jeopardize* envestigasyon.

So se pou sa rezon ki mon krwar menm ou koman Minis ou mansyonn sa dan Lasanble Nasyonal, ou pe komet en lofans *of contempt* pou Lasanble Nasyonal e son *Standing Order*.

**MR SPEAKER**

Ou pe al tro lwen Onorab Pillay. Ok mon'n tann ou.

**THE DESIGNATED MINISTER**  
**MR JEAN-FRANCOIS FERRARI**

Mersi Mr Speaker.

**MR SPEAKER**

Eskiz mwan. Mon bezwen admet en gran lerer. Mon pa ti pe tro swiv Onorab, mon pa ti

pe tro swiv *Designated Minister*, akoz Madanm Clerk in fek prezant mwan en bann papye.

*Designated Minister* si i annan kestasyon ki *subjudice* evite e kontinyen silvouple.

**THE DESIGNATED MINISTER**  
**MR JEAN-FRANCOIS**  
**FERRARI**

Vwala. Mersi non, non-me i bon nou eksplik nou lekor. E ki sa bann size i ganny klersi.

Alors Mr Speaker mon ti a kontan prezan pas laparol avek Minis Fonseka, ki ava eksplik byen ki'n arive sa zour. E bann zour ki'n swiv e ki bann travay ki Lapolis pe fer pou li ankadre sa aktivite, vann *CD* e fer promosyon pou lanmizik dan lavil. Mersi.

**MR SPEAKER**

Mersi Minis Dezinyen. Minis Fonseka ou annan laparol.

**MINISTER EROL FONSEKA**

Mersi Mr Speaker e bonzour Mr Speaker. Bonzour *Leader of Government Business*, *Leader* Lopozisyon e tou Manm Onorab. E tou dimoun ki a lekout.

Swivan serten konplent, fer par serten marsan ek endividi, spesifikman ki reste e fer biznes Lari Bazar, ki serten artis ki ti pe promouvwar zot *CD*

ek sanson ti a pe zwe lanmizik tre for.

Lapolis ti entervenir, e ganny en dyalog avek zot, avek sa bann artis pou fer zot ferm en pe zot lanmizik. E esey adres sa sityasyon. Reprezantan Lapolis ti osi donn en *interview* avek medya le 6 Zilyet lo sa size.

Lapolis pa ti anpes sa bann artis vann zot *CD*. Me plito demann zot pou aret zwe lanmizik for. A sa moman ti annan 3 artis ki ti o bor kanmarad, pe zwe zot sanson an servan sakenn en gro *speaker*.

Sa tapaz ti okazyonn bokou lannwi par bann dimoun dan sa landrwa e a sa moman. Lapolis pe osi fer resorti ki depi ki bann lord Lasante in vin an viger i kosyonn e osi donn *fixed penalty* plizyer letablisman lwazir.

E i annan menm bann ki'n ganny lord pou fermen par Lotorite Lasante Piblik, swivan rapor fer par Lapolis dan serten ka pou zot revwar zot Protokol ki an plas.

I annan ki'n ganny lord pou reouver osi. Bann ki pa ankor reouver e bann ki pa ankor reouver. Lapolis i tre serye lo sa size e Lalwa i aplik pou tou.

Zis pou azout en pti gin Zedi pase le 09 Zilyet Lapolis ti

zwenn avek bann Lotorite, konsernan, avek sa sityasyon e osi trwa dan sa bann artis ki'n ganny afekte pou en diskisyon.

E zot in ganny eksplike ki Lalwa i an plas, ki Lalwa ki an plas e ki Lalwa i dir lo sa size.

Lapolis ti swivan rankont dan laprouvasyon provizyonnel pou serten artis zwe zot lanmizik Sanmdi le 10 Zilyet anba serten kondisyon.

So zot ti ganny en laprouvasyon pou fer sa pou le 10 Zilyet ki ti lot Sanmdi. Sa bann kondisyon swivan ti lanmizik i ganny zwe lo en son ase normal ki pa koz lannwi personn.

Pou anmenn en sel Speaker pou tou artis ki pou prezan servi. Napa lakol, ouswa okenn keksoz ilegal ki ganny servi, pou napa mikro ouswa *loudhailers*. E zot pou bezwen respe tou lord lasante an plas.

Sa i *statement* ki lo sa size ki mon pe fer Mr Speaker. Mersi pou sa.

**MR SPEAKER**

Mersi e Minis Ferrari ou ti pou rebran laparol.

**THE DESIGNATED MINISTER**  
**MR JEAN-FRANCOIS**  
**FERRARI**

Wi. Mersi Mr Speaker e mersi Minis. Mr Speaker lo dezyenm

kestyon. Akoz ki bann artis lokal pa pe kapab fer zot aktivite?

Mon ti a kontan dir ki tou artis lokal, non selman i kapab fer zot aktivite, me zot ganny ankouraze pou zot fer zot aktivite. Tou dimoun,

**(APPLAUSE)**

**THE DESIGNATED MINISTER**  
**MR JEAN-FRANCOIS**  
**FERRARI**

... tou dimoun dan sa profesyon i konnen ki mannyer lavi i difisil konmela. E ki bann aktivite piblik pa pe ganny sanksyonnen par Minister Lasante, par Lotorite Lasante Piblik e ki restrikte en kantite bann artis dan zot profesyon.

E alors, Gouvernman pe ankouraz bann artis pou trouv bann diferan fason inovativ, pou zot kapab fer zot bann aktivite vann zot bann sanson e ganny en lavi.

Pozisyon ki Gouvernman i pran se ki tou laliberte ki en dimoun i aret i aret kot laliberte en lot dimoun i komanse.

Mon krwar ki de semenn pase koriz mwan si mon mal. De semenn pase sa Lasanble Nasyonal in diskite lo en Mosyon lo ki mannyer pou *deal* avek sa kestyon tapaz.

E tou dimoun, tou Manm in vote inanimite pou siport sa propozisyon.

Mwan personnelman e san ki mon, mon ganny vwar pe, pe fer en komanter personel, mon vwar serten lipokrizi dan sa kestyon. Akoz si nou pe koz lo annan en, en devlop en fason fer ki respekte tou dimoun e ki tapaz pa vin en fleo dan nou sosyete, sa osi i komans dan lavil.

E normalman i komans an premye dan Sant Lavil Lari Bazar. Alors Gouvernman pe ankouraze ki nou ganny en fason fer, en *understanding* ki tou dimoun i respekte son vwazen, ki en dimoun i dan en laboutik, ki annan en restoran ki pe pase. E nou fer nou bann promosyon dan en fason rezonnab.

Alors sa i mesaz ki sorti kot Gouvernman. E an menm tan Gouvernman pe ankouraz tou bann aktivite kiltirel, e mon pa konpran la ankor akoz dan kestyon 2. Onorab *Leader* Lopozisyon i pe konplent konmkwa serten endividi pe ganny sans pou zot fer zot aktivite, tandis ki lezot pa pe ganny sans.

Mon vwar i en problem sa, mon pa konpran. O kontrer nou devret kontan ler nou vwar poudir en endividi in ganny en pti Kontra dan en lotel i pe

debourye lo osi. Parey dan *Fish Trap La Digue* i annan en dimoun i annan en msye avek son gitar ki pe *entertain* bann touris.

Mon krwar i zoli. Se sa kalite keksoz ki nou devret ankouraze. Nou pa devret, ankoler. Nou pa devret pe rode akoz serten i gannyen, serten pa gannyen. Dan prensip *fairness* ki Gouvernman i anvi vwar, tou dimoun i ganny trete parey avek menm Lalwa e i ganny menm loportinite e menm sans.

Alors sa i reponn dezyenm kestyon e Onorab, *well* Minis Fonseka in reponn trwazyenm kestyon ki dir ki Lalwa i aplik parey pou tou dimoun. E mon fer rapel Lasanble ki Lalwa ki an viger se *Public Health Act*. E *Public Health Act* i donn Lotorite Lasante Piblik pou fer bann desizyon. E kot i annan, kot i annan respe pou sa bann desizyon. Lapolis bann Lotorite i aksepte, i ankouraze. Kot napa respe nou pa ankouraze.

An sa ki konsern travay pou donn bann alternativ, bann artis. Yer mon'n annan en rankont avek Mer Lavil ki'n dir avek mwan, ki swivan sa lensidan e in fer mon kler ki se pa son biro ki'n fer okenn konplent.

Me son biro in resevwar plizyer konplent avek plizyer dimoun ki fer zot aktivite komers dan Lari Bazar.

Swivan sa, e swivan sa lensidan in apel bann dimoun avek partisipasyon Lapolis, e bann reprezantan bann artis *SeyMas* e sa bann artis ki ti santi zot, zot in ganny zot pa'n ganny, zot ti annan en konplent pou en *meeting*.

E pou gete ki mannyer nou kapab rezourd sa sityasyon dan en fason amikal. Premyerman sa trwa artis ki ti pe konplent pa'n vini dan sa *meeting*. Zot pa'n partisipe *ok*?

E *meeting* in ganny fer san zot, e i annan bann diferan *venue* ki'n ganny propoze par egzanp kot li Libreri Nasyonal kot bann artis se sa leker travay bann artis. E i annan lespas laba pou zot kapab fer en serten aktivite.

I annan Lavil Victoria in ofer bann artis en *podium*, la dan bor *Passerelle* pou zot vin fer en bann aktivite, envit bann dimoun pou asize, dan gazon, dan deor an plenn er pou zot *enjoy* en pe lanmizik.

Landrwa i ganny ofer pou bann artis *please*, servi sa bann loportinite annou, annou pa konsantre tou keksoz zis dan Lari Bazar ki deza annan bokou konsesyon.

Alors Mr Speaker sa se bann propozisyon ki'n ganny fer e Mer Lavil in dir mwan ki tou dimoun in dakor poudir nou bezwen rezonnab lo kantite oter lanmizik ki nou servi. Nou bezwen rezonnab.

Sa i pa en keksoz ki negosyab, i en keksoz ki imen, ki natirel, ki nou bezwen kapab kit nivo lanmizik pli, ase ba e Minis Fonseka in eksplik bann mezir ki pe propoze pou pa servi *micro*. Pou, i annan dimoun pe dir pa bezwen servi (*cone*) elektrisite. Vini avek ou *boombox* oubyen ou *ghetto blaster* avek. Konmsi pa egzazere.

Annou nou tou fer keksoz ki byen an respe pou tou dimoun e mon krwar poudir si nou fer li koumsa, nou pa pou bezwen ganny sa bann, sa bann tel size, pou nou deplas en Komisyoner Lapolis, en Minister en Minis Zafer Entern en lot Minis ankor pou nou, be sa bann kestyon i ava ganny regle dan en fason amikal. Parey Lapolis in sey fer, e parey Mer Lavil in fer.

Alors mwan mon demann tou Manm Lasanble, annou pran en lapros ki pa ipokrit. Kot keksoz i mal nou dir i mal, nou pa zis vin zwe politik. Nou pa kapab akoz zis konmsi nou vwar poudir sa nou kapab fer

en pe politik lo la zis nou vini, nou lev en size.

Nou la pou nou edik nou bann dimoun nou. Nou la pou nou kapab diskite e gete ki mannyer nou pran en semen ki rezonnab ki tou dimoun i *happy* avek. Nou pa vin fer politik lo tou pti keksoz ki pase dan pei, akoz sa i en keksoz ki pa pou anmenn nou lwen.

Alors mon demann korperasyon tou Manm Lasanble pou nou kapab al dan sa direksyon e pour nou kapab anmenn sa pei pli devan avek en bon fason fer. Mersi Mr Speaker.

**MR SPEAKER**

Mersi.

**(APPLAUSE)**

**MR SPEAKER**

Onorab Pillay, ou a prosede avek siplemanter.

**HON SEBASTIEN PILLAY**

Mersi Mr Speaker. Mersi pou ou larepons Minis Dezinyen.

Mr Speaker Konstitisyon i fer kler se Prezidan Larepublik ki responsab, Lakiltir ozordi. E ki se li ki responsab si oule ki arive en pti pe avek devlopman lakiltir e sor bann artis, bann dimoun ki pratik dan sa domenn.

E mon ti a kontan ki klarifye si Vis-Prezidan, si Minis Dezinyen i *stand by* sa *statement* ki parey in dir ki Departman Kiltir, napa nanryen pou fer avek bann artis an sa ki konsern pou zot sey devlope dan en fason komersyal. Premyerman mon ti a kontan si pe *stand by* sa *statement*?

Dezyenmman, Mr Speaker lo sa size servi *micro* dan Lari Bazar mon ti kontan klarifye, demann Minis Dezinyen pou klarifye se ki, pandan letan bann kanpany politik dan lepase mon a servi sa legzanp pou ilistre, Minis Dezinyen li menm ti lo en *pick-up* ek en *microphone* pe koz dan *micro* dan Lari Bazar pe fer en kantite tapaz.

*(Interruption)*

**HON SEBASTIEN PILLAY**

Ah, mon pa pe *impute* en *improper motive towards* Minis Dezinyen, mon pe zis donn en legzanp. Swa mon a *retract* mon ava demann li en lot fason Mr Speaker.

*(Interruption)*

**MR SPEAKER**

Non, non, non, non, non, non. I, mon krwar sa ki Onorab

Pillay i dir pa grav. In dir Minis Dezinyen ti lo en *pick-up*. Lo en *pick-up* dan lepase, in arive plizyer fwa.

Annou pa sot, egzamin tou pti soz. Onorab Pillay selman ou sipoze lo siplemanter, kestyon. So demann klarifikasyon e demann ou kestyon.

### **HON SEBASTIEN PILLAY**

Mersi Mr Speaker. Mr Speaker zisteman, mon siplemanter i vin dan sa konteks. Lari Bazar in toultan en landrwa kot in annan lanmizik ki ganny zwe. E in annan plizyer artis ki'n vin dan Lari Bazar ki'n servi sa moman kot i annan sa mouvman dimoun pou sey zwe zot prodwi, pou sey annan zot konmsi sey *advertise* zot prodwi.

Mon pe sey konpran zot e mon pe sey konpran bann artis. Me sa ki ou pe dir nou i pa koresponn avek sa ki nou, nou'n tande dan raportaz. So eski ou kapab klarifye dan sa *meeting* ki zot in gannyen.

Eski pou annan posibilite pou bann artis servi, pou servi sa potansyel ki Lari Bazar i donn zot, pou zot kapab *market* zot prodwi pou zot kapab ganny en lodyans, pou ekout zot prodwi?

Pou zot ganny loportinite pou fer sa? Se sa ki mon ti a kontan klarifye. E mon dernyen pwen Mr Speaker se mon ti a kontan demann Minis Fonseka. Minister for *Internal Affairs* mon konpran ou dir Lalwa i aplik pou tou dimoun. Me selman mon ti a kontan ou klarifye, si par egzanp mon pa le nonm non tel lotel.

Me lekel ki donn permisyon sa bann lotel pou zot fer sa bann aktivite divertisman? Akoz dan lamazorite ka dan sa bann lotel i pa bann Seselwa ki pe fer divertisman dan sa bann lotel?

Parey mon konpran par egzanp, mon pou nonmen sa enn lotel *Beachcomber* pa en Seselwa ki ansarz son *entertainment*.

E sa ti ava kapab en Seselwa ki devret ansarz, so ler ou dir mwan Lalwa i aplik pou tou dimoun, eski nou kapab ganny en garanti avek Lapolis ki si ou vwar en *video*, pe sirkile ki pe montre poudir dimoun pe zwenn lo tel zil, Lapolis pou pare pou li pran aksyon avek sa lotel, an relasyon avek sa, sa aktivite ki'n arive? Mersi Mr Speaker.

### **MR SPEAKER**

Mersi Onorab. Nou a dir Minis Dezinyen e apre Minis Zafer Entern.

**THE DESIGNATED MINISTER**  
**MR JEAN-FRANCOIS**  
**FERRARI**

Mr Speaker mon ti a kontan fer de pwen kler. Enn ki mon'n dir ki Minis, Departman Lakiltir pa antre dan fason ki bann artis i komersyaliz e i dan zot relasyon biznes avek piblik. Departman Lakiltir pa antre ladan. *Ok?* Departman Lakiltir i la pou ankouraz devlopman lar *ok?* Sa i premye pwen.

Dezyenm pwen, mon ti a kontan fer li byen kler ki wi tou artis i kapab zwir sa lespas ki apel Lari Bazar. Tou artis i ganny drwa al dan Lari Bazar *provided* ki zot fer li an kolaborasyon avek Lapolis e an respe pou tou bann dimoun ki dan sa landrwa.

E mwan osi mon demann tou bann dimoun pou respe bann artis ki vin la dan sa landrwa.

E mon ti a kontan fer kler Onorab *Leader* Lopozisyon. Lapolis pa'n pous personn dan bazar! Sa trwa msye zot in deside ale zot menm pou zot al koz avek bann medya *ok?*

Zot pa'n anvii antre dan en relasyon, dan en konversasyon

avek Lapolis pou ganny en solisyon.

Alors sa i en ka kot ti'n kapab ganny rezourd byen boner, me i pa'n ganny rezourd. Parkont, parkont mwan mon pa'n deza lo en *pick-up* Lari Bazar, sa mon kapab dir ou.

Me parkont mon konnen poudir kekfwa zot pe mazin akoz zot konnen ki mannyer ti arive dan lepase ler zot parti dan Gouvernman parey zot ti met Allen Ernesta dan kaso. Son *CD* dan kaso numero 1, li Allen dan kaso numero 2 akoz i ti pe dir

*(Interruption)*

**THE DESIGNATED MINISTER**  
**MR JEAN-FRANCOIS**  
**FERRARI**

... akoz i ti pe dir "roul sa gros." Kekfwa zot, zot mazin sa. Sa i dan zot lespri akoz zot ...

Me nou, nou pa fer sa bann keksoz. Nou, nou pe ankouraz bann artis. Menm bann artis ki, pa napa gran keksoz pou zot anvii felisit sa Gouvernman. Oubyen tou dimoun, tou lekspresyon politik ki ou anvii fer, ou ganny drwa fer.

Me selman toultan ou ganny fer dan en fason rezonnab avek, avek en respe, pou tou dimoun ki pase otour.

Alors mon ti a kontan reasir bann artis ki Sesel i ouver pou zot vini fer zot biznes. Annou fer li dan en fason rezonnab. Annou mazine poudir plito ki annan 3 artis ki pe debout dan bor kanmarad, ki pe zwe trwa diferan lanmizik.

Kekfwa ti kapab annan enn Lari Bazar, enn kot *Passerelle*, enn kot *Library* Nasyonal? Be pa ti a gou, ler tou sa bann keksoz pe deroule?

Sa enn ki'n ganny Lari Bazar, si i vwar en lot vin dan bor li Lapolis i ava vini i ava dir be msye, les Onorab, les Mr Minis Fonseka zwe son sega trankil pa vin konmsi al en lot landrwa.

Se sa, sa nouvo fason fer ki nou ti a kontan vwar devlope dan pei. Alors mwan mon ankouraz e mon dir ankor, plito ki bann politisyen sey rod bann pti, *score* bann pwen politik, annou edik nou bann dimoun ki i annan fason fer ki nou kapab, ki kapab pli byen pou lavenir nou pei. Mersi.

### **MR SPEAKER**

Mersi. Minis Fonseka ti annan en bout kestyon ki'n ganny adrese pou ou.

### **MINISTER EROL FONSEKA**

Wi. Mersi Mr Speaker. Wi zis pou retourn lo sa de pwen ki

Onorab Lopoziyon in mansyonnen.

Premyerman Lari Bazar napa problem pou zot fer zot lanmizik laba. E *as long as* zot pe swiv sa bann lareg ki nou'n mete. Saverdir lanmizik i ganny zwen lo en son ase normal. Mon a repet tousala, ase normal ki pa pou annan, ki pa pou annwi okenn personn.

Pou anmenn en sel *speaker*, si i annan detrwa zot ansanm koste ek kanmarad la ki ou pa ganny en sityasyon ki enn pe zwe en sanson, en lot pe zwe en lot, en lot pe zwe en lot. Ki si zot pe groupe koumsa, zot annan en sel *speaker* ki zot pe *transmit*.

Akoz sa bann diferan tapaz ki sorti diferan lanmizik lo, o bor kanmarad i annwi, i annwi dimoun ki la e i pa en bon keksoz. Lalkol nou'n dir lalkol, ouswa okenn keksoz ilegal pa ganny servi natirelman.

Pa servi osi bann *loudhailers*. *Ok, microphone* si zot pe sante zot bezwen servi en *microphone* pou sante. Selman *again* nou pe koz lo sa nivo tapaz ki en problem.

E natirelman zot bezwen servi tou bann e respe tou bann lord Lasante. Lo kestyon, dezyenm kestyon ki onorab in demann mwan lo kestyon bann

lanmizman ki ariv dan diferan lotel. I annan premyerman zot bezwen swiv ki *Licensing* in permet zot fer. So dapre *license* zot bezwen, *keep* dapre *license*. Dezyenmman, i lord Lasante osi ki an plas ozordi.

E nou'n fermen serten landrwa osi. Lo sa sityasyon lasante. E Lapolis i la pou servi sa bann Lalwa an plas la. E natirelman si i annan serten *complain* i nou devwar pou nou *investigate*.

Me an prenon kont sa bann keksoz koman *Licensing* parey mon'n dir e *Public Health Order*. Mersi Mr Speaker mon *hope* mon'n reponn sa kestyon, sa de kestyon. Mersi.

### **MR SPEAKER**

Mersi. Nou a kapab bouz lo enn de kestyon bann Manm. Onorab Letourdie.

### **HON JANY LETOURDIE**

Mersi Mr Speaker. Bonzour tou dimoun. Mr Speaker mon koman en artis definitivman mon osi mon bezwen aport mon kontribisyon.

Me en keksoz ki ozordi mon kontan, akoz mwan depi ler mon pe fer lanmizik, mon *CD* in touzour vann mon lanmizik dan Lari Bazar.

I deza annan depi byen lontan en *spot* dan Lari Bazar

kot nou dir “kot Do” kot nou lanmizik ti toultan pe vann.

So i napa en kestyon ki, e ankor la ozordi Minis Dezinyen in afirmen ki pa pe anpes personn, zwe lanmizik. Me zisteman de semenn pase, semenn pase nou ti fer sa Mosyon lo tapaz. Polisyon tapaz e en keksoz ki ti sorti toultan sete *decibels*.

E petet la i en moman, nou dir annou kontinyen edik nou popilasyon artis osi petet i bezwen ganny edike. Mon pa konnen kote i a tonbe, si lo kote Lapolis in ler pou *entame* en diskisyon lo nivo tapaz, lo *decibels* ki i fer, angaz tou nou bann mizisyen, angaz tou bann dimoun pou zot vreman ganny en konpran.

### **MR SPEAKER**

Onorab. Pa al tro long lo *statement*, al lo ou kestyon silvouple.

### **HON JANY LETOURDIE**

Wi Mr Speaker. Akoz mon pe dir koumsa, akoz Minis Dezinyen in reponn mon kestyon lo bann landrwa. Mon ti pe dir ti annan en letan ki nou ti pe propoz en *Speakers' Corner*.

Mon rapel dan sizyenm Lasanble. Petet Gouvernman i devret pe kontinyen fer bann

konsiltasyon, bann konversasyon avek tou bann parti pou rod bann diferan landrwa kot mizisyen i kapab ale *freely* san bezwen pret mwan lakle, oubyen pret mwan *stage*. Ki i kapab ale.

Sa landrwa i ganny dezinyen zisteman pou li kapab al fer son piblisite avek son lanmizik. Akoz natir son travay i demande ki i bezwen fer konnen.

Me solman anmenn tan mon pou dir ...

**MR SPEAKER**

Onorab prosed lo en kestyon silvouple.

**HON JANY LETOURDIE**

Mon pe fer mon, mon komanter Mr Speaker. Baze lo sa ki....

**MR SPEAKER**

Ou kapab fer en komanter kourt, pou ilistre ou kestyon e *move* lo kestyon. Nou lo kestyon siplemanter.

**HON JANY LETOURDIE**

Wi Mr Speaker. Eski alors Gouvernman, i pou kontinyen *entame* bann diskisyon avek bann parti pou zot kapab vwar en landrwa, bann lezot landrwa kot mizisyen sirtou, mizisyen ek santer i kapab kontinyelman

vann son prodwi, fer piblisite pou son prodwi?

Aprè tou lanmizik kot ou ete pa neserman fodre ou dan Lari Bazar. Akoz popilasyon pe ogmante, artis pe ogmante en serten ler Lari Bazar pou'n plen avek artis.

So definitivman nou pou bezwen lezot landrwa. Mersi Mr Speaker.

**MR SPEAKER**

Mersi Onorab. Minis ou a reponn son kestyon.

**THE DESIGNATED MINISTER**

**MR JEAN-FRANCOIS FERRARI**

Mersi Onorab De Letourdie. Mon ti a kontan reasir ou avek reasir Lasanble, e reasir kominote artis, ki dan Sesel, oubyen dan sa nouvo Sesel ki nou lada, pou annan toultan plas pou tou bann artis fer zot travay.

E Gouvernman e lotorite bann Lotorite Piblik pe rod plizyer lezot landrwa ki, zot ti kapab ankouraz bann artis pou zot ale.

Par egzanp mon'n nonmen pli boner, kot sa pti *stage* kot *Passerelle* laba, i vremen en landrwa formidab, kot Libreri Nasyonal. Me i annan plizyer lezot landrwa.

Mon pa krwar ki Gouvernman i anvi *designate* serten landrwa zis pou sa apre dan lezot landrwa ou pa kapab ale.

Mon asire ki nenport dimoun ki vini dan en fason rezonnab, swa avek en *CD*, swa avek en gitar, e i sante parey nou vwar partou dan lemonn. Dimoun pou arete pou kontan, pou kontan tande sa bann keksoz koumsa. Sa i pou lev nou kiltir Kreol, nou kiltir bann Ilwa, ou konpran?

So alor mon reasir ou ki deza in annan en rankont lo sa size. Alors mon ava demande ki, ki bann responsab Departman Lakiltir i kontinyen sa diskisyon, pou fer sir ki tou dimoun, tou artis i vwar son plas. I vwar li pe ganny ankouraze dan devlopman nou pei. Mersi.

**MR SPEAKER**

Mersi Onorab Vidot.

**HON AUDREY VIDOT**

Mersi Mr Speaker. Minis i kler dan ou repons lo *PNQ* ki ou Gouvernman pe fel nou bann artis. Alors, ou osi ou bezwen senser letan ou pe dir nou dan ou bann parol lo size *fairness*, lo size lipokrizi.

Akoz si vre ou Gouvernman i senser lo parol

“Sesel pou tou son zanfan”, i pa kapab annan en pwa demezir.

Nou, nou lo sa kote latab nou, nou pe senpleman demann avek nouvo Gouvernman, pou donn loportinite artis. Zis parey bann *SNP* ti ganny loportinite dan *carpark* laba, Lari Bazar pou zot koze dan zot mikro, pou zot sant zot sanson sanzman. Donn sa bann artis en loportinite zot osi!

Me selman kree en fason ki byensir sa bann dimoun i kapab, leve zot osi debourye pou sonny zot fanmir! Mersi.

**MR SPEAKER**

Mersi. Minis mon pa'n tann okenn kestyon.

**THE DESIGNATED MINISTER**

**MR JEAN-FRANCOIS**

**FERRARI**

Mon osi mon pa'n tann okenn kestyon. Alors mon krwar ...

*(laughter)*

**MR SPEAKER**

Minis.

**THE DESIGNATED MINISTER**

**MR JEAN-FRANCOIS**

**FERRARI**

Mon krwar Onorab i a bezwen pas. Mersi.

**MR SPEAKER**

Minis eskiz mwan. Nou letan pe kit nou, nou annan apepre 5 minit, si ou le fer komanter. *Ok* dan sa ka nou a pas lo dernyen kestyon. Onorab Aglae.

**HON EGBERT AGLAE**

Minis bonzour. Mersi Mr Speaker ek ou delegasyon. Minis mon ti a kontan met en klarifikasyon.

Ou'n mansyonnen ki ou dir sa de artis, ki ti pe performen pa ti prezan dan sa *meeting*. Me lenformasyon se ki zot ti annan reprezantan dan sa *meeting* kot ki ti ganny fer avek Mer Lavil.

Minis en konsern ki ganny eksprimen par bann viziter se ki ler zot vin isi, zot vwar en lavil parfwa ki mor. E partou lo monn kot i annan bann *town market* parey nou annan Sesel. I annan bann divertisman, i annan bann lanmizman, i annan en pe sa bann tapaz.

Alor Minis mon ti a kontan petet demann ou, ou'n nonm Mer Lavil bokou. Eski dan sa laliny vi ki li ki zer lavil. Me selman nou annan bann lezot *body* parey, nou annan *NAC* osi ki mon ti a voudre petet ti ava annan en reprezantan *at least* Kiltir la, ouswa *NAC* lo *panel* devan pour osi met serten pwen

devan, lo ki mannyer nou bouz de lavan?

Eski sa konversasyon i bezwen, zot pe kontinyen e ki merit kontinyen, ki mannyer ki bann artis i kapab vwar zot pe performen, vi ki la zot pa pe ganny okenn led avek Gouvernman, pou zot kapab *at least* sonny zot fanmir?

E dezyenm Minis. Mon ti a kontan petet demann ou. Eski ou Gouvernman li menm pou reakte - sirtou par egzanp, lo sa size ki sa biznesmenn ti met devan, ki'n vin en reaksyon sitan vitman. Mon pa konnen si akoz i *sponsor LDS* dan lepase. Eski lo en baz *fairness* ...

**MR SPEAKER**

Onorab, Onorab, eskiz mwan, eskiz mwan. Ou sipoze pe demann kestyon siplemanter lo sa size. Pa al tro divage lo bann soz lepase. Silvouple poz ou kestyon.

**HON EGBERT AGLAE**

Mr Speaker, sa ki mon anvi konnen se. Eski Gouvernman pou tret okenn bann ka, ki zot konsidere koman i kapab konsider koman en *public nuisance* lo en baz *fairness*, san get relasyon avek okenn relizyon, okenn parti politik ouswa okenn pos endividi? Mersi.

**MR SPEAKER**

Mersi Onorab. Minis ou a donn en repons silvouple.

**THE DESIGNATED MINISTER****MR JEAN-FRANCOIS FERRARI**

Mersi. Tre senp Mr Speaker. Napa okenn diskriminasyon. E an realite mon'n aprann ki ti annan serten moman, i posib ki ti dan Festival Kreol ki sa msye ki ti, ki'n koze lo televizyon Mr Meghjee. In ofer son lavarang pou met lanmizik, pou mon vwar Onorab De Letourdie i konfirman, pou vin zwe lanmizik.

E napa nanryen politik avek sa. Sa i en zes normal e mon konpran mwan akoz Mr Meghjee in fer sa, akoz Onorab De Letourdie i annan en zoli lavwa e i pa kriye.

*(laughter)*

**THE DESIGNATED MINISTER****MR JEAN-FRANCOIS FERRARI**

I sante, i *entertain* byen sa bann dimoun. Donk sa i vin lo mwan, napa okenn diskriminasyon Onorab ou kapab *rest assured* lo la.

Dezyenm keksoz ou'n dir premyerman mon ti a kontan

ou'n, ou'n eksplike ki mannyer en lavil dan pei Kreol, dan en zil i deroule.

Me selman ou'n azout, ou'n azout en mo kekfwaw in sap ou. Ou'n dir aktivite, lanmizik, sa e tapaz. Zisteman Onorab, se tapaz ki nou pa oule. Lanmizik nou le. Aktivite nou le. Sante nou le. Pa tapaz. Se sa, se sa ki nou pe sey rode. Sa balans ki bon pou tou dimoun ki fer lavil gou.

E mwan mon ti a kontan vwar dan tou kwen Lari Benezet, si i annan en dimoun i vini i le vini avek son gitar, vini. I *ok*.

Me selman pa nou tou dan bor kanmarad. Mon konnen i tandans se pou nou tou vin dan menm landrwa. Be nou, nou anvi tal sa byen, donn en lespas tou dimoun, fer si ki tou dimoun i ganny son posibilite pou li fer son travay.

Mon konnen poudir, mon pa pe *impute* en motiv, mon konnen ki i annan, i annan bokou koze ki bann artis, i pe *struggle* konmela e mon dakor avek sa.

Mon absoliman dakor avek sa. Me tou dimoun pe *struggle*, tou, tou profesyon pe *struggle*. Alors kot nou kapab donn en led. E la led ki nou pe ofer se, se organize pou donn ou plizyer landrwa, pou ou fer

keksoz ki byen, ki zoli, ki tou dimoun pa pou bezwen tay Lari Bazar. Tou touris pa pou bezwen tay Lari Bazar i pou tande poudir, be laba kot *Passerelle* dan midi i annan bann dimoun ki fer bann pti aktivite, annou al laba kekfw nou kapab aste en CD.

Donk se dan sa direksyon ki nou le ale. Mon ti a kontan reasir Lasanble ki tou keksoz i ava mars byen, si nou diskite nou esanze, nou annan en konversasyon e nou rod en solisyon. Mersi.

**MR SPEAKER**

Mersi. Mersi bann Minis e an se moman nou poudir orevwar Minis Fonseka, Mr Ted Barbe Komisyoner Lapolis. E nou ava apel delegasyon ki pou avek Minis Ferrari lo bann size pou son Minister.

***(MINISTER FONSEKA AND HIS DELEGATION WAS EXCUSED FROM THE HOUSE)***

**MR SPEAKER**

Bon, bonzour e byenveni dan Lasanble Mr Johnny Louys *Manager Control & Surveillance* kot *Seychelles Fisheries Authority*. Nou a pran kestyon pour Minis pou Lapes e *Blue Economic*. E premye kestyon Onorab Gervais Henrie.

**HON GERVAIS HENRIE**

Mersi Mr Speaker. Bonzour tou dimoun. Kestyon nimeron 34 i lir koumsa: -

Eski Minis pour Lapes i kapab dir nou Lasanble travay spesifik ki Lotorite Lapes Sesel (SFA) ansanm avek Gard Lakot pe fer, pou redwir lensidan lapes ilegal dan nou *Zone Ekonomik Eksklisiv*, ki kapab enpakte negativman lo nou stok pwason?

E sirtou ki demars ou Minister pe fer pou abord sa size avek bann pei vwazen ki souvan zot peser ki koupab? Mersi.

**MR SPEAKER**

Mersi Onorab Henrie. Minis.

**THE DESIGNATED MINISTER MR JEAN-FRANCOIS FERRARI**

Mersi Mr Speaker. Mersi Onorab Henrie pou ou kestyon. Mr Speaker i en plezir pou mwan aport avek Lasanble Nasyonal ki depi ler mon'n pran responsabilite Departman Lapes nou'n kapab temwanny en korperasyon etrwat ant bann lazans ki enplike dan sirveyans nou teritwar maritim.

1300kilomet kare, i sertennman en sirfas enorm ki demann bokou latansyon. Son

lenportans i ankor ogmante. Depi ler ki Prezidan Ramkalawan in deside ki Sekter Lapes e tou bann lendistri asosye avek Lekonomi Ble, pou ganny ankouraze ki sa Sekter pou bezwen vin enn parmi bann pilye pli enportan dan nou lekonomi.

Sa korperasyon ki'n devlope e ki pe ranforsi toulezour i enplik bokou Lazans. Non selman Gard Lakot Sesel, e Lotorite Lapes Sesel. Me osi tou bann lezot Servis Lentelizans ki prezan dan nou pei tel ki *NISCC*, *ARSI* osi ki de lorganizasyon baze Por Victoria.

Zis pou rapel, fer rapel bann Manm. *ARSI* osi i enn sa de sant ki form par dan en Striktir Defans Maritim pou was Losean Endyen. E ki ganny dirize par Kolonnèl Adeline.

Sa striktir i sipoze 100 poursan operasyonnel apartir lafen sa lannen. Me i deza pe furni lenformasyon enportan dan sirveyans nou teritwar.

*ARSI* osi en lorganizasyon ki reprezant plizyer pei e alors i deza reponn en bout kestyon Onorab Henrie. Akoz i montre ki nou korperasyon rezyonal avek nou bann vwazen i tre aktiv. Sirtou avek bann pei Manm Komisyon Losean Endyen.

*NISCC* i sa ki nou dekrir koman nou *National Information Sharing Coordination Center* anba direksyon Kolonnèl Benoiton.

En striktir ki asire ki tou lenformasyon ki nou resevwar i ganny byen servi. E ki nou bann repons i touzour rapid e efektiv.

Lo kote *SFA* Gard Lakot, zot pa bezwen ganny prezante an detay isi. Me dan tou lede lorganizasyon i annan bokou kapasite sirveyans ki reaktiv e tre aktiv dan lalit kont lapès ilegal. Lapes ki pa ganny raporte, e lapès ki pa ganny reglemante. Sa ki nou apel dan nou, dan nou bann term syantifik *IUU fishing*.

Me nou tou nou konnen ki menm si striktir i bon, i zoli i pa mars par li menm, ni par laverti. Pou nou protez nou resours e nou lanmer nou bezwen en Gouvernman ki annan en volonte politik pou *deal* avek bann menas.

Sa i parfwa difisil akòz sa bann menas i souvan enplik bann koupab sorti dan lezot pei. Souvan bann pei ki nou annan bann bon relasyon avek, ki nou, nou pe rod bann bon relasyon.

Alors fodre ki Gouvernman i azir brav e fer tande son lavwa lo sa size lapès

ilegal. Fodre pa per pou nou montre ledwa kot keksoz i mal.

Tou dernyerman Mr Speaker Gouvernman in sanz en gir. E in entansifye son repons fas a sa fleo. Nou bann lafors sekirite apiye par bon lentelizans in entersepte, aret plizyer bato ki sispekte pe fer lapas ilegal dan nou delo.

Zot in ganny arete e ler zot kilpabilite in ganny trouve, zot in pey le konsekans. Mr Johnny Louys ki akote, mwan ozordi e ki *manager controller surveillance* kot SFA pou donn bann detay sa bann aktivite depi komansman lannen ler nou pou pran Kestyon 35, mon krwar ki ganny demande par Onorab Philippe Arissol pli tar.

Antretan sa i bann legzanp ki mannyer nou pe reakte e fer fas avek sa fleo *IUU*. Me nou osi fer travay prevansyon vizavi bann pei etranze. Mon pa zanmen mank, lo okenn lokazyon poudir avek tou reprezantan pei etranze ki, mon rankontre ki zot sitwayen i vin trafike dan nou lanmer ki sa i bezwen arete.

E mon pa mank en lokazyon pou fer zot konnen ki son konsekans i grav. Tou resaman mon'n enform nouvo O Komiser Sri Lanka, ki aksyon i kapab sever. E dan nou bann devlopman nou bann, nou

bann Protokol ki destriksyon sa bann bato i pe ganny konsidere, e pou ganny fer si bann sitwayen sorti dan sa bann pei i kontinyen vin lapas ilegalman dan nou delo.

E sa Mr Speaker i pa zis koze, nou pe fer li e nou pou fer li ankor. Avek Anbasader Oman e lezot Anbasader ki mon'n rankontre dernyerman, mon'n met menm sityasyon devan.

Alors Mr Speaker pou rezim en pe larepons pour Onorab Henrie pou son kestyon. Mon ti a kontan dir ki nou pei in anvoy en mesaz tre kler, pou larezyon e pour lemonn pou fer sir ki trafik e vol nou resours pa pou ganny tolere.

Nou ptipti, nou resours i limite me nou pou al rod zot e nou pou tyonbo zot. I annan ki pou sape, en fwa, de fwa, senk fwa, dis fwa me parey madanm Thatcher ti kontan dir nou, nou bezwen reisi zis en fwa.

E tanzantan nou pou reisi en fwa e ler nou pou reisi konsekans pou vreman fermal. Gouvernman pou kontinyen investir dan lekipman modern pou sirveyans e deteksyon krim.

Gouvernman pou osi get pli lwen an deor nou balizaz. Par egzanp kot nou pe gete pou lemoman dan rezyon, ban *Saya*

*de Malha* kot nou annan lentera komen avèk *Maurice*, pou protez e eksplwat sa landrwa, dan en fason soutenab pou nou zanfan e pou lezot zenerasyon.

Mon profite Mr Speaker pou remersye tou bann Lazans lokal, rezyonal e enternasyonal pou zot korperasyon e osi pou bann laflot pei etranze ki donn nou bokou sipor.

Me byensir mon pli gran remersiman i al pou nou bann peser Seselwa, ki raport avèk lotorite ler zot vwar prezans bann bato etranze ki paret pe fer aksyon ilegal dan nou delo.

Dan lepase, in annan koze lo rekonpans pou sa bann peser, ki'n montre sa bonn volonte e ki'n brav pou raport tel aktivite.

Me sa prensip pa'n zanmen kler. I annan rapor ki serten in gannyen, lezot pa'n gannyen, me sa i zis bann rapor. Departman Lapes an kolaborasyon avèk *SFA* pe travay lo en prensip kler ki pou permet Lotorite, pou donn sa kalite rekonpans dan en fason zis e byen.

Sirtou ki nou konnen, ki serten bato Seselwa i souvan perdi zournen lapès ler zot pe swiv bann aktivite ilegal.

Enn bann prensip fondamantal dan Minister

Lapes ek Lekonomi Ble, se ki nou bezwen ankouraz nou bann peser e bann ki benefisye avèk resours lanmer pou zot menm vin bann gardyen sa bann menm resours.

Ankor enn fwa, mon bezwen remersye tou peser Seselwa ki aplik sa prensip.

Finalman Onorab Henrie in fer referans dan son kestyon lo lenpak lapès ilegal nou resours pwason. E sa mon pou reponn ler mon pran kestyon 38 par Onorab John Hoareau. Mon ti a kontan remersi ou Mr Speaker.

### **MR SPEAKER**

Mersi Minis. Mon pe reflexir ki kestyon Onorab Arissol ki swiv i preski lo menm size.

Alor sa ki mon pou fer la mon pou donn Onorab Henrie pou siplemanter lo son kestyon pou li, apre mon pou *move* lo kestyon Onorab Arissol. E bann Manm ki'n lev lanmen i kapab anmenn zot kestyon lo sa size an zeneral. Onorab Henrie.

### **HON GERVAIS HENRIE**

Mersi Mr Speaker. Mon apresye ki dan son larepons Minis in dir ki fodre annan volonte politik pou *deal* avèk bann menas. E lo lapar Lasanble mon kapab dir ou, ou pou ganny nou sipor lo la.

Premyerman mon apresye travay ki ou pe fer. Avek bann pei etranze mon'n, mon'n swiv dan medya ki ou'n zwenn avek O Komiser Maldivyen ki ti resaman isi, ou'n mansyonn *Sri Lanka* avek *Oman*.

Me i annan bann lezot pei dan larezyon ki tradisyonnelman nou konnen, zot bann peser i vin depouy nou lanmer partikilyerman bann Malgas, bann Komoryen.

Mon vizit *Rodrigues*, menm i annan dimoun *Rodrigues* ki'n dir mwan ki'n deza vin pran tortidter ziske Aldabra, ki ozordi dan enn bann park ki annan plis torti zean *Rodrigues*, i sorti Sesel Aldabra.

Donk mon anvi ou ti ava dir nou lo kote COE, si la i annan en travay ki kapab ganny fer? Mon premye kestyon sa Mr Speaker.

Dezyenm kestyon, i lo la partaz bann *data* lo sekirite maritim. E la partikilyerman lanfaz lo Gard Lakot. Akoz baze lo bann rezyon kot bann sa bann aktivite ilegal pe deroule.

Si i annan en travay ki Gard Lakot pe fer avek bann pei vwazen pou kapab partaz sa bann lenformasyon? Mersi Mr Speaker.

**MR SPEAKER**

Mersi Onorab. Minis wi.

**THE DESIGNATED MINISTER**  
**MR JEAN-FRANCOIS**  
**FERRARI**

Mr Speaker si, avek ou permisyon. Mon ava pran sa repons zeneral lo korperasyon politik ki nou annan avek bann pei. E apre mon ava, mon ava ofer laparol Mr Louys ki ava reponn lo bann, lo bann aksyon spesifik. Ki mannyer sa bann keksoz, sa bann keksoz i deroule.

Onivo Komisyon Losean Endyen Onorab, nou annan en tre bon relasyon avek bann *partner*. Byensir, i annan bann pei ki dan bann sityasyon bokou pli difisil ki nou. *Madagascar* i en pei anba pei bokou stres, *Comore* i anba bokou stres. E zot napa sa, sa kapasite sirveyans, zot prop dimoun ki pe lapes dan larezyon. E alor sa i tonm lo nou.

E enn bann keksoz ki nou ki Gouvernman in anonse i ti a kontan vwar, se ki nou koman en pep, koman bann biznessmenn, koman bann peser nou okip nou teritwar. Nou al en pe pli lwen e nou annan prezans partou dan nou teritwar ki pou dekouraz bann dimoun pou vin fer bann aktivite ilegal.

Donk i annan sa, i annan sa kolaborasyon ki ganny fer. E avek lezot pei ki bord Losean Endyen atraver *IOTC* nou annan en bon kolaborasyon. Me selman i annan plizyer sa bann bato ki vin an deor kontrol zot prop Gouvernman. E sa i fer i fer li difisil.

Mon pa anvi nonm ankor i annan bann bato sorti bokou pli lwen ki *Maldives* oubyen ki *Sri Lanka*, ki finalman vin rann lapel dan Losean Endyen.

Donk i en batay permanan pou nou kapab kontrol sa bann aktivite. Me selman parey mon'n dir pli boner, i annan en volonte politik e nou'n montre.

Dernyerman nou'n ganny bokou rekonesans e bokou felisitasyon par bann pei parey Lanmerik ki'n rekonnet sa bann zefor ki nou pe fer, ki nou pa pe zis koze. Me nou pe akte par ler avek bann pti mwayen ki nou annan. Nou pe *still* pran lo nou menm pou nou arete, kestyonnen e pini sa bann dimoun si zot ganny sa pinisyon.

Donk son repons zeneral se sa. E mon pa konnen Mr Speaker si ou ti a kontan ...

**MR SPEAKER**

Non.

**THE DESIGNATED MINISTER**  
**MR JEAN-FRANCOIS**  
**FERRARI**

Ki mannyer ou ti a kontan prosede prezan?

**MR SPEAKER**

Mon ti a kontan pas kestyon Onorab Arissol, akoz mon krwar nou kapab prevwar en pe repetisyon ki nou kapab evite. Onorab Philip Arissol ou kestyon.

**HON PHILIP ARISSOL**

Mersi Mr Speaker. Bonzour tou dimoun. Eski Minis pour Lapes i kapab donn en kontrandi nou Lasanble lo size lapes ilegal dan lanmer Sesel?

Ki kantite bato ki'n ganny atrape dan sa dernyen 12 mwan?

Konbyen ki'n fini pas Ankour e konbyen ki'n ganny trouve koupab? Mersi.

**MR SPEAKER**

Mersi. Minis, ou kapab re-adres kestyon oubyen pas laparol avek Mr Louys.

**THE DESIGNATED MINISTER**  
**MR JEAN-FRANCOIS**  
**FERRARI**

Mon ti a kontan pas laparol avek Mr Louys silvouple.

**MR SPEAKER**

Yes. Mr Louys.

**MANAGER CONTROL & SURVEILLANCE JOHNNY LOUYS**

Mersi Mr Speaker. Bonzour Lasanble, Manm Onorab. Dan sa dernyen 12mwan SFA avek bann lezot Lazans tel ki Lafors Defans Sesel atraver Coast Gard Lakot e Air Wing, in atrap 6 bato ki ti'n, ki'n ganny sispekte pou lapès ilegalman dan delo Sesel.

Dan sa 6 bato, 2 in fini kondannen, 1 in ganny large aköz ti napa ase levidans pou prosekisyon, e 3 i ankor dan prosedir Lakour.

I devret ganny note ki tou bato ki nou'n atrape pou lofans lapès ilegal dan sa dernyen 12mwan, i bann bato ki anrezistre Sri Lanka ouswa ki anba komann bann Nasyon Sri Lankan abor.

E baze lo bann lenformasyon ki Lotorite Lapès Sesel i anmase atraver bann lezot Lotorite Sesel, e osi avek bann lezot lazans overseas RCOC par egzanp e COI.

E osi bann rapor ki nou kolekte avek nou bann peser lokal i posibleman annan plis sa bann bato ki frekant nou delo ilegalman.

Kot i konsern, a sak fwa bato Sri Lankan ki an se moman

dan prosedir prosekisyon. Enn sa kaptenn in fini ganny sarze pour lofans lapès ilegal e pou sa 2 lezot bato *investigation* i ankor pe *ongoing*. So sa bann lekipaz i dan rimann pandan ki lenvestigasyon pe deroule.

An plis ki sa bann bato ki'n ganny arete pou lapès ilegal, bann Lotorite responsab ti osi mont en loperasyon pou enterog 8 bato Sinwan. Ki menm si zot pa ti pe lapès, zot pa ti'n respekte nonm enternasyonal pou enform lotorite ler zot in antre dan nou delo pou rezon *force majeure*.

Sa bann bato ti ganny large apre ki zot ti pey en lanmann \$55mil. Bann bato ki'n fini prosekisyon e ki'n ganny trouve koupab pou lapès ilegal in ganny *auctioned* boner sa lannen dapre lord Lakour ki'n donner dan sa bann zizman.

Me selman prenon kont ki laplipar sa bann bato pa lo standar pou lapès dan Sesel, e osi i annan bokou konsern lo size *over capacity* dan lapès domestik e osi an zeneral.

Minis avek Lotorite Lapès pe fer demars ki bann bato ki ganny trouve koupab pou lapès ilegal i kapab detri, apre ki Lakour in fini rann son zizman. Mersi bokou Mr Speaker.

**MR SPEAKER**

Mersi Onorab Arissol. Ou annan kestyon siplemanter lo ou kestyon?

**HON PHILIP ARISSOL**

Mersi Mr Speaker. Bann larepons Minis i konpreansiv menm avek kestyon Onorab Henrie.

Me solman zis mon ti a kontan dir Minis. Eski zot annan en plan pou annan en program ki rekonpans bann peser ki fer sa bann rapor lo sa bann bato sispe? En keksoz ki tou peser ki letan i fer napa en bann ki gannyen, en bann pa gannyen? Mersi.

**MR SPEAKER**

Mersi. Minis.

**THE DESIGNATED MINISTER  
MR JEAN-FRANCOIS  
FERRARI**

Mersi Mr Speaker. Parey mon'n dir pli boner, Onorab. I annan bokou koze lo sa program. Me sa program pa dan son faz final. I pe ganny, i pe ganny diskite, i pe ganny finalize. E onnetman mon ava dir ou enn bann, enn bann difikilte la se resours, resours finansyel.

E alors nou pe, nou pe sey gete ki mannyer atraver sa bann, sa bann lasezi ki nou fer. Si nou fer lasezi ki mannyer

nou kapab lev en pe resours pou nou kapab rekonpans sa bann dimoun ki'n ed, nou pou nou fer sa larestasyon ek sa lasezi.

Donk i ankor dan preparasyon pou nou kapab ganny en metod travay final. Mersi.

**MR SPEAKER**

Mersi. Nou a pran kestyon Onorab Adelaide.

**HON FRANCOIS ADELAIDE**

Mersi Mr Speaker. Bonzour Minis avek ou delegasyon e tou bann Manm Onorab ki pe ekoute.

Minis lapes ilegal i pa zis deor lwen laba lot kote, e i osi lo nou brizan. So mwan mon pou demann ou. So, eski i annan okenn keksoz ki zot pe fer, akoz vi ki nou brizan i parey bann *nursery* pou nou bann pwason.

E mwan dapre mon konpran ki bann *expatriate*, zot annan *equal birthright* parey mon piti i kapab al lapas.

Eski zot pe travay lo kote sa, dan sa Lalwa en fason ki, menm *expatriate* zot ganny kouver e zot pa annan drwa lapas vin lo nou brizan?

E eski ou pe travay avek Minister Lanplwa pou fer sir ler bann dimoun i fer vini *expatriate*, zot annan ase manze

pou donn sa bann dimoun ki nou pa bezwen vwar zot lo nou brizan? Mersi.

**MR SPEAKER**

Mersi Onorab. Mr Louys i ava adrese.

**MANAGER CONTROL & SURVEILLANCE JOHNNY LOUYS**

Mersi bokou Mr Speaker. Mersi bokou Onorab pou kestyon. An se moman, nou annan en louvraz ki nou pe fer ki nou'n komanse en pe letan. Pou revwar nou Lalwa Lapes. So sa Lalwa ki pou fer i pou *update* en pe bann provizyon ki nou'n vwar i annan en pti pe defayans ladan.

E osi i pou kouver bann legal *gaps* ki nou'n vwar kot i konsern lapes. Sa i pou enkli regle bann lapes rekreasyonnel kot nou'n vwar bann dimoun pe servi bann metod ki pa soutenab.

E nou'n vwar bann dimoun parey bann etranze, parey ou'n mansyonnen Onorab ki pe lapes, pa zis pou zot konsonmasyon personel me osi pe fer aktivite komersyal lo la.

So nou annan bann revwar, bann *legal review* ki nou pe fer, so *very soon probably* nou pou annan en, en

propozisyon pou *amend* Lalwa Lapes an zeneral.

Me an plis ki sa, nou program sirveyans i pa zis konsantre deor. Nou annan bann program sirveyans ki nou fer ater. Nou annan bann program sirveyans ki nou fer ek lakot.

Dan *SFA* apre osi avek bann lezot *partner* parey Lapolis, *Coast Guard* regilyerman.

So tousala i bann mekanizm, bann mekanizm ki nou pe mete. E ki nou pe enplimante osi regilyerman ki pou kapab, konmsi *deter* en pe sa bann kalite lapes, sirtou bann lapes lo brizan parey ou pe dir Onorab. Mersi.

**MR SPEAKER**

Mersi. Mon a pran kestyon Onorab Cosgrow.

**HON WALLACE COSGROW**

Mersi Mr Speaker. Bonzour Mr Speaker. Bonzour Minis. Bonzour tou dimoun ki pe ekoute. Bonzour tou Onorab.

Mr Speaker Minis in dir poudir nou teritwar i enn ki gran, ki *vast* e ki nou bezwen resours pou patrole.

E Onorab Henrie dan son lentervansyon taler in osi koz lo bann bato ki sorti dan sid, dan sid nou teritwar par egzant

Komor, *Madagascar* e menm lo zil *Rodrigues*.

Eski Minis, eski Gouvernman i annan lentansyon met serten fasilite petet lo nou bann zil dan sid, pou kapab? Akoz *response* sorti Mahé i pran en pe letan e *by the time* ou arshiv laba sa bann dimoun in fini fer sa ki zot pou fer. Konmdir Kreol kabri in fini manz salad.

E eski Gouvernman i annan plan met serten resours, fasilite lo bann zil dan sid, pou kapab *capture* sa bann aktivite ilegal ki pe pase dan sa rezyon?

E dan menm laliny Minis anvi ki ou'n komans serten negosyasyon avek Linyon Eropeen, lo Lakor Lapes, parey ou ti dir Minis?

Eski ladan osi zot pou ranforsi sa zafer, pa neserman lapes ilegal, me solman i bann, i bann Regilasyon *IOTC* kot bann lespes par egzanp reken, lare, torti pa ganny tyonbo dan bann *nets*. Eski sa osi zot pe, zot pe pran an konsiderasyon? Mersi.

### **MR SPEAKER**

Mersi Minis.

### **THE DESIGNATED MINISTER** **MR JEAN-FRANCOIS** **FERRARI**

Mersi Onorab. Onorab lo proteksyon, sirveyans nou bann Zil Elwanye i annan de konponan.

Enn parey mon'n dir pli boner, gete ki mannyer nou kapab ankouraz bann Seselwa, oubyen bann investiser pou zot al ver bann zil, pou zot mark en prezans permanan dan bann zil.

Akoz i annan bann zil ki napa, ki napa prezans permanan. E sa li menm i ava met bann gardyen lo sa bann zil ki pou protez, vey nou resours.

Dezyenm nivo, se nivo sirveyans, militer oubyen atraver Gard Lakot. Sa i en size ki parey zot konnen in ase kontroversyel e pozisyon ki Gouvernman in pran i senp.

Wi nou anvi devlop en prezans *Coast Guard* dan zil Sesel dan sid. Me selman nou anvi fer li nou menm. Nou pa anvi konpromet nou souvrennte, oubyen vann en zil avek en, avek en lot pei.

E sa i fer ki nou bezwen rod resours. Sa pei ki ti anvi, ki ti enterese avek *Assomption*, i pa tro, tro pare pour ede ki Gouvernman Sesel ki fer sa.

Konpran, i ti a kontan li osi ganny en prezans, be selman nou pa pe al dan sa direksyon. Nou, nou anvi gard nou souvrennte, nou teritwar. E

alors sa i pran byensir en pe, en pe letan e bokou resours ki nou napa pou lemoman.

Donk sa i lo sirveyans, dan bann zil dan sid. Ou dezyenm pwen lo ler nou koz avek Linyon Eropeen pou gete ki mannyer nou kapab protez bann lespes ki anba *stress* apard bann, bann ton e *tuna-like species* ki permet Linyon Eropeen pou lapas dan nou delo.

I annan bokou mezir, environmantal ki'n ganny devlope. E enn bann pli enportan se ki prezan Linyon Eropeen i bezwen met en fon pou protez lanvironnman, pou netway en pe nou bann zil ler bann *fads* i tonm lo zil.

Ler i annan bann si annan en dezas ki an rezilta lapas avek lasenn. Donk, nou pe *partner* avek Linyon Eropeen, akoz i enportan ki sa Lendistri Lapas i kontinyen. Me i en enportan ki i ganny fer dan en fason soutenab.

Alors nou Lalwa pou protez bann lespes, i tre, tre sever. E nou parey Mr Louys in dir nou pe revwar bann serten *gaps* ki annan, pou fer sir ki nou, nou kontinyen pouse ki lapas partou dan Sesel lo kannal, oubyen lo brizan i en lapas ki vin soutenab, pou nou bann zanfan a lavenir.

Alors pa trakase nou pe *partner* avek bokou lorganizasyon pou nou fer sir ki, bann nouvo metod ki nou enplike, se bann metod ki soutenab e ki kapab garanti nou sa resours pou plizyer lannen ankore. Mersi.

### **MR SPEAKER**

Mersi. Mon pran kestyon Onorab William.

### **HON WAVEN WILLIAM**

Mersi Mr Speaker. Bonzour tou dimoun ki a lekout. Bonzour *DM* avek, sa zofisyè lo *panel*. Mon kestyon i *comme* swivan:

Minis Dezinyen ou'n koz ki nou bezwen resours pou fer sa travay. Me mon anvi demann avek ou, eski ou satisfè? Eski ou satisfè avek depans ki Gouvernman Sesel i bezwen fer atraver *Coast Guard* pou al tyonbo sa bann bato deor laba, pou vin avek?

Eski ou satisfè ek valer ki nou pe gannyen avek bann sanksyon ki zot pe met anver sa bann bato endividyel ki vin lapas ilegal dan pei? Sa i mon premye kestyon.

E dezyenmman, par lefe ki nou pe al anbank Program Reform Ekonomik *IMF*, pei i bezwen larzan. Ki demars ekstra pe ganny fer pou diskite avek bann Lanbasad, menm

atraver nou bann Lanbasad aletranze, pou fer sir ki olye detri bann bato, an mer, me ki zefor i ganny fer pou nou kapab tir le maksimonm posib?

Akoz ki arive se ki, nou pa vreman kapab ozordi, aksepte lenformasyon ki nou pe gannyen. Akoz par lefe ki nou kapasite pou nou kapab fer sa sirveyans *to the maximum* nou pa pe kapab. E lenformasyon i kapab pa kredib an term kantite pwason ki pe ganny lapes ilegalman.

So, mon demann mwan, se ki eski nou pe fer ase? Ouswa eski nou satisfè poudir sa bann sanksyon pe ganny mete an term monneter? Eski nou aksepte, ouswa nou kapab ganny *maximum*? Mersi.

**MR SPEAKER**

Mersi Onorab. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Mersi Mr Speaker. Larepons kourt se ki Onorab William non nou pa satisfè. Mon pa krwar i annan okenn lafors sirveyans ki kapab dan lemonn ki kapab kouver tou son fre. Me nou pe travay vreman dan en direksyon pou nou kapab, rekiper lo serten depans ki nou pe fer.

E mon kontan poudir avek, poudir avek Lasanble i annan plizyer program. E kekfwa Mr Louys i ava dir, i annan plizyer program ki ed nou finansyerman pou nou asir patrol. E pou nou fer sa bann aktivite, sa bann aktivite sirveyans.

I annan bann fon, bann Fon Linyon Elopeen, i annan bann fon, atraver bann lezot program parey *swoi fish*. I annan plizyer sa bann program ki la, e ki la ankor mon ava kapab dir ou Onorab William.

Kekfwa nou, nou en pti pe, pe tro tarde pou nou, pou nou ouver sa robinen, pou nou antre dan sa kalite laktivite ki pou permet nou bouz sa bann fon. Nou menm nou par ler nou en pti pe, nou en pti *slow* aköz i pran bokou langazman e i pran bokou zefor.

Alors i annan sa bezwen pou nou toultan lev nou nivo penalti ki nou pe met, ki nou pe mete.

E, me selman pli spesifikman lo sa bann bato ki ou'n mansyonnen ki nou kapab pe detri. Zis *bear in mind* Onorab ki sa bann bato i pa lo standar. Vreman i pa - par ler se bann lakok pistas ki'n ki ou pa ti pou oule ou fanmir i al lo kannal lo la. Me selman i sorti

dan bann serten pei ki, ki zot, zot standar i pa osi for ki pou nou.

Alors dernyen fwa, in annan, in annan moman kot nou'n permet depouy sa bann bato pou ganny en pe pyes oubyen bann keksoz koumsa.

Me selman an zeneral sa bann bato vreman pa vo nanryen. E mon a dir ou Onorab William. Nou'n anmenn bato, nou'n sezi, nou'n kit dan Por in kout nou milyon pou nou okipe.

E se sa son difikilte i vini. Ou aret li, ou aret sa bato, i annan 5 peser ek 1 kaptenn. Be ou ki bezwen donn li en pe manze, ou ki bezwen donn li en landrwa pou li anmar son kannot. Ou ki bezwen konnekte li avek en pe delo. Finalman ler ou fer ou kont dan, ler ou fer ou kont ou grat latet ou dir be. Nou ti krwar nou pou ganny keksoz be finalman nou'n peye, en ta.

So i en balans delika ki nou pe, ki nou pe rode. E *SFA* i pe rod bann metod, bann *operating procedures* pou fer sa avans vit, nou fini avek, nou *deal* avek.

Sa bann dimoun si zot pe ganny rapatriye zot ganny rapatriye. Si zot pe ganny dan prizon, zot ganny dan prizon nou fini ek sa. Mersi.

### **MR SPEAKER**

Mersi. Mersi Minis. Nou a pran poz la. Mon pou donn ankor en pe letan pou bann Manm ki annan kestyon siplemanter lo sa size.

Akoz nou'n met sa de kestyon ansanm nou'n sov en pe letan. So ler nou tournen nou a rebran bann Manm ki'n lev lanmen. Mersi. Nou a pran poz nou a retournen 11er.

**(BREAK)**

### **MR SPEAKER**

Bon nou ava pas lo kestyon siplemanter pou detrwa Manm ankor dan letan ki permet nou. Onorab Letourdie.

### **HON JANY LETOURDIE**

Mersi Mr Speaker. Minis mon ti ava kontan demann ou, si mon pe konpran byen, eski i annan bann bato ki'n ganny atrape ki'n ganny vann avek Seselwa? E si in ganny vann ki mannyer prosedir in ganny fer e sa bann larzan i al pou ki? Mersi.

### **MR SPEAKER**

Mersi Onorab. Minis.

### **MANAGER CONTROL & SURVEILLANCE JOHNNY LOUYS**

Mersi bokou Mr Speaker. Mersi bokou Onorab pou ou kestyon.

So tou bann *case* ilegal ki nou'n travay avek ziska Ozordi tou bann bato ki nou'n tyonbo nou'n vann li *through public auction*. Normalman nou vann li swiv prosedir kot en *auctioneer* i ganny apwente par Minister Finans i vin fer sa *public auction*. Parey nenport ki *asset* ki ganny sezi apre en *proceeding* legal. Mersi bokou.

Kot i konsern bann larzan, ki ganny anmase pou sa bann *auction* sa bann larzan i reste ek *SFA* me selman i annan de ka kot par egzanp dan sa dernyen ka kot ti *involve* bann bato Sinwan, en bon porsyon sa larzan ti ganny peye avek *Coast Guard*;- \$50mil ti ganny rann avek *Coast Guard* pou kouver bann kou operasyonnel.

E osi i annan bann letan kot si Lakour in donn en lord ki nou bezwen pey *fine*, i annan en *fine* pou peye avek *proceeding* sa *auction* sa larzan osi i ganny servi pou pey sa *fine* avek Lakour as per bann *courts order* ki sorti apre sa bann *case* in fini. Mersi bokou.

### **MR SPEAKER**

Mersi nou ava kapab *move on*. Onorab Mondon.

### **HON TERENCE MONDON**

Mersi Mr Speaker. Mon keston i lo size finansman,

depans ki *SFA* i bezwen fer ler i annan atrap sa bann bato ilegal. Si kapab dir nou ki nivo logmantasyon nou pe vwar dan sa bann aktivite parey? Konbyen pe kout *SFA*? E ki bann depans ki *SFA* i bezwen antreprann an zeneral? Mersi.

### **MR SPEAKER**

Mersi Onorab. Minis Mr Louys.

### **MANAGER CONTROL & SURVEILLANCE JOHNNY LOUYS**

Mersi bokou Mr Speaker. Mersi bokou Onorab pou ou keston. dernyen *assessment* ki nou'n fer nou'n pran bann *data* depi 2010 ziska 2020 nou'n vwar en *increase of 8 times* en *8 fold increase* dan bann lensidan kot nou'n atrap bann bato ilegal *between that period*.

E dan sa *8 fold increase* in ariv zis dan sa dernyen 3an 4an *between 2010 today*.

Kot i konsern depans ki nou fer, sa evidaman in *increase* kantite depans ki nou fer avek sa bann bato. E dernyen statistik kot nou annan pou depans, bann *case* ki nou'n *deal* avek *between 2019 a 2020* in kout *SFA* R1.4 milyon pou *deal* ek sa bann *case*.

Sa i enkli tou bann depans kot i konsern donn manze parey

Minis in dir. Bann fasilite sanniter e osi i annan bann leka kot nou bezwen *expatriate* sa bann dimoun swa donn zot landrwa pou reste.

So tou sa bann depans ki nou'n *incur* in ariv apepre 1.4 a 1.6milyon Roupri pou *SFA*. Mersi bokou.

**MR SPEAKER**

Byen Onorab Pillay.

**HON SEBASTIEN PILLAY**

Mersi Mr Speaker. Mr Speaker sa kestyon i koz lo lapas ilegal e i annan en keksoz osi ki nou bezwen admet.

Eski *SFA* in rankontre ka kot menm peser Seselwa pe lapas dan bann *Zone* kot zot pa sipoze pe lapas? Par egzanp nou konnen Mahé Plato i ganny dezinyen pou serten lapas e lot kalite lapas.

E eski *SFA* pe pran mezir sirtou an se ki konsern Mahé Plato kot i annan lamazorite bann lespes demersal parey bourzwa e lezot? Eski *SFA* pe pran mezir ki bann bato ki ganny atrape oubyen pou pe ganny atrape dan sa *Zone* pe lapas en fason ilegal zot annan fason pou *deal* avek sa sityasyon ler i arive?

Akoz souvandfwa se sa menm konsern enn bann konsern ki gannyen. Se ki

bann bato i antre dan Mahé Plato zot lapas, apre zot sorti. So eski i annan fason pou zot *monitor* sa?

E dernyen an pasan dernyen pti kestyon Mr Speaker, eski i lentansyon *SFA* par egzanp lo lakot, bann *Zone* kotyer kot nou vwar en kantite bann i annan *recreational angling* ki pe arive.

Me i annan osi en kantite etranze konmela ki al lapas pou *sustenance* lo lakot.

Eski i lentansyon Departman Lapas pou entrodwir parey nou annan dan lezot pei, serten landrwa kot i ava *recreational angling* strikteman *cash and release as oppose to* pran pwason, oubyen kot i ava annan bann "*No Fishing*" signs ki ganny mete? Mersi Mr Speaker.

**MR SPEAKER**

Mersi. Minis *Manager* yes.

**MANAGER CONTROL & SURVEILLANCE JOHNNY LOUYS**

Mersi bokou Mr Speaker. Mersi bokou Onorab pou ou kestyon. Kot i konsern lapas lo Mahé Plato bann bato lokal i annan en klas bann bato lokal ki pa otorize pou lapas lo Mahé Plato e bann zil ki en pe *shallow* parey nou dir.

Sa bann bato i bann bato ki tonm dan plas *semi-industrial*. E tou a bann bato i mandatwar pou zot annan bann sistenm *VMS*. So nou konnen a tou moman kote zot pe lapes kot zot in fer zot aktivite ... e si zot *intrude* dan sa bann *Zones*.

Ler i ariv dan leka kot wi zot antre zot fer bann lapes ki pa'n ganny otorize pou lapes, i annan bann rekour legal ki nou kapab pran. *In fact* zis konmansman sa lannen depi ler nou'n entrodwir bann nouvo mezir kot i konsern sa bann bato.

Nou'n annan pa mal ka kot in arive kot nou'n bezwen *deal* avek sa bann peser ki'n *involve* dan sa bann lapes lo Mahé Plato.

Nou annan bokou detrwa ka ki nou'n *settle out of court* mon pa ankor vwar en ka kot nou'n anmenn Ankour be selman i annan bokou ki nou'n *settle out of court* vi ki bann dimoun e bann *first time offenders* zot vin zot in pey en *fine* avek *SFA through* sa.

So nou annan pa mal mezir pou fer sir ki bann bato i pa lapes dan sa bann *Zone*. Nou'n fer bokou ledikasyon osi avek sa bann peser konsernen *through* bann konsiltasyon ki nou'n fer, pou fer sir ki bann

bato ki ganny *designate* pou pa lapes lo bann Mahé Plato e osi bann lezot *shallow areas* pa antre dan sa bann landrwa.

E osi *update* en pe zot bann kondisyon, pou fer sir ki ler zot fer sa nou kapab annan bann rekour bann pinisyon ki nou kapab *apply*.

Kot i konsern sa kestyon *recreational angling*, parey mon'n mansyonnen pli boner, nou annan sa plan zesyon ki nou pe travay lo la. *Actually* in fini travay lo la nou dan bann staz pou finaliz son regilasyon.

Kot i pou *regulate* bann Lapes rekreasyonnel *including* pou bann *foreigners* ki pe fer *angling*. Nou pou *set-up* en *framework* kot nou pou eksplik petet bann dimoun ki etranze, ki kalite lapes zot pou fer ki kalite lapes ki zot pa pou kapab fer.

E apre si nou pe les zot fer lapes kantite zot pou kapab tyonbo osi, *ok?*

E sa bann mezir i form par bokou plis mezir ki zot in mete anba sa plan zesyon lapes pou Mahé Plato, ki pou konsern bokou bann lapes rekreasyonnel osi lo lakot. Mersi bokou.

**MR SPEAKER**

Mersi *Manager*.  
Esparon.

Onorab

**HON REGINA ESPARON**

Mersi Mr Speaker. Mr Speaker letan Mr Louys ti pe reponn kestyon pli boner i dir poudir an se moman i annan 3 case ki ankor Ankour, savedir sa 3 bato i ankor isi Sesel.

Anviron konbyen lekipaz zot annan lo sa bato? Mon mazine apepre en 6 a 7 par bato ou ava dir nou.

E kwa ki leka i depanse lo zot? Ou'n dir zot pey pou bann zafer manze. Me eski Leta i pey osi pou zot, Avoka pou defann zot? Parske letan zot al Ankour? Ou'n dir pli boner ki sa valer sa bato pa donn zot gran valer letan ou'n vann sa bato.

Eski sa larzan ki zot rekipere avek sa bato letan zot vann i ase pou kouver depans ki zot in fer lo sa bann dimoun letan zot isi? Mersi.

**MR SPEAKER**

Mersi Onorab. Lekel ki pou pran Mr Louys.

**MANAGER CONTROL & SURVEILLANCE JOHNNY LOUYS**

Mersi bokou Mr Speaker. Mersi bokou Onorab pou ou kestyon. Kot i konsern bann *expense* ki nou'n fer mon'n mansyon en pe boner, i plito wi pou bann zafer

manze. Si i annan de ka kot nou bezwen tir zot lo bato nou bezwen donn zot landrwa reste. Apre i annan bokou bann kou ki asosye ki nou'n *incur in the past* kot i konsern pou repatri sa bann dimoun ler nou'n fini *deal* avek sa bann case.

Parey ou konnen ler nou aret en bato sa kaptenn ki ganny sarze pou ganny lofans lapes ilegal. So ler nou'n fini avek sa bann *crew* nou bezwen rod en mannyer pou fer zot tourn dan zot pei.

E dan laplipar ka *SFA* ou Gouvernman in bezwen vwar li pe *foot* sa bann bil akoz nou pa vwar bann *owners* ki annan sa bann bato. *Once* sa bann dimoun in ganny atrape zot abandonn sa bann dimoun. So nou bezwen *incur* sa bann *cost* koumsa.

Lo kote Avoka normalman leta pa *SFA* pa *incur* okenn bil, selman mon konnen poudir sa bann dimoun i benefisyé atraver bann *Legal Aids* ki zot annan drwa annan, parey nenport ki dimoun ki pa kapab *afford* en defans.

**MR SPEAKER**

Mersi Mr Louys pou sa repons. E mersi Minis. E nou ava bouz lo prosen kestyon Onorab Egbert Aglae.

**HON EGBERT AGLAE**

Mersi Mr Speaker. Kestyon *comme* swivan;-

Eski Minis i kapab dir ek sa Lasanble swivan vizit e diskisyon ki'n deza fer dan lepase, lo sa size *storage facilities* pou bann peser Port Glaud, kan eski nou kapab annan en finalite lo sa proze? Apre bann konsiltasyon ek bann *partner*? Mersi.

**MR SPEAKER**

Mersi Onorab. Minis.

**THE DESIGNATED MINISTER****MR JEAN-FRANCOIS FERRARI**

Mersi Mr Speaker. Mersi Onorab Aglae. Onorab parey ou konnen par leksperyans, napa naryen lo sa later ki vin sitan fasil, oubyen ki vin otomatik.

Dan politik perseverans i vremen endispansab pou en zour ganny sa ki ou pe rode pou ou bann dimoun. Mon bann spesyalis dan Departman Lapes in konfirman avek mwan, ki en pe lannen pase ou ti fer en demann pou ki Gouvernman i asiste distrik Port Glaud, avek en fasilite pou bann peser sa distrik.

Dapre konpran e (ou ava koriz mwan ti en striktir ki ti pou ganny konstri dan bor sa pti laplenn foutbol lo semen ki

al Port Launay. Mon'n ganny dir ki dan sa diskisyon ki zot ti pe annan, ti annan en sizesyon ki distrik ki kapab ganny sipor avek en investiser prive pou ede dan sa fasilite.

Malerezman pou en rezon oubyen pou en lot, sa diskisyon pa'n kontinyen e depi detrwa lannen i paret ki sa proze in ganny bliye.

Mwan sa ki mon rapel se en demann (ler mon ti Manm Lasanble) se en demann pou repar en *slip* an fas Legliz Katolik. Sa osi ti en demann. Ou a koriz mwan si mon mal.

Me pou nou klarifye sa pozisyon mon ti ava kontan envit ou alors, pou zwenn ankor avek nou, pou nou relans sa proze.

Akoz pou sa lannen i pou difisil, nou konnen poudir nou dan en lannen difisil. Me akoz nou pa pe vwar en gran finansman me nou konsyan ki bann peser Port Glaud i osi bezwen partisip e benefisye dan bann zefor devlopman ki nou pe fer.

E ki i merit en lenfrastriktir ki parey partou dan Sesel ki fer zot lavi en pti pe pli leze, en pti pe pli konfortab. E *gear store* se bann keksoz ki nou pe ankouraze dan bann distrik pou en dimoun pa bezwen transport son masin e

son lekipman tro lwen lo son ledou, oubyen lo son latet.

Alors bann diferan Lotorite, in pran dan diferan distrik plizyer bann pt mezir pou asire ki sa bann keksoz i arive.

Dan distrik Port Glaud mon osi ganny dir ki Port Launay in annan en pti latansyon, pou fer sir ki bann bato ki mouye la i an sekirite eksetera. Me la osi naryen pa'n napa gran devlopman lenfrastruktir ki'n ganny fer.

Alors parey mon'n dir pli boner, mon repet sa lapel ki mon'n fer, pou nou re angaze. E mon konnen poudir nou annan en lekip devlopman bann proze distrik ki tre dinamik.

E ler ou ava pare nou ava gete ki mannyer nou kapab get sa bann detay e gete ki mannyer nou kapab asiste pou lavenir. Mersi Mr Speaker.

### **MR SPEAKER**

Mersi. Onorab Aglae ou ava donn en pti lesplikasyon dan ou kote e okenn klarifikasyon. *Carry on.*

### **HON EGBERT AGLAE**

Minis mersi pou ou larepons e sa lenvitasyon i osi enportan ki nou re angaze. Petet zis premye lenformasyon sa lo size sa *ramp*

in fini ganny organize sa. *Ok?* Sel demann Minis se ki mon krwar i enportan pou sa lendistri, akoz mon'n vwar ou ou'n koz bokou lo la dan bann *statement* ki ou'n fer.

E size lenfrastruktir i enn ki atir dimoun pou vin dan sa sekter osi ki ankouraz lezot pou kontribye osi.

So mon krwar avek letan malgre sityasyon ekonomik Minis, nou konmans relans sa diskisyon sa lannen, en mannyer si lannen prosen Bidze i permet *then*, nou ava vwar solisyon ki nou kapab fer li vin en realite. E sa mon pou donn ou mon sipor mwan osi. Mersi.

### **MR SPEAKER**

Mersi. Minis eski ou bezwen azout keksoz nou *ok* la? Tre byen nou ava bouz lo prosen kestyon, Onorab Esparon.

### **HON REGINA ESPARON**

Mersi Mr Speaker. Eski Minis i kapab donn nou en kontrandi lo negosyasyon pou ganny en morso later, pou konstrir fasilite *gear store* pou bann peser dan distrik Glacis, e donn nou en pe detay lo son finansman? Mersi.

### **MR SPEAKER**

Mersi Onorab. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Mersi Mr Speaker. Mersi Onorab Esparon. Mon annan en plezir pou enform ou ki parey nou ti'n agree *Attorney Zeneral* Mr Frank Ally in soumet pa pli tar ki semenn pase, (donk ki vreman dan nou aktyalite la), pa pli tar ki semenn pase, Mr Frank Ally in soumet avek madanm defen Msye Mancham en *draft Framework Agreement* pou son konsiderasyon.

Pou benefis Lasanble lezot Manm ki pa konn sa ki nou pe koz lo la se en sityasyon kot en konstriksyon in ganny fer lo later lafanmir Mancham, e i annan konfizyon ki mannyer i ganny peye, kan in ganny peye akoz pa'n ganny transfer, akoz pa'n ganny *survey*? Eksetera.

Donk tou dimoun in tonm dakor nou agree lo tou bann gran laliny, me selman parey zot konnen ler i annan en kestyon leritaz avek bann zeritye, i bann prosedir en pe long.

Alors *Attorney Zeneral* in byen mon'n byen apresye ki in pran sa dan son lanmen. E i pe fer sa travay.

Alor in soumet sa avek Mrs Mancham en *Framework*

*Agreement*. Si nou agree, apre ki sa i ganny diskite avek tou bann zeritye. Akoz i annan en bon pe zot i annan bann zot ki pa Sesel.

Me ler sa i pou ganny fer e si bann zeritye i agree, nou pou kapab avanse fer sa demarkasyon e detas sa bout sa kare ki Gouvernman in deza pey Mr Mancham, e answit konmans konstri en nouvo *gear store* dan bor sa enn ki egziste.

Ou alor gete ki mannyer nou kapab amelyor sa enn, oubyen repar li oubyen *improve* li sa i bann konsiderasyon ki nou pou fer de ki sa transfer i ganny agree.

Sa konstriksyon byensir i pou enkli parey ou konnen Onorab, en miray pou separ evantyelman tou le de propriyete akoz sa i en demann ki lafanmir Mancham in fer. E reparasyon sa bann stor parey mon'n dir.

E konstriksyon detrwa nouvo. Me osi en semen, en semen pou antre, sorti dan sa landrwa, akoz i enportan ki nou permet akse dan sa landrwa. Akoz i bann peser i kapab antre avek en transpor pou zot kapab fer zot bann aktivite.

Alors Onorab wi aprezan dan kort lafanmir Mancham. Vi ki sa i pa tro en gro proze e vi ki peser Glacis mon krwar ou ava

dakor avek mwan in plizoumwèn byen pase sa enn de lannen. Mon krwar taler ou ava reponn ou ava dir mon wi.

Vi ki bann peser Glacis in plizoumwèn byen pase ki nou'n kapab fer en zoli proze pou zot, mon asire ki zot pou annan en pti pe pasyans. Me selman la i bon ki zot konnen poudir keksoz pe bouze e annan en pti pe pasyans e esper nou fer sa travay.

Finansman Onorab pou sorti dan *Sectoral Support Fund* avek dan larzan Linyon Eropéen parey laplipar sa bann pti proze distrik ki nou pe fer.

Alors mon remersye ou pou ou langazman kontinyel vizavi bann sa group peser oubyen bann peser an zeneral dan Glacis. Mersi bokou.

### **MR SPEAKER**

Mersi. Onorab Esparon ou annan siplemanter?

### **HON REGINA ESPARON**

Mersi bokou Mr Speaker. Lo mon kote osi mon e remersi Minister Lapes ek *SFA* dabor pou travay ki'n deza ganny fer.

Me eski Minis i kapab dir nou, ki dan sa devlopman i osi annan plan pou en pti bazar pou fasilite bann peser, e osi bann fermye pou vann zot prodwir?

Mon konnen sa pa ti dan plan orizinal, me selman i en keksoz ki letan sa premye faz i ganny fer, nou'n vwar ki kekfwà i pou benefisye peser avek bann dimoun ki vann bann legim, eski sa i pou ganny materyaliz sa lannen? Mersi Mr Speaker.

### **MR SPEAKER**

Mersi Onorab.

### **THE DESIGNATED MINISTER**

#### **MR JEAN-FRANCOIS FERRARI**

Mersi Onorab. Mersi Mr Speaker. Sa lannen sertenman non. I nou bann finansman in fini ganny determinen kot zot pou ale. Me selman en nou konsyan ki ou pe demann sa fasilite, e dek konman nou ganny premye loportinite, nou ava get dan sa posibilite.

Parey mon'n dir ou pli boner nou'n fini en proze ase enportan. E nou konnen poudir sa *gear store* sa proze i enportan. Nou ava fer sa avan, e apre nou ava al dan lezot distrik Onorab aköz i annan lezot ou bann koleg osi ki pe espere.

So nou ava sey al o pli vit posib e apre vini, e fer sa fasilite ki mon krwar bann dimoun Glacis i ava apresye. Mersi.

**MR SPEAKER**

Mersi. An zeneral nou pa ti pou pran kestyon siplemanter sorti kot lezot Manm, me Onorab Pillay ou annan en kestyon ki ase vit ki nou kapab pas lo la.

**HON SEBASTIEN PILLAY**

Wi Mr Speaker. Mersi Mr Speaker prenon kont ki sityasyon pa pou kapab amelyore *until* ki zot ganny sa lagreman. Eski ou Minister i kap konsidere travay avek *SLTA* pou fer met en pe bann *signage* par lefe ki bann peser i bezwen koup semen, sirtou ler zot antre en pe tar dan 6er, 7er?

E sa *stretch* semen sirtou aswar zot annan transpor ki desann ase vit, pou ki zot kapab ganny alerte poudir sa bann peser zot bezwen *cross* semen pou zot al lot kote semen pou al anmenn zot bann lekipman an se moman.

E si ou Minister i kapab reste angaze avek Departman Lanvironnman pou ki zot *monitor* lenpak ki *backwash* pe fer ki fer sa de miray? Akoz i pe kontinyen retir sa disab pou li fer son mouvman.

E ler i tir sa disab i ekspoz sa bann parve, e nou konnen ler sa bann *fibreglass* i antre si zot kros anba sa bann parve i kapab andomaz sa bann bato,

par lefe ki peser i bezwen servi bann *winch* pou fer mon te zot bato. Mersi Mr Speaker.

**MR SPEAKER**

Minis ou ava kapab adres sa?

**THE DESIGNATED MINISTER  
MR JEAN-FRANCOIS  
FERRARI**

Wi mersi bokou Mr Speaker. Mon vreman enpresyonnen. Mon vwar poudir Onorab Lopozisyon pe met li pare pou li met kandida dan prosen eleksyon,

*(laughter)*

**THE DESIGNATED MINISTER  
MR JEAN-FRANCOIS  
FERRARI**

... ki vreman en zoli perspektiv e Onorab Esparon pou al ganny en *game* me ou bann propozisyon i bon e nou ava fer le neserer. Nou sa problemm lerozyon *backwash* i en problemm ki otour nou lakot i en pe partou.

Ki mon mazine zot dir mwan disab i ale vini. Nou ava gete ki mannyer nou fini sa vandswet. E si nou fini li byen, e ki nou lapas ki nou'n reouver i ankor fonksyon byen, nou ava satisfere. Si non nou ava gete ki mannyer nou kapab fer okenn

*remedial action* a lavenir.  
Mersi.

**MR SPEAKER**

Mersi. Mon annan kestyon Onorab John Hoareau ki pa dan lasal ozordi, wi eski in *delegate* ou pou demann son kestyon?

**HON REGINA ESPARON**

Wi Mr Speaker.

**MR SPEAKER**

Ok tre byen Onorab Esparon.

**HON REGINA ESPARON**

Mersi Mr Speaker. An vi ki i annan bokou konsern lo stok ton lezel zonn e soustenabilite leksplwatasyon lapès ton par bann sener, eski Minis pou Lapès i kapab dir sa Lasanble: ki vre sityasyon nou stok ton dan nou delo? Dezyenman ki bann mezir ki son Minister i anvizaze pran oubyen in fini ganny met an plas pou zer nou stok ton dan en fason soutenab? Mersi Mr Speaker.

**MR SPEAKER**

Mersi Onorab. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Mersi Mr Speaker. Mr Speaker mon kontan sa kestyon aköz i

ava permet nou i ava permet mwan eksplik en sityasyon lo stok ton ki enportan ki tou dimoun i konpran.

Mr Speaker tou ton parey nou konnen i en nespes migratwar. Annefe anba Konvansyon Nasyon Ini lo Lagreman stok pwason 1985 *the United Nation Fish Stock Agreement*, bann lapès ton enkli *yellow fin* ki nou annan Sesel e nou apel ki nou apel ton zonn i ganny klasifye konman bann pwason *highly migratory*.

Savedir sa bann pwason pa reste dan en sel labita. Me zot migre e toultan an mouvman atraver plizyer *Zone Eksklisiv Ekonomik* bann pei. E osi an lot mer.

Dan Losean Endyen sa i depi lakot les *L’Afrique* ziska *was L’Indonesie*, e *was Australie*, e dan nor ek sid lekwater dan bann delo tropikal parey dan kannal *Mozambique* ziska *Somalie*. E dan sid was Losean Endyen. La i la sa landrwa kot sa ton imigre.

Sa i fer ki okenn pei tousel ofisyel pa kapab fer *stock assessment*. E sa bann ton dan zot delo, aköz sa ton pa pou zot menm si i pas atraver zot delo.

So mon ti ava kontan zis fer en keksoz byen kler. Ton i pou nou ler i dan nou delo, si nou pa tyonbo li dan nou delo i

al dan en lot delo enternasyonal oubyen dan en lot pei, i pa pou nou.

Alors menm si nou vwar bann bato ton pe lapés dan Losean Endyen i vin anmenn ton dan Por, i pa neserman nou ton sa. En pe i pou nou aköz in ganny lapés dan nou delo. Me en bon pe pa nou osi *ok?*

Alors annou pran sa lokazyon pou nou eksplik byen tou dimoun ki ton i pou nou ler i dan nou delo. Bann lorganizasyon enternasyonal tel ki *IOTC* ek bann sa ki nou, nou apel bann *RFMOs* bann *Regional Fisheries Management Organisations* in ganny kree pou ki kolektivman bann pei ki dan losean e ki bord losean, e bann ki lapés sa bann ton kot zot migre, i annan responsabilite pou anmas sa lenformasyon.

Pou ki Komite Syantifik Lorganizasyon *IOTC* i kapab kolektivman fer bann analiz e resers pou evalye stok ton dan Losean Endyen dan son totalite. Savedir nou, nou pa kapab evalye stok ton nou. I tou bann *data* ki ganny fer ki ganny pran par tou bann lezot pei e tou bann lezot lorganizasyon, pou nou mt ansanm pou nou kapab analize gete ki nou krwar son stok i ete.

I annan pei ki fer li byen parey Sesel. Mon fyer poudir ki Sesel i en sanmenm sa pei kot nou raportaz lo ton ki ganny lapés ki ganny *transship* ki ganny debarke ki al kot *IOT* i vremen ganny fer. I annan serten pei pa fer napa okenn lenformasyon lo la. E sa i enn bann dezakor.

Me dernyen rapor Komite Syantifik *IOTC*, ki ti pibliye an 2020, in estimen ki stok ton zonn dan Losean Endyen, i ganny klasifye "*overfished and subject to overfishing.*"

Dapre a rapor Komite Syantifik an 2019, 427mil tonn ton zonn ti ganny lapés. E an 2015 a 2019 an mwayenn 424 mil tonn ti ganny lapés.

E rekomandasyon sa Komite, pou Komisyon ton Losean Endyen, se ki lakantite ton zonn ki merit ganny lapés dan Losean Endyen par an i merit 403mil tonn.

Sa bann dernyen *assessment* syantifik. 403mil tonn si ou lapés 403mil tonn oubyen anba 403 i devret kapab permet en *rebuilding of the stock* i kapab en lapés soutenab.

Alors nou pa nou ki deside konbyen nou devret apes ,me nou pran bann sif ki Komite Syantifik i donn nou e Komite

Syantifik in donn nou 403mil tonn e nou'n aksepté.

Parkont i annan serten pei ki pa'n aksepté notaman *L'Indonesie* rezon pou zot mon krwar *Oman* osi pa'n aksepté, me selman zot pa kapab fer nanryen. Akoz mazorite in dakor ki 403mil tonn par lannen.

Alors sa Oktob sa lannen, bann group travay syantifik *IOTC* pe rankontre ankor. Pou fer nouvo *stock assessment*, e Komite Syantifik *IOTC* pou rankontre an Desanm sa lannen pou donn zot rekomandasyon lo en nouvo *assessment* ki pou ganny fer.

Avek sa nouvo rezilta, Komisyon *IOTC* i ava decide dan son rankont lannen prosenn ki bann mezir ki an plas;- setadir bann ki'n ganny adopte sa lannen si zot sifi, oubyen si i pou annan nouvo mezir. Oubyen si zot pou kapab *relax* sa bann mezir, si zot kapab met nouvo restriksyon oubyen tir bann restriksyon ki egziste. Sa se Komite Syantifik ki pou decide.

Mon anvi fer resorti ki bann syantis Lotorite Lapes Sesel, *SFA* i osi partisip aktivman dan sa bann analiz. Akoz nou, nou bezwen defann nou pozisyon.

Akoz *SFA* li menm i anmas bokou lenformasyon, lo lapes ton, lo zot sa ki nou sa ki ganny anmennen ki kalite ki ganny debarke eksetera.

Alors lo premye parti kestyon Onorab Hoareau larepons se ki i annan en evalyasyon permanan bann stok. E nou konman en Pei Manm Komisyon Ton Losean Endyen ziska prezan nou'n aksepté evalyasyon fer par sa Komite Syantifik. E nou'n respekte zot bann *figures* ki zot in donnen.

E sa bann stok ki zot pou desid lo la nou konnen i ankor kritik. Me nou osi aksepté ki i annan bann mezir tel ki kota strik, e lezot mezir zesyon ki bezwen ganny aplike.

Alors i annan bann lezot mezir asosye avek sa program tel ki: limitasyon lo fad, limitasyon *supply vessels*, eksetera.

Alors nou stok si mon kapab dir i mon repete nou stok i ki mo mon ti servi "*overfished and subject to overfishing.*"

Me selman mon pa oule azoute ki dapre nou *assessment*, Sesel li i respekte son kota me i annan lezot pei ki pa respekte sa kota. Alors se pou sa ki sityasyon i en pe pli grav.

Lo dezyenm parti kestyon, ki bann mezir ki Minister Lapes i anvizaze pran, oubyen ki'n fini pran pou zer nou ton zonn dan fason soutenab?

Mon redir ankor i pa pou nou sa ton zonn en. Me selman la i la ki mannyer sa kestyon i demande. Alors larepons se an 2017 ler rezolisyon *IOTC*, 1601 pou rekonstri stok *yellow fin* dan Losean Endyen ti vin an fors, nou'n konmans etabli bann kota.

Bann limit alors par bato, pou bann bato ton sener, ki sa rezolisyon ti spesifikman aplik pou zot dan nou konteks. E nou, nou annan de group sener;- nou annan group sener Linyon Eropéen, ki annan paviyon Linyon Eropéen e nou annan group sener ki i annan paviyon Sesel *ok*?

E nou, nou ziridiksyon i lo pou fer sir ki kota ki ganny donnen avek bann bato ki bat paviyon Sesel i ganny respekte. Si *SFA* alors in etabli bann mezir e bann rapor lenformasyon e statistik pli regilye. E verifikasyon entern pou fer sir ki tou bato i respekte sa limit ki zot in gannnen.

Ler mon dir fleksibilite i en mo ki parler bann syantis pa kontan. Me mon ti ava kontan dir i annan fleksibilite par *SFA* pou met an plas bann mezir

pou fer sir ki bann lakonpannyen bato i reste aktiv, e dan sa limit ki *IOTC* in *allocate*.

E pou nou bann ki bat paviyon Sesel i annan 33 mil 211 tonn par an, depi 2017 ziska 2020 e la in ganny aziste en pti morso an montan pou lannen 2021.

Sa sif 33mil tonn ki nou'n servi ziska sa lannen i reprezant en *base* 15poursan lo nou lannen referans, ki sa rezolisyon ti aplikab pou nou.

So nou Sesel nou'n aksepte en rediksyon 15poursan. Akoz e nou'n fer sir ki bann bato sener osi i aksepte sa rediksyon. Akoz nou nou'n aktivman angaze dan protez sa stok.

I annan dimoun ki pe mazine poudir sel group ki pa fer okenn zefor se bann bato sener. Zot fer zefor zot osi. E nou fors zot fer zefor. I en metod lapes ki si nou fer li byen i pou soutenab.

I annan dimoun ki'n dir ou ki lapes e lasenn pa soutenab ditou i detri tro bokou, manti. I annan bann mezir ki ou kapab pran e nou nou'n pran isi Sesel e nou pe fer en kantite progre pou nou annan bann nouvo mezir an plas ki ede pou fer ki sa lapes i soutenab.

SFA in osi annan sa bann dernyen moman fer bann lesey lo bann bato pou entrodwir sistenm rapor elektronik;- *electronic reporting system* la i la en lot mezir ki Onorab Hoareau pe demande ki modern, e ki pou anmenn nou lapes dan en direksyon soutenab.

I annan osi sirveyans (ERS) *Electronic Monitoring System, Electronic Reporting System* e sa letid i osi ganny fer lo nou bann bato *industrial longliners* parey Mr Louys in dir zot pli boner.

E plan Lotorite Lapes se pou deplway sa de teknolozi lo tou sa bann bato tre byento.

SFA i osi pe travay lo en plan pou amelyor zesyon *fads* ek *bycatch*. Sa i de keksoz ki nou pe travay lo la akoz i de keksoz en pe kontroversyel bokou kontroversyel.

An plis ki sa ansanm ek SFA Minister Lapes pe travay pou devlop en plan amenazman, en *management plan* pou nou lapes ton.

Sa i fer ki nou ava annan en stratezi Nasyonal lo devlopman e amenazman resours ton pou tou bato ki lapes dan nou delo. Enkli bato Sesel e enkli bato etranze, e osi nou bann bato ki anrezistre

Sesel ki lapes an deor nou *Zone Eksliziv*.

Dan devlopman sa plan, nou pou byensir fer an konsiltasyon ek bann parti prenan dan lendistri.

Pou terminen Mr Speaker en plan e priyorite sa Gouvernman se ki dan plas lapes plis, nou devlop plis fasilite transformasyon pou nou pwason. Esansyelman sirtou pou nou ton. Se pou sa rezon ki Gouvernman in demark en *Zone Ile Du Port* konman *Fish Pocessing Zone*.

Sa se pou fer sir ki dan plas ki lamazorite ton ki ganny lapes dan nou delo i dan Losean Endyen, i ganny transborde dan nou Por kot nou zis anmas en *transshipment fee* nou. Nou ava kapab annan plis lizin lokal, pou fer plis valer azoute tel ki *loins, pre-cooked, steak*, eksetera pou anmenn plis devlopman ekonomik dan sektor lapes e pou nou pei.

Andotmo e mon ava konklir lo la e dan en fason senp, nou moto se;- "Fer plis avek mwens," Ganny plis reveni san ki nou bezwen lapes plis sa resours." La i la nou stratezi i en stratezi ki baze ki en stratezi ekonomik, me ki baze lo en fondasyon anvironnmental ki mon krwar ki si tou le de bout i marse nou pou fer en bon pe

sikse. E nou stok ton pou kapab ganny soutenir pou bann lannen a lavenir.

E mon repet ankor e mon demann zot sipor lo la, akoz i annan bokou dimoun ki pa vwar tou le de kote sa *coin*. Nou bezwen lapès. E mwan mon'n ganny anploye pou mon devlop lapès. E lapès nou pou devlope, nou pou lapès.

Me selman nou pou lapès byen. Nou pou lapès avek bann meyer prensip. Nou pou lapès avek bann metod ki bon pou soustenabilite nou lespes. Me selman nou pou lapès, akoz sa i en resours ki parey mon'n dir zot si nou pa pran li, en lot dimoun pou pran li.

Alors annou profite ki Bondye in donn nou sa zoli resours, pou nou kapab fer sa travay e pou nou kapab larises ek devlopman pou nou pep. Mersi Mr Speaker.

### **MR SPEAKER**

Mersi Onorab Esparon i annan siplemanter?

### **HON REGINA ESPARON**

Yes Mr Speaker mersi. Mr Speaker eski Minis i kapab dir nou si *SFA* in fer en letid lo lezot lespes ton pou vwar si zot stok pa osi an danze *overfishing* sirtou bann lezot ki *IOT* i osi

*process* parey *skipjack* ki napa kota lo la?

E lo kote kot i konsern *bycatch*, konbyen *fish processors* ki pe *deal* avek *bycatch* an se moman? Mersi Mr Speaker.

### **MR SPEAKER**

Mersi. Minis.

### **THE DESIGNATED MINISTER** **MR JEAN-FRANCOIS** **FERRARI**

Wi Mr Speaker la kekfwa ou ava bezwen pardonn en pti pe, akoz sa i en kestyon ki ase teknik. Mon konnen poudir in annan en *assessment* lo *skipjack stocks*.

Mwan mon lenformasyon se ki sa stok pa pe fer tro mal *ok*. Me i *still* anba *microscope*. Me selman mon ti ava kontan la ki zot pran sa lenformasyon avek bokou prekosyon, akoz mon pa anvi *mislead* Lasanble. Si ou ti ava kontan Onorab ki mon reponn ou an ekrir pou mon donn ou *assessment* pou sa bann lezot kalite ton, mon ava donn ou.

Me la a sa moman vi ki pa ti la nou ti pe koz zis lo ton zonn, mon pa'n anmenn sa bann statistik avek mwan alors avek ou permisyon Mr Speaker mon ava donn Onorab en repons an ekrir. Mersi.

**MR SPEAKER**

Mersi. E lo *bycatch* osi ou pou ...?

**THE DESIGNATED MINISTER****MR JEAN-FRANCOIS FERRARI**

E lo *bycatch* osi wi.

**MR SPEAKER**

Tre byen. Bon nou ava pran enn de siplemanter sorti kot lezot Manm? Onorab Pillay.

**HON SEBASTIEN PILLAY**

Mersi Mr Speaker. Mr Speaker si mon ti pe si mon pa ti pe tann sa ki mon ti pe ganny dir mon ti krwar mon dan en sok. Akoz apre ki mon'n ekout Minis Ferrari in totalman kontrandi tou sa ki i ti dir ler i ti dan Lasanble, e dir nou ozordi en lot keksoz.

So ozordi nou ton i pa nou ton, *purse seiners* pe fer sa ki bon. So esansyelman mon annan zis en kestyon pou Minis. Minis Ferrari ou ti fer en *commitment* ki Sesel pou re negosye sa Lakor Lapes avek Linyon Eropeen.

Eski Sesel pe al re negosye sa Lakor Lapes avek Linyon Eropeen? Par lefe ki *yellow fin tuna* i osi en konponan dan sa Lakor Lapes? Mersi Mr Speaker.

**MR SPEAKER**

Mersi. Minis ou ava adrese.

**THE DESIGNATED MINISTER  
MR JEAN-FRANCOIS  
FERRARI**

Mersi Mr Speaker. Mr Speaker nou annan en Lakor Lapes ki pa bon e mon krwar ki i ti ava en bon lokazyon pou Onorab *Leader* Lopozisyon aksepte ki son Gouvernman in fer en move Lakor.

E ki nou'n ganny anmare, nou'n ganny anmare lo plizyer pwen dan sa Lakor, me sa Lakor se en Lakor. Ler en Leta Souveren i siny en Lakor i bezwen respekte.

Son moman pou re negosye sa Lakor se dan *mid-term review* setadir 3an apre ki Lakor i rantre dan an aplikasyon. Savedir an 2023 i pou lemoman pou nou al kot Linyon Eropeen oubyen Linyon Eropeen i vin kot nou, pou nou kapab gete si i annan serten keksoz – (e pa tou keksoz ki nou pou kapab re negosye), si i annan serten keksoz ki nou kapab re negosye e gete ki manner nou kapab ganny en pli bon *deal*.

Lo ou kestyon mon'n kontrandi mon lekor. Mon ti ava kontan Mr Speaker dir dan fason tre kler. Ki mwan mon'n

toultan krwar dan lapas ton endistriyel, me selman mon'n toultan dir ki fodre nou fer li avek prekasyon.

Ler Departman Lekonomi Ble in zwenn avek Departman Lapes, bokou dimoun in dir be la ki pou arive, Lekonomi Ble pou anpes ton, pou anpes nou devlop nou lendistri lapas ton, la zot pe al gete pe al fer *restricted Zone*, zot pe al fe zot pozisyon i reste kler Onorab Pillay, nou bezwen lapas e nou bezwen lapas byen e nou bezwen lapas dan en fason soutenab. Sa i toultan e mon pozisyon in konsistan *throughout the years*. Mersi.

**MR SPEAKER**

Mersi. Onorab Cosgrow.

**HON WALLACE COSGROW**

Mersi Mr Speaker. Minis mon kestyon i tre senp, i baze lo larepons ki ou'n donn Onorab Pillay. Minis donn nou detrwa keksoz dan sa Lakor Lapes ki ou santi ki pa byen ki an relasyon avek kestyon Onorab John Hoareau e sel sela sirtou kot i konsernan ton zonn. Donn nou enn de legzanp kwa ki ou santi pa byen dan sa Lakor Lapes? Mersi.

**MR SPEAKER**

Mersi. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Mr Speaker avek ou permisyon, mon ti ava kontan dir avek Onorab ki napa okenn kestyon la lo Lakor Lapes li menm. I annan en kestyon lo bann maren peser sa lot kestyon ki pe vini.

Alors mon pa santi poudir *it's fair* ki a sa moman la mon vin depouy en Lakor devan Lasanble Nasyonal. Si Onorab ou annan en kestyon e ou kestyon i valab *please* met li lo si ou met li avek Lasanble e avek plezir mon ava vin reponn ou kestyon. Mersi

**MR SPEAKER**

Mersi Minis. Nou annan kestyon Onorab Michel Roucou. Onorab.

**HON MICHEL ROUCOU**

Mersi Mr Speaker. Eski Minis i kapab dir ek Lasanble, ki difikilte Gouvernman pe gannyen pou akonpli bann negosyasyon avek Linyon Eropeen, lo size konpansasyon pou bann peser ki'n travay lo bann bato ton pandan plizyer lannen? Mersi.

**MR SPEAKER**

Mersi Onorab. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Mersi Onorab Roucou, mersi. Onorab mon pa pou kasyet ou, ni mon pa pou kasyet avek Lasanble Nasyonal e avek tou Mahé peser ki pe ekout nou, ki negosyasyon avek Linyon Eropéen i vreman long e konplike.

O konmansman mon ti perdi en pe mon pasyans, akoz mon pa ti kapab konpran akoz tou sa bann proze, tou sa bann monte desann tou sa bann *statement* ki Gouvernman oparavan ti fer, tou sa bann lasirans Gouvernman ti donnen, ozordi nou pa pe vwar en fri sa travay me nou pe trouv nou dan en sityasyon kot nou pa pe avanse.

Alors mwan mon'n deside ki kout e kout nou pou bezwen avanse. Ozordi alors mon pran sa lokazyon pou mwan eksplik en pe an detay akoz sa travay i konplike. Premyerman Onorab, Sesel in les sa zafer tro trennen. E zot konnen ki ler lannen i pase e en size kontrovers pa pe ganny met lo latap pou diskite, ouswa personn pa pe zafer Ankour, ouswa personn pa pe kriy lasasen.

Son letan kriye i *expire*. E sa i enn bann problem ki mon

pe fer fas avek. Dapre bann Lalwa lanplwa Linyon Eropéen, i annan serten keksoz ki ou kapab kestyonnen, ou kapab revwar, ou kapab met dan negosyasyon, me i annan keksoz ou pa kapab sirtou ler in depas 10an.

Alors i annan en bout dan sa lakor ki nou pe regarde avek Linyon Eropéen, ki i annan problem avek. Akoz i telman vye napa rikord, rikord pa konplet, lakonpanyen bato in vann, lakonpanyen in fermen, akoz sa bann problem pa'n ganny leve pli boner, akoz sa konpanyen ki'n aste sa bann bato li i pe dir ki zot in aste det ki zot ti konnen. Non pa det ki zot pa ti konnen ki'n ganny mete 10an oparavan.

Tousala i vin bokou, bokou konplikasyon. E nou bezwen etabli en rapor avek Linyon Eropéen pou zot konpran nou sityasyon e pou zot kapab fer en zefor.

Enn bann bon legzanp ki bokou maren pou konnen dan sa bann letan ki'n tarde pou negosye, se kar en bato ki apel '*Toray*' Julia ki ti ganny vann ek *Italien* e la prezan i apel '*Toray*' *Italia*.

I vreman difisil pou ou retourn an aryer pou al gete konbyen '*Toray*' Julia ti drwa e konbyen '*Toray*' *Italia* i drwa

ozordi. Sanmenm sa kalite difikilte ki nou pe fer fas avek. Me diskisyon i kontinyen.

Alors eski i ti pou byen? Mon demann sa keston pou mon dir be *ok* annou al 10an apre sa ki vin apre 10an les tonbe. Me i annan dimoun ki pa pou ganny nanryen. E pou mwan i tris e inakseptab. Alors mon pa pou kapab konklir en negosyasyon kot serten dimoun serten maren i dan risk pou zot pa ganny nanryen.

Mon pa krwar e nou Gouvernman i krwar ki nou bezwen kontinyen rod sa lazistis pou tou bann ki travay e ki merite. Nou bezwen kontinyen met sa lo latap, ziske zour nou ava kapab ganny en solisyon.

Dezyenmman, parey bokou zot ki'n travay lo Komite Zafer Etranzer Onorab Andre, Onorab William e bokou sa bann mon menm mwan ki'n lo Komite Zafer Etranzer dan Lasanble, nou konnen ki Linyon Eropéen i en gro masin biokratik.

Kot bann prosedir i long e i konplike, sa ki fer li pli konplike ankor, se ki an sa negosyasyon i annan 3 nivo, i annan nivo bann propriyeter bato, i annan nivo bann pei kot sa bann propriyeter bato i sorti, apre i annan nivo Linyon

Eropéen ki li i pa lao, li i pe sey kordin tou sa bann keksoz.

I vreman difisil, e enn bann keksoz ki fer nou al dousman, se ki toultan ou bezwen met sa trwa nivo enn lo lot e kontinyen rod ankouraz sa bann dimoun pou vin negosye.

E ler i annan 3 nivo koumsa sakenn i annan son lopinyon diferan. Sakenn i vin ek son Avoka diferan. E ou konnen si ou met Onorab Andre i la si ou met 3 Avoka dan en sel lasal otour en latap ou ganny ou apepre en 10 lopinyon diferan, non? En pti pe plis, vwala. Alors sa i fer ki vreman konplike.

Prezan i annan en lot problem dan bann Lakor presedan Sesel ti dakor lo en laranzman kot si en bato pa pe pran abor okenn maren Seselwa i bezwen pey en nespes *fine*. En nespes konpansasyon avek Sesel avek atraver *SFA*. En sonm pou sak zour ki sa maren pa lapas, i bezwen ganny peye avek *SFA*.

Alors ler nou tonm lo sa bann Lagreman koumsa, byensir sa bann maren sa bann propriyeter bato laba deor zot dir be nou pa ti pe en konpasyon nou, be oli nou larzan? Oli sa larzan, servi sa larzan.

Mon pa dakor avek zot largiman mon. Sa i pa pou zot sa larzan i pou Sesel. Me selman zot, zot pe lev tou sa bann pwen largiman poudir be nou'n peye. E sa in fer li vin bokou pli konplike ki i annan serten dimoun dan ladministrasyon presedan.

E i ava koriz mwan si mon mal. Par egzanp Minis Bastienne ki ti Minis Lapes avan mon, ti fer serten lanons konmkwa Linyon Eropéen in fini peye. Larzan in fini antre prezan i pe esper pou nou al gete ki mannyer nou pou partaz sa larzan.

Sa in vin en lot konplikasyon ankore. E ki pa vre Linyon Eropéen pa'n peye okenn larzan napa okenn larzan ki'n antre la ki pe espere napa. *Ok?*

Alors sa in fer en lot kalite konplikasyon. Aprezan serten konpanyen pe dir ki zot, zot in deza pey sa larzan. Zot dir ki sa laranzman lapey ti ganny aksepte.

E sa en lot keksoz ki ler nou fer nou bann fot. Ler nou negosye nou bann Lakor nou aksepte ki bann maren Seselwa pou ganny peye tan e ki nou pa met li kler ki bezwen par lao *ILO*. Laba anler kot Linyon Eropéen i annan bann Avoka pli mesan ki lyon, e zot, zot pe get

sa Lakor bout par bout devan deryer. E ler zot vwar en keksoz koumsa be pa'n dir ladan.

Mwan prezan mon bezwen ale mon bezwen plennyen mon dir be pa'n dir wi i pa'n dir me selman konpran nou. I pa'n dir me selman in dir. Parey defen Guy Sinon ti pou dir, i pa'n dir selman in dir, *ok?*

Alors eski nou pou blanm bann ki'n vin avan nou bann ki'n apre nou mon pa anvi fer sa mwan, mon pa dan sa *blame game* mwan. Non demars pou retrouv sa larzan konpansasyon i bezwen kontinyen

Mardi pase, mwan mon avek nou lekip nou'n annan en lot long sesyon travay avek bann O Zofisye Linyon Eropéen ki ansarz divizyon lapes. Ti prezan osi dan sa renyon reprezantan *La France L'Espagne ek Italie*.

Nou'n fer nou bann pwen ki nou'n transmet avek Anbasader Linyon Eropéen *Maurice*, pou nou ganny son sipor.

Yer swar ler mon ti pe prepar sa larepons pou mwan vin donn zot ozordi, mon'n ganny en larepons sorti kot Linyon Eropéen, ki pe ankouraz nou pou kontinyen diskite e rod en solisyon. So deza sa i en keksoz pozitiv.

An Out mwan prosen, serten reprezantan bann bato ton pe vin Sesel e nou pou diskrit sa size. Sa se an Out. An Septanm bann reprezantan Linyon Eropéen pe vin Sesel pou en lot dialog politik avek nou e nou pou lev ankor sa size.

Nou ava pran letan e Anbasader Linyon Eropéen in eksprim son swe ki kekfw ler nou ariv Septanm, nou pa bezwen asiz otour en latap, pou fer en dialog politik avek sa size kontrovers ki pa ankor rezourd. I ti ava kontan vwar li rezourd so i donn mwan en pe lespwar.

Alors lo mon kote parey zot konnen mon'n eksprim mon dezir pou mon al kot Linyon Eropéen, pou diskrit avek zot an person e zot in dakor ki konman *COVID* i rafale, mon pou pran mon sak ek mon baton e mon pou al rod sa rezon pou nou bann maren Seselwa.

Mon ava pran nou ava monte nou ava ale si fodre al apye, nou ava ale. Nou ava fer tou bann keksoz ki nou bezwen fer, pou nou kapab ganny en solisyon. Pasyans Onorab Pillay i en kalite ki mon'n aprann, pandan 43an.

43an in long me ler ou annan pasyans ou arive lo destinasyon en zour. Selman fodre ou met kandida. Ou pa

kapab pa met kandida. Ou mete. Met en kou seye. *Ok?*

### **MR SPEAKER**

Konmsi ou'n fini ek larepons.

### **THE DESIGNATED MINISTER** **MR JEAN-FRANCOIS** **FERRARI**

Non, non mon pe akoz i pa zis e mon leker i fermal ler mon konnen poudir serten maren in mor in kit nou, e zot pa'n gannyen zot konpansasyon. Me selman lavi i koumsa. E nou, nou pa pou merit aret fer sa travay.

Mon ava zis terminen Mr Speaker an dizan de pwen leklersisman mon krwar i enportan. Mon rebran sa parol ki Linyon Eropéen in fini donn larzan konpansasyon, sa i zis en rimer e i pa vre.

Dezyenm pwen se ki dan lepase pa ti kler lekel ki ti pe negosye. Ennler sete Minister *SFA*, Departman Lanplwa, *Foreign Affairs* menm Sekirite Sosyal ennler ti ganny *involve* ladan.

Aprezan i annan en sel lorganizasyon ki pe negosye. E sa se Departman Lapes. E sa i en *file* ki lo mon biro depi bomaten ziska aswar toulezour. E alors mon pou kontinyen. Mon ankouraze par bann reaksyon, bann ki mon pe

gannyen avek Linyon Eropeen. Parey toultan dir i pa fasil, me dan lavi napa nanryen ki fasil, alors nou ava kontinyen e avek lagras nou ava kapab anmenn sa solisyon tre byento. Mersi Mr Speaker.

**MR SPEAKER**

Mersi Minis. Siplemanter Onorab Roucou.

**HON MICHEL ROUCOU**

Mersi Mr Chair. Minis Gouvernman presedan ti dir poudir se ki zot pou pey sa bann peser, ki apre zot pou re *go back* atraver Linyon Eropeen pou zot rod sa larzan ki zot in peye. Eski sa in ganny fer? Si ou kapab dir sa.

Apre eski ou lofis i an kontak avek sa bann peser, oubyen ek zot bann fanmir pou fer sir ki zot konnen ki mannyer bann negosyasyon pe ale? Mersi.

**MR SPEAKER**

Mersi Onorab Roucou. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Wi mersi tre briyevman Mr Speaker, wi i annan i ti annan en solisyon kot menm si Linyon Eropeen pa ankor peye, Gouvernman Sesel i ava peye

apre i ava esper Linyon Eropeen pou ranbours sa larzan. Zot konpran sa ti avan eleksyon alors eleksyon ou bezwen sey degaze grat, grate kot ou kapab montre poudir ou *ok*. So sa laranzman fer *ok*?

Me sa konpansasyon sa ranboursman, e sa i pou peryod 2014 - 2020 sa ranboursman i preski pare pe ganny finalize. Son prensip in ganny aksepte me son *quantum* i annan en pti diferans ant sa ki Sesel pe *claim* e sa ki Linyon Eropeen pe aksepte.

E donk sa i ankor dan balans me selman sa sonm pa ankor antre pou lemoman Sesel.

Ou dezyenm kestyon Onorab. Pe kontinyen angaze. Otan ki mon kapab Onorab, parey zot konnen bann maren peser napa en lorganizasyon ki 100poursan striktire. I annan plizyer dimoun ki'n ki mon rankontre en endividyelman ki reprezant dan bann maren, e enn bann ki'n lo medya toultan ki an kontak toultan ek mwan se Charles *Louise* Les Mamelles, ki nou kontinyen koze e la Mr Robinson avek Mr Albert Napier in antre dan sa negosyasyon e mon pe al angaz zot.

Alors kontak i la e otan fwa ki mon ganny loportinite

pou mon reasir zot ki sa travay pe ganny fer mon kontinyen fer li. Mon demann zot zis pou konpran son kompleksite e kantite erdtan travay ki i annan deryer sa.

Si zot konpran sa zot ava senpatiz en pti pe avek mwan, zot ava vwar poudir i annan en bon zefor ki pe ganny mete e ki avek lagras nou pou ganny rezilta. Mersi.

**MR SPEAKER**

Mers Minis. Bon en pe kestyon siplemanter. Onorab Pillay.

**HON SEBASTIEN PILLAY**

Mersi Mr Speaker. En larepons tre enteresan. Mr Speaker i enportan pou etabli en pti pe konteks sa kestyon aköz FPAC dan 6enm Lasanble in deza pran sa size an detay.

E i sagrinan regretab pou vwar ki Onorab Ferrari ozordi konpletman sanz son pozisyon opred ler i ti dan FPAC. Kot Onorab Ferrari sa letan avan ki ti ..

*(Interruption)*

**MR SPEAKER**

Minis Ferrari.

**HON SEBASTIEN PILLAY**

*Sorry* mon ti pe fer *refer to* 6enm Lasanble Mr Speaker. Mon pe

*refer* li to Minis dan sa Lasanble ki la, Onorab Ferrari sa letan Minis Ferrari ki ti Onorab Ferrari sa letan, ti refize aksepte largiman ki diskisyon i kompleks.

E ou ti met presyon lo Gouvernman e i ti blanm Gouvernman sa letan. E mon pou mwan mon pa pou aksepte personnelman pou blanm Minis Bastienne aköz mon ti la, e i ti dir ek ou, zisteman bann largiman ki ou pe vin servi ozordi i ti servi ek ou sa bann menm largiman.

E ou ti al an deor ou ti koz avek sa bann maren peser, e ou ti donn zot en lekspektasyon, ki ler, ou Gouvernman i vin o pouvwar ou pou rezourd sa problenm enn fwa pou tou. I ava fer konbyen mwan ou'n o pouvwar la e ou pa ankor rezourd sa problenm e ou vin sant bann menm largiman ki ti ganny *raise* oparavan?

E zisteman ti annan en konpansasyon ki ti ganny peye. Ki ti konmans ganny peye avek bann maren peser. Sa ou pa'n dir ditou dan Lasanble sa. Ti annan en bout larzan ki ti ganny peye avek zot. Me ou pa'n dir solman.

**MR SPEAKER.**

Prosed ou kestyon.

**HON SEBASTIEN PILLAY**

Mersi Mr Speaker mon konpran mon krwar mon bezwen reste lo kestyon.

So kestyon pou ou senp, lefe ki ou pe kontinyen ale vini lo ou bann pozisyon, e ou'n sanz pozisyon ki ou ti anmenn dan konpany eleksyon ki'n met ou la ki ou'n dir ou'n pasyante 43an, ki mwan mon krwar si ou kontinyen koumsa mwan mon pa pou bezwen esper 43an mwan.

Mon pe gete ki mannyer ou pe ale, so kan eski ou pou kapab donn sa bann maren peser en solisyon, san ki ou vin dan Lasanble e vin rod leskiz apre leskiz, pou en keksoz ou ti dir *sorry* Mr Speaker i mal, eski.

*(Interruption)*

**MR SPEAKER**

Bon annou pa trenn tou deba lepase ladan. Demann ou kestyon.

**HON SEBASTIEN PILLAY**

Wi mon krwar mon pe anmenn lopinyon Minis e mon pa devret - mon konpran ou. Kan eski ou pou kapab donn bann maren peser en solisyon? E prenon kont lefe ki nou dan en problem ekonomik mon pa kapab fer sa sizesyon la, akoz ou pa ti'n konsidere

konmansman lannen pou rezourd sa problem, e apre kontinyen avek sa diskisyon parey ti'n deza ganny met lo latab avek ou, kan ki ou menm ou, ou ti pou propoze e promet ban maren peser ler ou ti dan *FPAC* dan 6enm Lasanble? Mersi Mr Speaker.

**MR SPEAKER**

Mersi Onorab. Minis nou ava sey avanse lo kestyon silvouple.

**THE DESIGNATED MINISTER  
MR JEAN-FRANCOIS  
FERRARI**

Wi anfen Mr Speaker mon pa konnen dan ki Lasanble ki Onorab Pillay ti ladan. Me selman mon krwar i pa'n ganny li byen en? I pa son bann son memwar pa pe ed li bokou en, akoz mon pozisyon ki mon'n pran in toultan vreman tre konsistan. Kan eski nou pou kapab vwar en solisyon?

Me ler nou kapab met en lord dan sa Lakor ki ou Gouvernman in sinyen Onorab. E se la kot difikilte i vini. Nou pe sey - ou konnen ler ou pe sey repar en keksoz ki pa pe marse, i bokou pli difisil. Alors nou nou'n erit en sityasyon ki nou pe sey lager avek.

E mwan mon konnen poudir bann maren peser i

konpran, i konpran poudir i annan en ta travay pou fer.

E alors mon pa vin la pou mon argimant ek ou, mon'n vin la pou mon zis dir ou ki i difisil akoz i annan en kantite lanpayaz. Alors si ou'n tann diferaman e si ou krwar i pou pran mwens ki 43an pou ou ariv kot oule ale. Be met kandida en fwa. Sa ki mon problem ek ou. Ou pa pe mete sa kandida. Debout en kou dan en distrik nou ava gete! Mersi bokou.

*(laughter)*

**MR SPEAKER**

Minis annou retourn lo kestyon. Onorab Pillay annou pa antre dan sa deba. Annou prosede avek lezot Manm Onorab Cosgrow, ou annan kestyon? Ou'n pas. *Ok* Onorab Labonte.

**HON ANDY LABONTE**

Mersi Mr Speaker. Bonzour Minis avek ou delegasyon. Minis mon konnen ou'n dir ki ou pa anvi blanm Gouvernman avan, me eski size konpansasyon pou bann peser ki'n travay lo bann bato pandan plizyer lannen, i enn bann negosyasyon ki Gouvernman avan pa'n fer ase zefor pou

negosye dan lentere sa bann travayer Seselwa? Mersi.

**MR SPEAKER**

Mersi. Minis.

**THE DESIGNATED MINISTER**  
**MR JEAN-FRANCOIS**  
**FERRARI**

Onorab mon pa kapab dir ou zot pa'n fer ase, me selman mo kapab get rezilta. Rezilta se ki i pa'n arive, negosyasyon pa'n abouti. Alors problem i ankor antye. E mwan mon'n erit en problem ki antye! Alors mwan mon bezwen pran li la kot mon erite anmenn pli devan.

E mon ti ava kontan mon ti ava zis kontan dir avek Onorab Pillay ki kekfwa nou ti pou annan en diferan kalite largiman, si Gouvernman presedan ti'n aksepte anmenn nou Lopozisyon, anmenn bann Manm Lasanble dan sa negosyasyon.

Ou rapel mannyer sa ou zwe - pa zwe bliye -

*(laughter)*

**THE DESIGNATED MINISTER**  
**MR JEAN-FRANCOIS**  
**FERRARI**

... poudir ler nou ti demande pou nou ale, pou nou monte laba anler pou nou fer nou bout

pou nou kontribye, pou nou fer nou par, pou nou fer nou zefor, zot ti dir nou non pa pe monte.

Alors mon bezwen demann be kisisa ki zot pa ti le nou vwar.

*(Interruption)*

**MR SPEAKER**

En pe lord silvouple.

**THE DESIGNATED MINISTER**  
**MR JEAN-FRANCOIS**  
**FERRARI**

Kisisa ki zot pa ti le ki nou vwar ki pa les nou monte laba anler? Alors annou sakenn aksepte son responsabilite e annou pa sey zis pas sa lo en lot dimoun.

Mwan mon pa pe pas lo ou, me ou a krwar konmsi ou pe sey rod en fason pou ou eksplik en sityasyon ki finalman ou'n anpay ou lekor! Mersi.

**MR SPEAKER**

Mersi. *Ok* Onorab Pillay mon'n vwar ou'n lev lanmen. Les mwan dir mon pa anvi vwar ki nou antre dan en deba lo bann zafer lepase ant Onorab Pillay avek Minis Ferrari. Mon anvi prosede avek kestyon.

So si ou annan en pwen pou nou bouz devan, mon ava redonn ou laparol. Me selman annou termin e mon pre pou mon envit Onorab Pillay avek

Minis Ferrari pou *shake hands* lo sa size. Mersi. Onorab Pillay dernyen klarifikasyon si ou bezwen.

**HON SEBASTIEN PILLAY**

Mersi Mr Speaker. Mr Speaker mon krwar ou'n fer ou'n tret mon avek respe, mwan osi mon bezwen mon pou tret ou avek respe. Mwan mon pwen i tre senp mon. Mon pe blanm Minis mwan. En keksoz i bezwen ganny fer sa bann maren ki zot pa kapab ale vini.

Me selman parey Onorab Labonte atraver ou Mr Speaker in *raise* en kestyon. Fodre i konn byen fodre i konn byen kwa ki'n arive. In annan en lesey par Gouvernman avan pou peye. Sa ki nou, nou pe rode, se zis ki parey Minis in dir *ok*, pou *involve* Lasanble, i pe al fer bann nouvo negosyasyon, la i pou loportinite pou li prouve me *involve* IAC safwasi nou ava ganny sa. Mersi.

**MR SPEAKER**

Bon annou terminen lo la. Minis wi.

**THE DESIGNATED MINISTER**  
**MR JEAN-FRANCOIS**  
**FERRARI**

Nou ava terminen lo la Mr Speaker. E mwan mon ti ava dir ler mon al kot Linyon

Eropeen, mon ti ava byen kontan anmenn Onorab Pillay oubyen enn son reprezantan pou vin avek nou, pou donn en koudmen pou zot kapab eksplik sa bann msye laba, akoz zot ti fer keksoz koumsa koz zot pa ti fer li en lot fason l

So mwan mon anvi vwar en solisyon e mon anvi ki tou dimoun, akoz parey mon dir Mr Speaker, mon ava termin lo la. Vwar i annan dimoun i anvi ganny lotri, me selman zot pa zanmen anvi aste en tiket. Me aste en tiket ou ava kekfwa en zour ou ava ganny en lotri Onorab! Mersi.

*(laughter)*

**MR SPEAKER**

Byen Ale ase. Onorab Henrie ou annan en kestyon? Fotespere ou kapab avanse lo size sa kestyon. Onorab Henrie.

**HON GERVAIS HENRIE**

Mr Speaker mersi akoz dan son larepons Minis in dir nou poudir negosyasyon avan avek ladministrasyon presedan pa'n abouti rezilta. Refiz, Lopozisyon mon rapel ou ti asiz trwazyenm dimoun e ou toultan ti pouse avek ansyen Minis

Bastiennen donn en plas Lopozisyon, pou nou kapab met nou pozisyon.

Me selman Gouvernman sa letan in konmans fer bout peyman. Eski alor pou zot Parti US sete *winning at all cost* irespektiv so apre zot pou kit kof vid ler nou nou'n vini. Mersi.

**MR SPEAKER**

Ok nou pe retourn ankor. Minis ou ava termin ...

*(laughter)*

**MR SPEAKER**

... silvouple lord. Minis ou ava sey klotir sa deba avek en dernyen repons silvouple.

**THE DESIGNATED MINISTER  
MR JEAN-FRANCOIS  
FERRARI**

Mr Speaker mersi bokou. Mon krwar sa *statement* ki Onorab Henrie in fer i koz pou li menm. E i montre ki kekfwa dan sa travay, nou pa'n ase pran zentere bann maren peser ek bann ek Sesel an zeneral, me selman nou'n met premye en lentere politik, e se pou sa nou vwar nou ladan koumsa ozordi.

Me i en pe domaz me selman nou ava ede, e si Onorab Pillay i annan en

reprezantan nou ava travay ansanm pou nou rod en solisyon. Mersi.

**MR SPEAKER**

Mersi Minis, e avek sa mersi osi Mr Louys pou partisipasyon. Nou ava termin sa peryod kestyon la. Mersi bann Manm pou zot kestyon. Nou ava swet Minis ek Mr Louys en bon depar en bonn apre midi travay. E nou, nou ava rebran 2er. Mersi.

***(BREAK)***

**MR SPEAKER**

Bonn apre midi tou dimoun. Nou ava apel delegasyon Minis Devika Vidot. *Yes Leader* Lopozisyon.

**HON SEBASTIEN PILLAY**

Mersi Mr Speaker. Mr Speaker mon ti oule zis fer en pti deklarasyon konman *Chairman FPAC*, pou enform Lasanble ki nou ti fer en *meeting FPAC* apre midi, an relasyon avek en *hearing* ki nou ti pou fer lo *Air Seychelles* demen - *I mean Zedi* ki nou ti'n fini enform piblik atraver Lasanble.

I regretab ki nou pa pou kapab kontinyen avek sa *hearing*, akoz baze lo en rezolisyon ki nou'n pase dan Komite, mazorite lo kote Gouvernman *LDS* in pran en

desizyon atraver rezolisyon pou *postpone* sa *hearing*.

Nou santi poudir nou ti'n devret ganny - konman *FPAC* nou ti'n devret ganny enformen akoz bann rezon ki mon pe gannyen ki in annan serten diskisyon e ki Minis Derjacques ti'n eksprim serten konsern.

Malerezman Mr Speaker *from a privilege point of view FPAC*, nou pa ankor ganny okenn dokiman formel sorti swa kot Minis Derjaques, swa kot Minister Finans.

Me lefe ki Lasanble nou en Komite e nou bezwen konform sa *Standing Order* e bann Manm in *move* en rezolisyon, mwan mon ti ava anvi *proceed* avek sa *hearing*, me Komite in desid *otherwise* an mazorite lo kote *LDS* in desid *otherwise*.

E mon krwar Mr Speaker ti pou enportan pou nou ganny en apersi lo ki'n arive ek sa 2.5 bilyon ki Minis Derjaques ti fer dan *statement* dan Lasanble.

E an pasan Mr Speaker mon oule *as a matter of privilege* osi enform Lasanble nou'n ekrir Minister Finans, a trwa repriz pou nou ganny rapor *World Bank* avek *Air Seychelles*, ki ziska la nou pa ankor kapab gannyen.

So mon ti ava kontan ki sa i al lo rikord ki Minister konsernen i fer le neser

Lasanble kapab al lenformasyon parey Konstitisyon i egzize. Mersi Mr Speaker.

**MR SPEAKER**

Mersi, nou kapab regard ladan pli tar. Onorab Mondon vi ki ou *Vice-Chair FPAC*. Ou pe al azout keksoz lo lapar bann Manm *LDS*?

**HON TERENCE MONDON**

Wi en pwen klarifikasyon dan *meeting* zot pa'n dir Minis Derjaques ki rekonmann sa. Nou'n dir bann Manm i santi ki a sa moman sa size *Air Seychelles*, avek tou bann keksoz ki pe pase sa reform i *sensitive* i sa, annou donn lespas pou sa travay negosyasyon avek *IMF* konplete. Epi nou ava pran sa *hearing*.

Sa *hearing* pou ganny fer e nou zis nou anvi donn sa lespas pou nou pa anmenn bann eleman kekfwa ki kapab annan en lefe advers lo sa negasyon. Mersi.

**MR SPEAKER**

Tre byen mersi. Nou ava tenir kont tousala e nou ava kapab re adres sa apre. Minis silvouple. *Please*.

Bon bonn apre midi Minis Devika Vidot Minis pou

Lenvestisman, Lantreprenarya e Lendistri. E dan delegasyon Minis ki nou osi dir byenveni nou annan Mr Michael Nalletamby Sekreter Prensipal pou Lenvestisman Lantreprenarya e Lendistri, Mr Roy Colie, *CEO Industrial Estate Authority* e Mrs Angelic Appoo, *CEO Enterprise Seychelles Agency*.

E pou sa delegasyon nou annan kestyon. Nou pou sanz en pe lord kestyon pou nou pran bann kestyon ki ale ki aplike pou sa delegasyon tou ansanm.

E alor pou sa Madanm Clerk mon annan 22 mon annan 42 avek 43 pou sa delegasyon la. Tre byen. Bon nou ava konmans avek kestyon 42 alors. E kestyon 42 i pou Onorab Egbert Aglae.

**HON EGBERT AGLAE**

Mersi Mr Speaker. Bonn apre midi Minis avek ou delegasyon. Kestyon i lir *comme* swivan eski Minis i kapab eksplik ek sa Lasanble ki plan *ESA* an sa ki konsern sa bann *kiosk* Port Glaud?

Akoz ki nouvo alokasyon in ganny fer san konsiltasyon Lotorite Distrik an vi demann par zabitan sa rezyon? Eski dan plan Gouvernman eski plan pou devlopman sa lot sant

mikroantrepriz i ankor dan sa plan Gouvernman? Mersi.

**MR SPEAKER**

Mersi Minis silvouple ou ladres.

**MINISTER DEVIKA VIDOT**

Mersi Mr Speaker. Bonn apre midi Mr Speaker. Bonn apre midi tou Manm Onorab. Bonn apre midi tou Manm piblik ki a lekout. Mersi Onorab pou kestyon.

*ESA* i responsab pou lamenzman sant mikro antrepriz ki sitye Port Glaud pou konpri en total 6 lespas ki abrit 3 laboutik, en latelye koud, en *florist* avek en restoran.

Sa batiman i aktyelman pou Fon Pansyon Sesel e alor *ESA* i lwe sa batiman avek Fon Pansyon.

*ESA* i senpleman annan responsabilite pou lwe lespas dan sa batiman avek bann biznes ki fer demann e i osi responsab pou zesyon sa propriyete.

Sa batiman Port Glaud pa pou kapab fer okenn sanzman avek an se moman, akoz i pou enpakte lagreman ki *ESA* i annan avek Fon Pansyon.

Me bi *ESA* pou sa landrwa se pou anmenn plis latraksyon pou ki bann biznes ki baze dan

sa batiman i ganny plis vizibilite.

I dan plan *ESA* pou travay ansanm avek bann biznes pou devlop en plan aktivite pou ki kapab elev sa landrwa e fer ki manm piblik e menm touris i kapab frekant sa bann landrwa pli en pe pli souvan. Me tou sa pou posib selman letan sityasyon *COVID-19* i amelyore.

Pou reponn dezyenm parti ou kestyon direktman, eski konsern alokasyon, dernyen alokasyon ki ti ganny fer dan sa landrwa sete an 2019 e depi sa napa ankor alokasyon ankor ganny fer.

Alokasyon dan sa bann letan ti ganny fer atraver *ESA* e rekomandasyon *Board*, me tou resaman *ESA* in etabli en Polisi an ekrir pou diriz bann tel alokasyon.

Sepandan Minister i enn ki krwar dan lantreprenarya Legzekitiv ek Lezislatif e alors nou santi pou ki bann alokasyon a lavenir, i enportan ki nou konsilte avek Lotorite Distrik pandan ki sa bann alokasyon pe ganny fer.

Ou trwazyenm kestyon an se ki konsern devlopman sa lot mikro antrepriz, e si i ankor dan plan Gouvernman? Wi i dan plan Gouvernman pou etabli en sant lantrepriz dan sa distrik. Me mon osi okouran ki

konsiltasyon pou devlopman sa proze ti ganny fer avek piblik dan distrik.

Finansman i reste touzour enn nou pli gr o defi e napa larzan ou enplimantasyon sa proze an se moman malerezman,

Alors Gouvernman pe konsider plizyer stratezi pou sirmont sa defi enkli angaze dan *Public Private Partnership* sa ki nou apel *PPP* e an plis ki sa Gouvernman pe osi revwar ki kalite biznes ki pou met ladan baze lo demann lekonomi. Mersi Mr Speaker.

### **MR SPEAKER**

Mersi. Onorab Aglae ou annan siplemanter?

### **HON EGBERT AGLAE**

Minis mersi pou ou larepons ki ou'n donner. Mon ti ava zis met mon rikord lo Minis ki bann diskisyon ki mon ti ganny fer dan lepase, byensir ou pa ti ankor vin Minis administrasyon oparavan.

Kot nou ti pe tonm dakor lo en *way forward*, an vi ki ti annan negosyasyon avek Minister Finans menm, atraver diskisyon ek Fon Pansyon, si pou rann sa bann *kiosk* pou re rann Fon Pansyon ouswa *ESA* pou kontinyen zere parey ou'n

dir la *ESA* i ankor pe zere lamenezman sa *kiosk*.

Alors Minis mon ti ava kontan petet demann ou premyerman akoz dan letan *COVID* la petet ki plan pou *redesign* sa *business model* kot i konsern sa bann *kiosk* li menm li, baze lo bann demann e servis ki nou, nou bezwen dan distrik premyerman.

Akoz orizinalman ti pou artizanal bann keksoz ki baze touristik, ozordi sa aktivite in redwir in preski minim. Eski zot pe mazin re anmenn serten demann mankman ki distrik nou, nou santi i annan ki manke, byensir?

E dezyenmman mon ti ava kontan petet ki zot pe mazin fer, akoz i annan sa bann *kiosk* ki la ki ankor vid a sa moman e ankor annan demann dimoun ki ankor pe kestyon Lotorite Distrik ki pe arive akoz zot pase zot vwar i vid. E mannyer mon konpran i annan dimoun ki'n ganny *allocate*.

So ki mannyer nou pou bouze ek sa sityasyon pou nou ki dimoun pa vini krwar poudir nou pa anvi ed zot pou zot ganny en lespas pou zot fer zot biznes le zot pare, me ki i annan dimoun ki deza ganny *allocate* ki zot, zot pa pe servi sa landrwa? Mersi.

**MR SPEAKER**

Mersi Onorab. Minis ou repons.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Definitivman lokasyon letan nou ou fer e i pou ganny fer anliny avek demann ki pei i annan, e byensir la an partikilye ki sa distrik i annan.

E annan en konponan vremen enportan dan lekonomi ki nou bezwen al fer sir nou met lanfaz lo la e sa se *cultural tourism*. E alors se la ki antre sa demann e nesosite pou relev sektè artizanal. E alor mon kapab donn ou lasirans poudir sa bann tel aktivite parey pou ganny prioritize an sa ki konsern alokasyon.

Dezyenman lo size bann *kiosk* ki vid, lenformasyon ki nou annan kot *ESA* se ki tou *rent* pe ganny peye tou lemwan e napa okenn aryeraz lo sa bann *kiosk* parey ou'n dir.

Me selman posibilite i la ki petet sa bann *tenants* i pa pe servi zot plas an se moman. E dapre lenformasyon ki nou'n gannyen, se ki zot pe pey zot bann lespas tou le mwan. Mersi.

**MR SPEAKER**

Tre byen. Ou annan klarifikasyon Onorab Aglae tan ki nou lo ou kestyon?

**HON EGBERT AGLAE**

Wi Minis ou'n tous en pti bout lo sa ou'n koz en pti pe lo demann pei wi, konmsi eski nou pou *do away* ler nou pe koz ou *redefining* sa model biznes ki zot anvi plase dan sa landrwa, avek sa fitir sa sant repriz osi.

Konmsi nou pa anvi repet menm fot. So se dan sa laliny ki kalite aktivite ki nou ti ava kontan swete nou vwar, akoz i deza annan serten demann baze lo distrik, servis ki nou bezwen, eski zot pou konsider sa ouswa zot pou get lezot dimoun an deor? Akoz i annan dimoun ki'n sorti en pti pe lwen ki'n ganny sa bann *kiosk* ki pe servi. Mersi.

**MR SPEAKER**

Mersi. Minis wi ou repons.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. I egzaktèman parey ou pe dir, nou bezwen revwar sa model antyerman kan nou pe fer alokasyon.

Akoz alokasyon i bezwen ganny fer dan en fason ki fer sans. E an plis ki sa ler nou pe konsider bann dimoun ki reste

Port Glaud mon santi ki zot osi zot bezwen i bezwen annan en serten kriter eleman ladan ki zot ganny en pe plis sans pou ki zot, zot ganny sans pou zot servi sa bann mikro antrepriz an avantaz ki bann lezot dimoun sorti dan bann lezot distrik.

So antyerman *ESA* in travay lo en nouvo Polisi alokasyon, e nou pou bezwen fer sir ki sa bann keksoz i bann kondisyon ki ganny mete ladan, ki letan nou revwar alokasyon nou revwar li dan en antyer *in its entirety* e nou evalye i an akor avek demann osi. Mersi.

### **MR SPEAKER**

Mersi Minis. Bon sa kestyon ti spesifikman lo Port Glaud, so nou ava termin avek kestyon Onorab Aglae.

Me parkont kestyon 43 ki pe demande par Onorab Churchill Gill ki refer Eve Island, mwan mon pou tret sa konman en kestyon zeneral akoz lo Eve Island i annan en kantite dimoun ki annan demann pou plas biznes bann keksoz koumsa.

So mon ava elarzir sa kestyon e bann lezot Manm ava kapab demann siplemanter dapre letan ki nou annan. Onorab Churchill Gill kestyon silvouple.

### **HON CHURCHILL GILL**

Mersi Mr Speaker. Bonn apre midi Minis ek ou delegasyon. Kestyon i lir koumsa;

Eski Minis i kapab enform Lasanble, kan ki *tender* i ekspekte ganny *advertise*, pou ki sa bann dimoun ki'n *apply* later lo Zil Eve sitan lontan ava kapab partisip dan *tender*? Mersi.

### **MR SPEAKER**

Mersi Minis.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Mr Speaker lentansyon Gouvernman ti pou termin sa premye faz proze lenfrastruktir lo Ile Eve ver Desanm 2021.

Me vi ki sa proze pe ganny revwar pou enkli tou lenfrastruktir ki sa zil i bezwen enn fwa pou tou, nou pe alors parey mon'n deza deklare dan Lasanble nou pe antsip en pe retar lo sa proze.

Nou'n bezwen revwar plan sa semen an antye e enkorpor bann servis esansyel ki ti'n manke dan plan orizinal. La nou pe koz lo konstruksyon semen pou fasilite akse avek later drenaz, lenstalasyon koneksyon elektrisite, delo e laliny desarz.

An plis ki sa, i osi i annan serten tiyo *PUC* ki pas atraver later ki'n bezwen ganny *relocate*, zisteman pou fer sir ki bann devloper pa fer fas avek bann okenn lobstak pandan zot bann devlopman.

Kontrakter i deza lo teren, pe fer serten travay dapre nouvo gidans. Lentansyon Gouvernman, se pou met lenfrastruktir avan distribisyon later atraver *tender*, me tou pou depan lo dirasyon lenplimantasyon sa proze.

I posib ki i ava osi annan en pe retar gras a serten reazisteman bann kare later, ki pou bezwen ganny fer. An rezilta sa si tou keksoz i al dapre nouvo plan, plan proze pou aprezan fini ver trwazyenm kar lannen 2022.

Nou espekte kapab lans *tender* avan ki proze i terminen Minister ava travay lo bann dokiman *tender* antretan, pou fer sir ki i pare davans, avek lentansyon ki letan proze lenfrastruktir i konplete bann prosedir *tender* e nou ava osi fini ganny fer. E bann aplikan ki ganny kalifye pou en morso later a osi ganny zot *letter of offer* pou konmans sa larout etabli zot proze.

Mr Speaker Gouvernman i vwar li nesese pou asire ki lenfrastruktir i ganny fer, dan en

fason konpreansiv e efektiv anliny avek plan devlopman later sa zil.

Sa i ava fer ki enn fwa en aplikan in ganny later, i pou napa rezon pou li pa onor kondisyon son lagreman pou li devlop son later. Mersi.

### **MR SPEAKER**

Wi Onorab Gill, siplemanter.

### **HON CHURCHILL GILL**

Mersi Minis pou ou larepons. Lo size parey ou'n fer sorti ki enportan lenfrastruktir i ganny konplete avan lokasyon.

Eski ou kapab eksplik Lasanble pou bann dimoun ki'n ganny alokasyon avan ki lenfrastruktir in konplete, ki kalite konversasyon ki ou pou fer ek zot? E ki bann serten kondisyon ki bezwen ganny aziste vi ki zot, zot pa'n benefisye ek lenfrastruktir ler zot ti ganny later?

Aprè dezyenm se ou'n mansyon serten azisteman avek proze an zeneral. Natirelman sa i bezwen en lefe lo Bidze sa kontrakter. Eski nou espekte ki sa konsern Bidze pa pou poz en problem pou sa kontrakter kapab konplet sa travay?

E ki bann letan ki ou'n donner, parey ou'n dir trwazyenm kar lannen prosenn, i nou pou definitivman kapab

swiv sa dele letan e Bidze pa pou poz en problemn menm apre sa lazisteman. Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou bann keston. An se ki konsern alokasyon later ki'n deza ganny fer e size lenfrastruktir, e la ki mon pe eksprimen ki lenfrastruktir i enportan i nesese kan avan ki nou fer alokasyon later.

Rezon ki mon dir sa se aköz tandans ki nou'n vwar se ki letan sa bann alokasyon later ti pe ganny fer, sa bann dimoun in aksepté sa later san ki lenfrastruktir ti la.

Me defi ki zot ni fer fas avek se ki zot retourn kot ou zot dir ou zot pa kapab devlop sa later. E alor ti napa kondisyon ki antase prensipalman ek lenfrastruktir pou later, me ti selman an se ki konsern donn sa later li menm. Me enn i bezwen marye avek lot.

E alor safwasi nou pe fer keksoz byen ki fer ki letan sa dimoun i ganny son later, i annan en kondisyon dan sa lagreman ki dir li si pa'n devlope pandan tel kantite letan e alor i an kontraksyon sa lagreman e i nou kapab rebran

later avek li, e nou anvi en sityasyon kot letan en dimoun i ganny alokasyon i ganny en morso later i napa okenn konstrent ki pe anpes li, espesyalman an se ki konsern avek Gouvernman pou li pa retourn kot li pou dir regarde mon pa kapab devlope, aköz ou pa'n delivre lo tel ou tel keksoz.

Konversasyon ki nou bezwen fer avek bann dimoun ki'n deza ganny alokasyon ki'n fini ganny *allocated* later lo Zil Eve, i posib ki annan ki nou pou bezwen demann zot pou nou servi en morso, kantmenm en pti morso apepre en met lo zot later, ki nou pou mank lo la pou ki nou kapab fer sa ki nou apel *service corridor*;- savedir pou fouye pou fer pase sa bann tiyo, drenaz, elektrisite e tou sa.

So tousala pou deservi zot menm. I pou servis ki pou benefisyé zot menm.

Lazisteman lo Bidze, anfen Bidze i reste touzour en keksoz ki espesyalman la an se moman i en keksoz ki pa serten. Nou pe fer nou mye pou nou servi larzan ki nou'n ganny met a nou dispozisyon la an se moman.

Me kontrakter i osi menm parey nou pe travay avek sa kontrakter pou ki i annan louvraz pou li fer. So malgre i annan serten re-kalibrasyon an

se ki konsern sa plan ki nou'n bezwen fer. Me i annan serten travay ki i pa'n bezwen aret travay konpletman.

So i ankor, e an se moman zot kontrakter i *full swing* lo travay e Departman Lenfrastriktir in vreman kle in proaktiv dan sa demars ansanm avek *IEA*, kot nou'n kadab fer sir poudir kontrakter i an kominikasyon avek nou e zot in konnen egzakteman ki i annan pou fer.

E pou nou fer sir poudir sa larzan i la, parey ou konnen Zil Eve i reste en priyorite pou *IEA* nou ti fer komikman pou nou konplet sa proze, e alor letan nou pe fer nou *budget request* nou fer sir pou lannen 2022 nou pe met Zil Eve osi ladan pou fer sir ki sa proze i konplete. Mersi.

### **MR SPEAKER**

Klarifikasyon dernyen pwen Onorab Gill wi.

### **HON CHURCHILL GILL**

Wi Minis ler ou'n donn mon premye larepons, ou'n touse bann diferan aspe kestyon. Me selman i annan enn ki pa'n ganny touse, pa'n ganny leklersisman sa se sa bann dimoun ki 'n ganny later avan.

E prezan ler sa legzersis pe fer, pou gete lekel ki'n peye

lekel ki pa'n peye si pou pran si kwa ti annan sa bann konsern.

E dan pou sa bann dimoun ki tonm dan sa bann konsern, e an menm tan zot dan bann sityasyon kot zot pa ti ganny lenfrastriktir ler zot ti ganny donnen dan sa bout la ki mon pe eklersi, pou benefis sa bann dimoun. Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou kestyon. Pou sa bann dimoun, zot pou annan en konversasyon ki *IEA* pou bezwen fer avek zot, zot pou ganny en dele letan, pou ki zot kapab *sort out* zot ki mannyer zot apel ki nou dir eskize dan term legal '*remedy the situations.*' Mersi.

### **MR SPEAKER**

Mersi. Onorab Woodcock.

### **HON WAVEL WOODCOCK**

Mersi Mr Speaker. Bonn apre midi Minis ek ou delegasyon tou dimoun a lekout.

Minis sa size Ile Eve bann lenfrastriktir lo Ile Eve in en size ki'n a plizyer repriz mwan menm e lezot in anmenn devan sa Lasanble. I annan dimoun i annan plis ki 12an pe espere

pou ganny en morso later e mon kontan ki ou Minis e nouvo *CEO* pe fer en zefor pou met en lord dan sa dezord ki'n annan laba.

Mon kestyon e en konsern ki plizyer bann biznesmenn in met devan mon se kot i konsern sa *tender process*.

I annan bokou bann biznes parey mon'n dir ki en bon pe lannen zot in *apply* e zot in espere zot pa'n ganny later e la avek sa prosedir *tender*, mon kestyon i eski bann dimoun ki'n pou plizyer lannen in *apply* zot pou ganny konsidere ler sa *tender process* pou *roll out*? Eski zot pou benefisyè?

Konmsi mon ti ava konn en pe bann kriter ki pou ganny servi? Akoz mon pa anvi vwar ankor sa ki'n arive dan lepase kot bann dimoun ti merite ganny en bout later pa'n gannyen

E mon dezyenm kestyon osi kot i konsern lakantite later ki pou *become available as soon* ki sa bann travay pou met sa bann lenfrastruktir, semen, drenaz e lezot ankor an plas, e eski i pou osi enkli sa *micro-enterprise centre* ki bann biznesmenn pe demande lo Praslin? Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou 2 kestyon. Pou ou premye kestyon bann kriter ki nou servi e i annan premye kriter ki vreman enportan sa se *land use*.

Savedir ki *permitted* ki aktivite ki ganny permet pou ganny etabli dan sa *Zone*. Akoz ki nou'n vwar e Providence i en legzanp tipik kot *land use* pa'n nou pa'n vreman regarde ki *land use* sa later i annan, e ki bann aktivite ki kapab ganny permet, ganny plase obor kanmarad en pti pe pli lwen ki kanmarad? So napa ase *planning* ki'n ganny fer dan sa laliny.

E alor kriter nimerò enn se *permitted use land use*. Letan sa dimoun i vin ek son laplikasyon pou li ganny en morso later *irrespective* ki kantite letan ki'n lo lalis ki nou bezwen regarde, eski sa aktivite ki i anvi fer i anliny avek permisyon ki pou gannyen pou li fer sa aktivite lo later?

Alor nou pa anvi vwar li dan en sityasyon kot i ganny son later apre i pa kapab fer sa aktivite i pa pou fer sans.

E dezyenm lot kriter ki vreman kle se sityasyon finansyer. I vreman enportan poudir sa dimoun pou kapab devlop sa later, parske dan

lepase ki nou'n vwar dimoun in ganny in benefisye avek later zot pa kapab devlope, e apre zot vwar li pli vyab pou zot vann sa later ou transfer sa *lease* pou gro sonm larzan ki zot napa lentera pou devlop later, me zot in les en lot dimoun vin devlop later apre fini kont ou vwar i annan en kantite dimoun ki pe kapab annan detrwa morso later, parske zot in kapab antre atraver sa bann mwayen.

E alor i vremen enportan pou sa dimoun kapab demontre son kapasite finansman pou sa. E apre *CEO* i annan detrwa pwen ki i anv i fer resorti osi lo la mon ava pas li laparol. *Thank you.*

### **MR SPEAKER**

Mersi Minis. Wi *CEO* ou kapab pran laparol.

### **CEO ROY COLLIE**

Mersi Mr Speaker. Zis pou azoute apre osi depan lo son parey Minis in dir lo sa *land use* me son *business proposal* osi i enportan.

Mon pe mazine ki i pou annan en Komite ki pou vwar sa bann *proposal* e zis petet pou resorti ki petet bann dimoun ki annan en pe dout petet zot krwar ler ou'n lans en *tender* i pou baze lo sa ki annan plis larzan ki ganny *tender*.

Me i pa pou leka. I pou akoz nou, nou pri i fikse. So alor i pou baze lo sa *proposal* ki ou fer kalite biznes ki ou pe al antreprann lo sa bann bout later. Mersi Mr Speaker.

### **MR SPEAKER**

Minis wi ou kapab rebran.

### **MINISTER DEVIKA VIDOT**

Mersi Mr Speaker. I annan dezyenm kestyon ki ou ti'n demande Onorab otour sant mikro antrepriz, an zeneral pou tou bann antrepriz lide *IEA* antreprann *Public Private Partnership*, parske sa nou vwar li mwayen en mwayen pli fasil pou nou kapab devlop sa bann later, parske finansman i vremen en konsern pou Gouvernman. Mersi.

### **HON WAVEL WOODCOCK**

Mr Speaker ti annan en kestyon ki pa ti ankor reponn lo lakantite later ki pou *become available as soon* ki sa proze bann lenfrastruktir k an plas?

Apre zis en *follow up question* dan lepase parey Minis in fer resorti se ki ti napa en *proposal land use plan* pou sa landrwa pou Ile Eve sanmenm, sa ki nou'n pe ganny sa konsern ozordi. Me avek bann lenfrastruktir ek devlopman ki'n deza ganny fer lo la.

Konmsi ki manner zot pou *manage* prezan sa *land use plan* avek tou sa bann, akoz la i annan en pe dezord Ile Eve. Konmsi ki manner zot pou *manage* sa fer sir ki bann *proper infrastructure in place* e me mon konnen i pou en pe konstrent pou zot, alor kekfwa si zot kapab donn en pti pe detay lo ki manner zot pou antreprann sa? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab safwasi se pou sa rezon ki nou'n bezwen met en poz an se ki konsern lavites ki sa proze i pe al avek.

E rezon pou sa se planifikasyon. An plis e ler mon'n koz lo sa reazisteman sa plan pou Zil Eve, i osi konpri en konponan kot nou pe bezwen rod en konsiltan pou vwar an menm tan avek anliny avek sa *land use*, ki kapasite ki sa swa elektrisite ki pou bezwen an se ki konsern *sewage*.

So tou sa bann keksoz ki nou pe pran konmsi nou pe konsider en konteks en pe global si ou kapab dir li koumsa.

E se sa rezon ki nou pe bezwen pran en pti pe plis letan e dan semenn prosenn i annan Kontra i annan *tender* ki pe al lanse pou konsiltan pou kapab vin fer re regard *design* sa *Zone* lo Zil Eve antyerman.

So i annan serten keksoz vreman konkret ki fer pou fer sir ki nou pa repet menm fot ki nou'n fer dan lepase. Mersi.

**MR SPEAKER**

Mersi Minis. Ok ou ankor annan kestyon Onorab Gill? Ale tel ki ou loter kestyon mon ava permet ou, wi.

**HON CHURCHILL GILL**

En keksoz tre enportan ki mon krwar mon devret met dan latansyon Minis vi ki i pe fer reazisteman, lo Zil Eve ozordi pou ou ale i annan zis en semen, prezan *Fire Brigade* osi i baze laba.

E si i ariv en keksoz ek sa semen ler i annan lezot keksoz ki'n arive *Fire Brigade* pou bloke. Alors petet i bon fer refleksyon ki bor en lot konneksyon i kapab ganny fer en manner i ava annan *alternative roots* si an ka i ariv en sityasyon devlope. Mersi.

**MR SPEAKER**

Tre byen. Minis oubyen eski zot anvi adres sa?

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Wi sa size *exit road* i enn ki nou'n fini konmans diskisyon lo la. So i en pwen konsern ki vreman konsernan. An plis ki sa parske nou vwar lo Providence osi sa i en gro konsern so ankor fot ki nou'n fer avek en *Zone* nou pa oule repet li dezyenm.

So nou fer sir poudir nou fer tou provizyon pou fer ki nou kapab fer sa *Zone* endistriyel vin enn ki annan mwens risk posib pou reponn mon'n oublie reponn kestyon Onorab Woodcock. An se ki konsern kantite later se 49 ou 50 morso ki pou ganny met a dispozisyon atraver *tender*. Mersi.

**MR SPEAKER**

Byen mersi Minis. Onorab Cosgrow.

**HON WALLACE COSGROW**

Mersi Mr Speaker. Bonn apre Minis. Bon apre midi tou dimoun. Minis avek nou lo size alokasyon later endistriyel e an vi repons ki ou'n donn Onorab Gill lo kestyon orizinal.

Minis, eski mon byen pou krwar poudir sa *moratorium* ki annan lo alokasyon later endistriyel in ganny retire, ouswa i en *moratorium* ki ti pou

zis lo Mahé lo *Zone* Providence? E si wi kan ki Mahé sa bann *moratorium* pou ganny tire, pou ki bann biznes ava kapab konmans fer zot bann aktivite? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. An se moman la *moratorium* pou ankor leve. *Moratorium* ti aplike pou tou later lo Sesel. E an se moman nou'n travay nou pe finaliz nou travay ki ver lafen sa mwan, nou pou kapab prezant avek Konsej Minis pou nou kapab retir sa *moratorium*. Mersi.

**MR SPEAKER**

Mersi. Avek sa nou'n termin bann kestyon pou sa de, e mon krwar nou bezwen sanz delegasyon, byen. E nou pou dir orevwar Mr Roy Collie.

**(MR ROY COLLIE WAS EXCUSED FROM THE HOUSE)**

**MR SPEAKER**

Mersi bokou *CEO* pou ou partisipasyon. E nou ava gard Mr Nalletamby e Mrs Angelic Appoo. E nou ava prosede avek lot kestyon, nou ava retourn lo

kestyon 40 Onorab Audrey Vidot.

**HON AUDREY VIDOT**

Mersi Mr Speaker. Mr Speaker mon keſtyon pou Minis eski Minis i kapab dir avek sa Lasanble ki striktir ki an plas pour otoriz e gid bann biznes ki vann manze dan *van*?

**MR SPEAKER**

Minis.

**MINISTER DEVIKA VIDOT**

Mersi Mr Speaker. Mersi Onorab pou ou keſtyon. Mr Speaker tou biznes eskize ki vann manze dan *van* i bezwen swiv *the Seychelles Open Air Food Vending Policy and Operating Standards* ki'n ganny etabli depi 2016.

Sa Polisi ti pe ganny zere par Lotorite Lasante Piblik ansanm avek bann lezot *partenaire* Gouvernman tel ki Lotorite *License* Sesel, Komisyon Transpor lo later, Lazans Lantrepriz Sesel *ESA* Lazans pou Lamenzman e Zesyon Salte, Departman Lapolis e lezot Lotorite konsernen.

Sa Polisi i donn gidans lo prosedir ki bann aplikan i devret swiv pou ganny laprouvasyon pou konmans en biznes oplenner *food vending*. E

osi ban term e kondisyon ki zot devret aplike dan zot loperasyon.

Sa Polisi in ganny devlope baze lo *Food Act*. Dapre lenformasyon ti annan en Komite ki ti konpri tou sa bann Lazans ki mon'n nonmen oparavan, ki ti zwenn tou le de semenn pou revwar bann laplikasyon ki antre e akseler bann prosedir.

Me malerezman sa Komite in bezwen ganny dizourd, aköz kontrent bidzeter e osi aköz ti annan en rediksyon dan bann laplikasyon *mobile food van*.

Ankor sa ti relye avek kriz *COVID-19*. Pou lemoman sa bann laplikasyon pe ganny zere par *Food Control Unit* dan Lotorite Lasante Piblik e si i annan okenn lenformasyon ekstra ki bezwen, sa laplikasyon i ganny refer avek Lazans konsernen.

Parey mon'n mansyonnen prosedir pou otoriz en *food van* pou konmans son loperasyon, i bezwen pas atraver Lotorite Lasante Piblik ki pli gran an parti prenan dan sa demars e answit de *License* i ganny donner par Lotorite *Licensing* Sesel, e sa i en *manufacturing license* ki permet li prepar manze en *retail license* ki permet vann sa manze.

Onorab mon ti a kontan fer resorti sa pwen ki mon Minister pe travay an *partenaire* avek Minis Finans dan en legzersis konpreansiv, kot nou pe revwar bann prosedir ki en biznes i pas atraver avan i ganny lotorizasyon final.

Sa i avek en lespri redwir lakantite letap ki sa biznes i bezwen pran, avan ki i ganny laprouvasyon final. Sa i form parti zefor ki nou pe mete fasilite *Ease of doing business* dan Sesel. Mersi.

### **MR SPEAKER**

Yes Onorab siplemanter.

### **HON AUDREY VIDOT**

Yes mersi Minis pou ou larepons. Minis eski ou kapab konfirm avek nou Lasanble, si sa prosedir ki ou'n dir apre ki sa Komite in ganny dizourd, sa nouvo Lazans ki tousel ki pe administre, eski prosedir pe vreman ganny aplike, pou asire ki bann vander i ganny menm loportinite, e ki napa en pwa demezir dan bann laprouvasyon ki ganny donnen?

Minis i annan biznes ki ganny en kantite presyon avek Lotorite Plan pou serten sa bann devlopman ki zot fer an relye avek vann manze. E i annan serten konsern lo prosedir petet ki ganny aplike

avek bann *van* ki petet i annan pe kre en de balansman an term loportinite pou devlop biznes.

Alors eski nouvo ladministrasyon pa pe konsider revwar byensir bann *guidelines* ki elimin en pe okenn baryer pou bann biznes epanouir? E byensir nou tou an respekte ki pa kree en de balansman dan lenpak negativ lo lasante piblik?

E dernyerman kree plis loportinite pou bann *food vendors* kapab agrandi zot biznes *outdoor*, dan en letan kot pei pe promot nouvo Gouvernman pe promot *local tourism* e kot Seselwa i bezwen loportinite biznes an sa difikilte pou lanplwa ozordi? Mersi.

### **MR SPEAKER**

Meri Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou bann kestyon pre pou ou bann konsern ki ou'n fer resorti. Anfen mon pa pou kapab konfirman lo lapar Lotorite Sekirite Piblik e *Licensing* ki napa ki keksoz i pa konsistan.

E se pou sa rezon ki parey mon'n fer resorti, mon Minister ansanm avek Minister Finans nou pe fer sa legzersis

konpreansiv pou ki nou kapab elimin premye lakantite letap ki en dimoun i bezwen pas atraver avan i ganny en laprouvasyon.

E dezyenmman, pou fer sa bann prosedir pli transparan. Pou fer ki kondisyon pou ou ganny en *license* i vin sitan kler e a la porte tou dimoun ki anvi antre dan sa Biznes. E ki i ava redwir sa bann loportinite pou bann lazans si i annan pou zot fer serten preferans lo zot kanmarad. So se avek sanmenm sa lespri ki nou pe fer sa travay.

An se ki konsern bann lezot loportinite biznes, sa i reste touzour manda fondamantal nou Minister, kot nou pe travay e i dan nou plan pou nou fer sir ki dan tou aktivite ki Gouvernman pe lans ladan, nou regarde ki mannyer nou kapab *afford* loportinite biznes dan kominote.

I pa enn ki an se moman i pa en demars ki vreman fasil parske i annan sitan bokou restriksyon an se ki konsern *COVID*. E alor nou santi nou lanmen en pti pe anmare me selman sa i enn nou priyorite. Mersi.

#### **MR SPEAKER**

Mersi. Onorab Michel Roucou siplemanter, e i ava swiv par Onorab Letourdie.

#### **HON MICHEL ROUCOU**

Bon apre midi Minis ek ou *panel* mon oule *welcome* Ms Appoo en zanfan Mont Fleuri. Minis mon kestyon i eski zot annan en legzersis zot in fer pou zot konnen konbyen bann *food van* ki pe *operate* la pou lemoman?

E osi pou vi ki sa *Board* parey ou'n dir in ganny *dissolve*, ki bor bann dimoun i ale pou zot kapab ganny zot permisyon pou zot ganny en *food van*? Mersi.

#### **MR SPEAKER**

Mersi Onorab. Minis.

#### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Malerezman mon napa sa sif an se moman me nou kapab fer ou ganny sa sif atraver *Seychelles Licensing Authority* kot nou kapab demann sa lenformasyon e nou ava fer ou ganny sa lenformasyon.

Dezyenmman ou'n demann mon kote ki sa bann dimoun i kapab al rod al fer zot laplikasyon. Zot kapab al direk kot Lotorite Lasante Piblik pou zot fer en aplikasyon, pou zot kapab *operate* en *food van*. *Thank you*.

**MR SPEAKER**

Tre byen mersi Minis. Onorab Letourdie.

**HON JANY LETOURDIE**

Mersi Mr Speaker. Bonn apre midi tou dimoun. Minis konbyen *license* ki en dimoun i kapab fer laplikasyon? Savedir si mwan mon enterese lans dan biznes *food vendors* dan bis konbyen *license* mon kapab eski i annan en limit?

Apre mon pe met en propozisyon petet en konsern pou bann dimoun dan lakominote, mon ava donn en legzanp;- par egzanzp dan mon distrik, mon vwar i annan sa ki mon mazine la i annan 3 *van 3 food vendors*.

E mon pe zis mazine petet si parmi i annan bann dimoun ki deza reste – (la mon pe koz dan distrik Roche Caiman) si zot pe reste la deza petet ti en bon legzersis pou donn loportinite osi bann dimoun ki reste dan sa rezyon, dan sa distrik, pou zot kapab ganny loportinite zot osi pou zot fleri. Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou 2 kestyon. Nou

pran kont *we take note of* ou pwen ki ou'n fer resorti an se ki konsern donn en pti pe plis priyorite, pou bann dimoun ki sorti dan distrik. Nou ava fer pase sa pwen avek bann Lazans konsernen letan nou pe fer nou legzersis. Mersi.

An se ki konsern lakantite *license* dapre lenformasyon ki mon annan se en lakonpanyen i kapab annan lakantite *license* ki i anvi so i ava kapab annan plis ki enn. Mersi.

**MR SPEAKER**

Mersi Minis. Onorab Cosgrow.

**HON WALLACE COSGROW**

Mersi Mr Speaker. Minis ou ava dakor avek mon ki otour lemonn *street food* i en keksoz ki i annan dan ban bokou lavil Lon, *Thailand, Maurice* menm en pe partou *street food* i en keksoz ki egey lavil, fer lavil vivan e en kantite dimoun bann touris i kontan al dan sa bann lokasyon, pou al gout bann delikates ki sa pei i annan pou ofer.

Minis eski ou kapab konfirm avek nou Lasanble si ou Minister pe travay avek *Public Health Authority*, pou *relax* en pti pe sa bann demann ki *public Health Authority* i fer, i demande ki pou ki bann biznes

i kapab *operate*? Mon pe koz ou dan bann pei ki zot strik me selman sa bann zafer i *operate*, i arive.

So konmsi eski ou Minister i angaze pou koz avek *Public Health Authority* pou kapab devlop sa pti sekter isi dan lavil Victoria, kot touris i ava kapab annan en lot opsyon e menm Seselwa osi dan midi letan nou al rod manze, en lot opsyon pou kapab depans larzan e fer lavil Victoria vin en lavil ki renonmen pou son *street food*? Mersi bokou Mr Speaker.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab se zisteman sa ki nou pe sey fer. Anfen nou bi se ki letan nou fini sa travay nou anvi ki bann Lotorite bann Lazans zot regard biznes e bann laplikasyon ki vin kot zot, dan en lot lizye. Dan plas dir non ou pa kapab fer nou travay avek sa dimoun, poudir li ki mannyer ou kapab arive fer sa biznes.

So en sanzman *mindset* konpletman ki nou pe sey fer en plandaksyon pou ki nou kapab ariv ver sa. Mersi.

**MR SPEAKER**

Mersi. Onorab Mondon.

**HON TERENCE MONDON**

Mersi Mr Speaker. Minis in dir en mo ki mon kontan, *Ease of doing business*, e en travay konpreansiv ki pe ganny fer.

Eski Minis i kapab dir nou ozordi, ki kantite letap en dimoun i bezwen pas atraver avan ki i kapab konmans son biznes?

E ki zot *target* ler zot pe fer sa travay, konbyen letap nou pe mazine ki en dimoun pou bezwen a lavenir? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou kestyon, larepons se en letap. Nou anvi ki en dimoun i kapab al en landrwa e ganny tou son keksoz lanmenm la.

So idealman sa i sa target ki nou anvi travay pou nou arive, me selman parey ou pou okouran i bokou i annan bokou pou nou fer. Me selman i annan serten demars ki'n fini ganny fer.

Konsej Minis in fini aprouve ki Sesel i mentenir en sistenm *licensing* ki nou apel en *hybrid* en *hybrid system* kot i annan serten Lotorite ki par

egzanp si nou pran Lotorite Lasante Piblik, kot i pou ganny sa pouvwar pou li fer en sel donn son laprouvasyon *there and then* e sa dimoun pa pou bezwen pey al kot *licensing* al kot en Lotorite an plis ki sa. Mersi.

**MR SPEAKER**

Mersi Minis. Onorab Aglae.

**HON EGBERT AGLAE**

Mersi Mr Speaker. Minis mon anvi get en *way forward* lo sa size *food van* la, Minis akoz sa i en lenvestisman ki pe kontinyen demann pe kontinyen met devan pou bann dimoun antre dan sa biznes, e menm i annan fanmir ki investir dan sa kalite biznes.

Minis premyerman ou'n nonm en pe an term Polisi regilasyon, e bann akter osi parey i annan Lasante, Lasante Lanvironnman e kot en *Licensing* osi.

Minis eski petet nou pou vwar a lavenir petet en fason ki en *one-stop shop* ki sa bann dimoun ki deside aste enn ouswa enport enn zot kapab vwar en prosedir ki pli senplifye parey ou pe dir?

E dezyenmman Minis i annan sa bann *mobile van* ki sipoze en *van* ki deplase, i annan ki statik i ganny plase

lanmenm. E ki petet an term regilasyon i dir si demann akoz ler zot pe ganny sa permisyon avek *Licensing* zot bezwen montre zot lokasyon en let ki sertifye poudir mon pe *operate* dan tel landrwa, ou bezwen annan en fasilite ki montre osi *toilet* ki vin avek tou, ki ou bezwen ouswa ou lwe enn kot sa landrwa kot ou ete.

Eski petet pou annan en kalite dan en sans, kot nou pou annan bann distenksyon an term zot Polisi li menm - kot si ou pe deplase Lalwa ouswa regilasyon i pou koumsa, si ou pe statik i pou koumsa? Konmsi akoz i annan konfizyon ladan. Eski nou me pou met sa lord en ladan e fer li vin parey en *one-stop shop* osi? Mersi

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou 2 kestyon. Larepons premye kestyon etabli *one-stop shop* se sa lentansyon, ki nou annan en *one-stop shop* pou sa bann keksoz.

Ou dezyenm pwen ki ou'n fer resorti an se ki konsern sa *mobile food van*, me selman ki ou vwar ki i annan en pe ki statik epi - se i egzakteman enn

bann pwen ki nou'n vwar ki nou pou bezwen souleve.

I annan en diferans ant en pou lemoman *License* ki donnen, se pou *mobile food van*. Me ki nou vwar se ki sa *food van* i pa *mobile* ditou li, i reste zis en landrwa alor i plito en *stationary food van*.

E kondisyon ki ale avek en *stationary food van* i devret diferan avek en *mobile food van*. Alor i enn sa bann distenksyon ki nou pou bezwen ganny fer e nou ava fer le neser pou ki nou soulev sa bann pwen avek Lazans konsernen. Mersi.

### **MR SPEAKER**

Mersi Minis pou bann repons. Nou ava *move* lo prosen keston 41, pou eski mon'n mank ou Onorab William? Eskiz mwan Onorab William.

### **HON WAVEN WILLIAM**

Mersi Mr Speaker pou donn mon sa sans. Minis letan mon'n ekout ou pe koze ou'n dir pou i annan de *License* pou bann *food van*. So mon anvi demann ou dan revizyon bann Polisi e par nouvo stratezi, eski i pou difisil *amalgamate* sa de *license* akoz ou pe donn *food van*. Akoz ou'n dir poudir i annan *manufacturing* avek *selling*.

Eski i pou difisil pou *amalgamate* sa de *license* pou en *food van*?

Epi dezyenmman Minis, lafason ki mon vwar ou pe reponn bann keston la, eski ou pe dir nou poudir ou pe al fer bann travay ki ansyen Gouvernman pa'n kapab fer?

Akoz ler mon pe regard sa leksplikasyon ki ou'n donnen pou bann *stationary food van* avek *mobile*, sa i en travay mon krwar ki ti'n devret fasil pou ganny fer.

E finalman, eski dan revizyon zot pe mazin osi desantraliz sa prosesis laplikasyon? Akoz par egzant parey in ganny dir i annan bokou lentere dan distrik Grand Mahé i annan, me pou sa form laplikasyon, eski i annan problem pou kapab met sa o nivo distrik pou dimoun kapab ganny akse avek, ouswa i pou annan konplikasyon? Akoz i annan bann keston ki petet i teknik ki bann dimoun pa pou kapab *sort out* zot menm? Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou 2 keston. Larepons premye se byensir

senplifikasyon. Nou anvi ki prosedir i ganny senplifye as pli posib ki nou kapab. E alor ki nou pa fer keksoz konplike senplifikasyon.

An se ki konsern met a dispozisyon, desantraliz bann laprouvasyon pou ganny *license*. I posib ki i pou bezwen annan serten sa bann dimoun ki dan distrik pou bezwen annan serten *training*.

Me selman ki nou ki Minister pe fer, se ki nou pe viz ver en nimerik en solisyon nimerik;- savedir *digital* savedir tou bann nou anvi ki nou annan en *portal*, ki letan en dimoun i anvi al dan nenport ki biznes, tou sa bann *requirements* ki pou bezwen *fulfil* i la lo sa *portal*.

E si i pou koumsa *then* nenport ki dimoun dan nenport ki distrik Biro Ladministrasyon Distrik se al kot son *DA* ouswa dan konfor son sez dan lakour se li, i pou kapab mont lo sa *seat* i pou kapab ganny akse avek sa lenformasyon e i pou osi kapab *log* son laplikasyon *online*. Mersi.

### **MR SPEAKER**

Mersi. Avek sa nou ava *move* lo Onorab Rocky Uranie pou ou kestyon.

### **HON ROCKY URANIE**

Mersi Mr Speaker. Bonn apre midi Minis avek ou delegasyon e osi en bonn apre midi tou zabitan Zil Pros.

Minis prenon kont ki Lotorite Por in fini enform bann pti antreprenner La Digue ki bann *kiosk* ki zot pe servi pe al ganny demoli, e ki zot bezwen sorti dan sa landrwa apartir le premye Zilyet e ki i pou pran apepre 18 mwan a 2an pour bann nouvo *kiosk* ganny rekonstri an relasyon avek konstriksyon lagrandisman por La Digue;-

a) Eski Minis i kapab enform sa Lasanble, ki led ki ou Minister pe ofer sa bann artizan pour ed zot kontinyen zot pti biznes? Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Onorab pou ou kestyon. Mr Speaker Minister Lenvestisman Lantreprenarya ek Lendistri i annan en vizyon ki viz ver kreasyon larises e kreasyon lanplwa.

Sa vizyon pou ganny akonplir par bann diferan plandaksyon ki pe ganny met an plas pou siport bann biznes dan Sesel e osi lenvestisman.

Nou pe osi met lanfaz lo servis fasilitasyon ki pou ed zot

sirmont bann difikilte ki zot rankontre. E sa i konpri fer provizyon e demars nesese pou entervenir kot i annan en demann pou lespas komersyal.

Depi ki Minister in ganny averti lo sa sityasyon La Digue nou'n esey tou fason posib pou trouv en solisyon pou sa bann vander artizanal.

E nou'n an kominikasyon avek zot atraver Lofis DA e Zofisye Lyezon La Digue. O depar Minister ti pe regard posibilite servi sa plas dan zanmirant bazar La Passe ki pe ganny zere par SFA, me malerezman sa langazman pa'n abouti dan naryen akoz vi ki ti annan serten kontrent lespas ki SFA ti annan lo sa lokasyon.

Nou ti alor regard dan posibilite trouv en lot lokasyon Linyon Estate, fodre note ki pli gro problem ki Minister pe fer fas avek an se moman se ganny en Bidze pour konstrir sa bann *kiosk* e ki sa ti en depans ki pa ti'n ganny prevwar.

Nou rekonnèt e nou apresye zefor ki 2 parmi sa bann vander in kapab fer serten demars pou kontiny zot loperasyon dan en lot lokasyon, antretan pou sa ki napa sa opsyon.

Nou angaze avek Minister Gouvernman Lokal e pe fer demars pou met 2 *kiosk* lo later

Gouvernman dan zanmirant lofis DA o pli vit posib pour ki sa bann vander artizanal i kapab rekomans zot biznes.

Tou sa i form parti Linisyativ Minister pou fourni lespas otan ki posib kot i annan demann pou bann biznes. Mersi.

### **MR SPEAKER**

Siplemanter Onorab. Wi.

### **HON ROCKY URANIE**

Minis ou'n dir ki i annan 2 ki'n fini trouv alokasyon e i annan 2 ki Gouvernman Lokal pe fer prosedir pou met zot devan kot sant. Kiosk ki pou ganny konstrir la devan kot sant, lekel ki pou konstrir sa? Gouvernman Lokal oubyen ou lofis? Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Nou ankor an diskisyon me nou pe fer fason ki si pa Gouvernman Lokal se pour mon Minister, so enn ant le 2. Nou pe finaliz bann diskisyon an se moman. Mersi.

### **MR SPEAKER**

Mersi Minis. Mersi Onorab. Nou a avans lo prosen kestyon. E sa se Onorab Philip Arissol.

### **HON PHILLIP ARISSOL**

Mersi Mr Speaker. Bonn apre midi tou dimoun. Mon kestyon pou Minis i;

Eski Minis Lenvestisman i kapab dir Lasanble si i ankor annan bann pti biznes ki pe rod lasistans finansyel pou siporte e soulaz zot biznes pou refer apre sibir lenpak COVID-19? Mersi.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Mr Speaker depi komansman pandemik dan Sesel Gouvernman ti met an plas serten fasilite sipor finansyel pou bann biznes ki pe fer fas avek difikilte.

Sa i enkli *Small Business Support Fund (SBSF)* zere par Labank Devlopman Sesel e *Private Sector MSME Relief Scheme* ki ganny zere par Labank Santral. Fodre note ki i osi annan bann lezot *Scheme* ki pou siport biznes avek *load* e sa i *SME Scheme* ki ganny zere par bann Labank Komersyal, *DBS* e osi *Credit Union*.

An sa ki konsern *Small Business Support Fund*, sa ti vize pou *assist* bann pti biznes avek en *loan* ziska lavalier R100mil a en to lenter 0poursan. Dapre lenformasyon ki nou'n resevwar avek labank *DBS*, i annan en total 310 aplikasyon lo rikord ziska Zen 2021.

An zeneral statistik i demontre ki wi, i ankor annan demann pou lasistans me nou'n vwar en gran rediksyon pou sorti 272 aplikasyon ant Septanm an Desanm lannen pase, pou ariv selman 38 laplikasyon depi Zanvye ziska Zen sa lannen.

An sa ki konsern *The Private Sector MSME Relief Scheme* ki ganny zere par Labank Santral, sa i ganny ofer pou bann pti biznes e donn zot sipor finansyel a en to lenter 1.5poursan par an.

Dapre statistik ant Out 2020 e Desanm 2020 labank ti resevwar 318 aplikasyon, parkont pou sa lannen presizeman ant Zanvye a Zen labank in resevwar selman 101 laplikasyon.

Sa i egalman demontre ne gran rediksyon dan nonm demann pou lasistans kot sa bann lenstiti finansyer. Parkont lo nou kote kot Minister nou'n vwar ki an 2020 ti ankor annan

en gran demann pou Sid *Capital Grand Scheme* espesyalman dan dernyen lanmwaye lannen 2020.

An total ti annan 324 demann me zis 102 ki ti kapab ganny asiste dapre Bidze ki ti'n ganny aprouve. An 2021 sa *Scheme* pa'n ganny met an mars e sa i pou bann eon ki enkli kontrent finansyer ki pei pe pas atraver kot i pa'n posib pou fer sa bann tel don.

Dezyenmman an vi de mars Gouvernman pou santraliz tou bann don anba en sel parasol, e osi preski nou pe revwar sa *Scheme* pou regarde si i enn ki vreman efektiv. Mersi.

**MR SPEAKER**

Onorab Arissol ou annan lot kestyon ou? Siplemanter?

**HON PHILLIP ARISSOL**

Mr Speaker mon napa siplemanter ki kapab, larepons ki mon'n gannyen i satisfazan. Mersi.

**MR SPEAKER**

Mersi. Be mon a pran en pe siplemanter lezot Manm. Onorab Pillay ti premye pou lev lanmen. Apre Onorab Uranie ek Onorab Esparon.

**HON SEBASTIEN PILLAY**

Mersi Mr Speaker. Mr Speaker prenon kont larepons ki Minis in donn nou, eski zot in sey etabli rezondet aköz sa gran bes dan bann aplikasyon, eski bann rezon, eski i aköz bann biznes in fermen, ou aköz zot in ganny sans ganny *source* finansman dan en lot landrwa?

Ki ou Minister pe fer pou regarde si sa bann biznes pe rankontre serten difikilte, osi kot menm pou zot ganny akse avek en *loan* ki ganny prezante a en to lentere favorab zot pa kapab, aköz zisteman zot pou napa en fason pou zot kapab opere.

So eski ou annan bann *data*? Aköz ou'n donn nou statistik lo pwennvi bann ki'n fer laplikasyon apre ou'n dir ou, i annan en gran rediksyon dan laplikasyon?

*And then* mon dernyen pwen, so prenon kont ki nou pe al apros en program reform *IMF*, eski ou Minister in angaze li osi dan diskisyon an relasyon avek bann diferan kategori antreprenner ki tonm anba zot responsabilite?

Mon dir zot responsabilite ki tonm dan zot *purview* pou vwar si sa program pou annan en lenpak lo akse ek finansman parey sa kestyon pe demande pou sa bann kategori biznes? Mersi Mr Speaker.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. An sa ki konsern bann rezon akoz ki bann pti biznes pa pe fer bokou laplikasyon.

Nou ankor pe fer sa legzersis, me bann rezon ki nou'n kapab konstate dapre legzersis ki nou pe fer an mezir, se ki i annan serten parmi ki depi avan pandemi zot *credit line* pa ti enn ki favorab.

Vedir ki i annan en bon pe ladan ki zot ti'n pran *loan* par egzantp ek *SBFA*, kot zot pa'n fini peye e la ki sa in vin kot *DBS* e zot pa dan en *good financial standing* pou zot ganny en dezyenm *loan*.

I annan osi ki zot mwayen re peye avan *COVID* ti tape, savedir kantite larzan ki annan lo zot kont e lafason ki labank i *assess* tousala i pa ti favorab, alors sa osi in fer sir ki i en rezon ki zot pa'n kapab ganny akse ek sa *loan*.

An sa ki konsern lasistans ki nou Minister nou donnen. Kot *ESA* i ofer lasistans pou kapab ed sa bann biznes pou zot fer zot laplikasyon soumet zot laplikasyon.

E dapre statistik ki nou'n gannyen sa bann biznes kib vin atraver *ESA* omwen 95poursan in kapab *successful* dan zot laplikasyon.

So sa liv ki zot in gannyen pou ranpli zot bann form laplikasyon in marse. Akoz ki i annan biznes ki pa pe vini pou vin devan pou rod lasistans finansyel? Sa nou ankor pe esey eklersi.

E dezyenm ou'n demann mon an sa ki konsern akse finansman anba *IMF Programme* i annan en program ki, i annan en program ki Minister Finans nou'n soulinyen, nou'nsouleve e sa i annan pou fer ek akse finansman pou bann pti e mwayen biznes. Alor nou pe pran konsiderasyon sa. Mersi.

**MR SPEAKER**

Mersi Minis. Onorab Uranie.

**HON ROCKY URANIE**

Mersi Mr Speaker. Minis ou'n reponn enn mon kestyon ki Onorab *LOTO* in demann nou, Minis mwan mon kestyon i, eski ou annan en lenformasyon parmi vi ki in annan sa fran bes dan dimoun ki pe rod led finansyel?

Eski parmi sa bann dimoun i ti pe rod led zot in tarde ganny led, oubyen pa pe

gannyen zot in bezwen war zot, ou annan en lenformasyon ki zot in bezwen war zot pe al rod en nouvo kalite biznes, oubyen zot in bezwen war zot vin avek en nouvo model biznes? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Annefe lo komansman letan sa *Scheme Small Business Support Fund* ti ganny lanse, ti annan en serten retar lo lapar *DBS* ansanm avek Minister Finans, kot ti annan en retar ki bann biznes ti pe gannyen.

Alor wi zot ti pe fer fas avek retar e i posib ki i annan en kantite ki'n *withdraw* ouswa ki pa'n vin devan, akoz zot in aprann sa bann retar e zot in fer lezot demars. E sa nou'n vwar en kantite. Dan sa pandemi nou'n vwar ki i annan en kantite biznes in bezwen re adapte pou zot kapab sirviv.

E i annan ki mon fyer pou dir ki mon vwar poudir lo zot, zot lo en bon semen pou zot vin vreman *successful*. E i annan bokou lespri biznes ki'n ganny formen sirtou bann biznes inovativ an servan bann solisyon nimerik an servan teknolozi.

E sa i vreman ankourazan letan ou pe regard *business community* annantye. Mersi.

**MR SPEAKER**

Mersi. Onorab Esparon.

**HON REGINA ESPARON**

Mersi Mr Speaker. Mr Speaker Minis in dir ek nou ki dan sa *Small Business Support Fund DBS* la, zot ti annan zot 310 laplikasyon. Petet i ti a kapab dir nou konbyen laplikasyon pou sa *soft loan* ki'n ganny aprouve ziske prezan dan sa letan difisil?

E par lefe ki ou Gouvernman in erit en kof ki byen vid e ki son poursantaz repeyman, lentere? Mersi Mr Speaker.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. To lentere lo la i 0 poursan, dan la kantite laplikasyon i annan 137 ki'n fini ganny aprouve e finance e i annan ki ankor an prosedir, pe fer prosedir pou fer *disbursement* e pou ganny aprouve.

E i annan ki osi ki pa'n kalifye. I annan 64 ki pa'n kalifye, e i osi ki bann biznes in

zis *withdraw* zot laplikasyon.  
Mersi.

**MR SPEAKER**

Mersi. Onorab Vidot.

**HON AUDREY VIDOT**

Mersi Mr Speaker. Minis *IMF* in fer resorti ki Sesel ti pe fer byen avan *COVID*. E la ozordi ou'n menm konfirman poudir i annan en serten bes dan lakantite led ki pe ganny demande pou elev bann biznes.

Me avan zot fer desizyon final lo revwar sa bann lasistans finansyel, eski zot pe konsider *at least* omwen sey *clear out backlog* bann dimoun ki ou'n mansyonnen, ki ou dir ti'n deza tap laport e ki ankor annan sa lentere ki zot *clear out*?

E *by the time* petet zot revwar kekfwa i annan serten dimoun osi i ava'n ganny sans war serten sipor e kapab epanouir dan zot biznes dan sa bann moman difisil. Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou komanter. *We take note*, nou ava pran li an konsiderasyon letan nou pe fer nou bann diskisyon avek nou

bann partener konsernen.  
Mersi.

**MR SPEAKER**

Mersi Minis. Onorab Woodcock.

**HON WAVEL WOODCOCK**

Mersi Mr Speaker. Minis mon kestyon i kote konsern *seed capital*. *Seed Capital* i sipoze ganny servi, *well* i en *Grant* pou ed bann pti biznes. Me i annan konsern dan lepase ki sa bann *seed capital* ki'n ganny donneren i pa neserman bann dimoun ki'n ganny sa larzan, i servi sa larzan pour investir dan zot biznes.

Eski i annan en legzersis ki'n ganny fer, pou etabli si vreman sa bann larzan, sa bann *Grant* ki ganny donneren i ganny servi byen?

E si ou Minister pe konsider redemann sa bann dimoun pou pran sa bann larzan si zot in mal servi sa bann larzan, ouswa sa bann larzan i ganny servi pou bann lezot aktivite, bann lezot keksoz ki'n bar plas pou bann dimoun ki ti merite ganny sa lasistans?

E an vi ki nou pe pas dan en kriz ekonomi e ki reveni pa pe antre dan pei parey, in annan plizyer lenstans kot sa bann *loan* ki pe ganny donneren pou asiste sa bann biznes, bokou bann biznes pou plizyer

lannen pa'n rann sa bann *loan*, ouswa bann *loans* in ganny *write-off*. Nou'n war sa bann lenstans a plizyer repriz dan lepase anba Gouvernman presedan.

E plizyer legzersis ki ou Minister pe fer pou *recruit* en pe sa bann larzan ki kapab vremen ed bann biznes, ki ozordi dan sa letan difisil i kapab ganny ede ek sa bann larzan. Mersi bokou.

### **MR SPEAKER**

Mersi Onorab. Minis.

### **MINISTER DEVIKA VIDOT**

Mersi Mr Speaker. Mersi Onorab pou ou bann pwen ki ou fer resorti e pou ou bann kestyon. An sa ki konsern *seed capital*, i nou pe fer rapor lo litalizasyon larzan ki ti ganny *allocated* anba *seed capital*.

Annefe lagreman ki bann aplikan ti sinyen avek Gouvernman, sete si zot pa servi sa larzan dapre selon mwayen ki zot ti'n dir zot sipoze pe servi, i annan en mekanizm pou fer sa bann dimoun rann sa larzan.

So i mete dan lagreman, e sa i parmi en rapor ki nou pe fer, en legzersis ki nou pe fer pou revwar zisteman ki mannyer larzan ti pe ganny servi e ki kantite biznes ki'n

kapab epanouir atraver sa *Scheme*.

E an sa ki konsern bann gran biznes e ouswa bann biznes ki zot, zot in pa'n re-pey zot *loan* me selman *loan* in ganny *right off*.

Sa posibleman mon krwar la ou pe fer referans avek *SBFA* pli partikilye, nou pou bezwen regarde, sa mon krwar i pou en legzersis ki Minister Finans pou bezwen antreprann. Parske i pou bezwen regard sa lagreman ki sa dimoun in annan avek *SBFA* e ki mannyer pou *recover* sa larzan.

An se moman la i pa en legzersis ki mon Minister pe angaze ladan. Mersi.

### **MR SPEAKER**

Mersi Minis. Onorab Cosgrow.

### **HON WALLACE COSGROW**

Mersi Mr Speaker pou donn mwan sa loportinite pou demann en pti kestyon. Minis ou'n koz lo travay ki zot pe fer, en bann statistik ki zot in anmase.

Mon kestyon i senp, eski si pli tar Lasanble nasyonal i kapab anvoy en *request* kot ou, pou donn nou en pe bann lenformasyon bann statistik ki annan, bann lenformasyon bann travay ki zot in fer.

Pou nou kapab petet nou osi ed bann dimoun ki'n rod lenformasyon kot nou sirtou lo bann *Scheme* lo bann keksoz ki zot pe travay lo la, pou nou kapab enform sa bann dimoun eksplik zot ki demars ki Minister pe fer? Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Onorab larepons i wi, nou kapab definitivman donn ou sa bann lenformasyon. Mersi.

**MR SPEAKER**

*Good, thank you.* Onorab Labrosse.

**HON RICHARD LABROSSE**

Mersi Mr Speaker. Bonn apre midi Minis. Bonn apre midi tou bann koleg Onorab. Minis kestyon ki pe ganny demande par Onorab Arissol Anse Boileau, pe demande ki Gouvernman pe fer pou asiste bann pti biznes?

Be mwan mon kestyon i pou al lo en lot laliny, mon ti a kontan konnen ki. Nou konnen ki dan sa letan epidemik bokou pti biznes pe fer fas avek bokou difikilte, sa enn mon dakor. Me selman mon krwar in ariv en moman osi pou nou kapab aret

servi sa mo pti biznes konmsi pou nou fer nou bann biznes *flourish* konmsi pou zot ariv lo ne nivo.

So la mwan mon kestyon pour ki Gouvernman pe fer dan sa moman epidemik pou *facilitate ease of doing business* dan Sesel? E dan en menm laliny osi pou donn en pti pe plis ledikasyon finansyel bann pti biznes pou zot kapab fer fas ek bann difikilte ki arive a lavenir dan lemonn. Mersi.

**MR SPEAKER**

Mersi Onorab. Minis.

**MINISTER DEVIKA VIDOT**

Mersi Mr Speaker. Mersi Onorab pou ou bann kestyon. Parey nou'n fer resorti lo komansman i annan en legzersis konpreansiv ki nou pe fer ki pou avek bi pou elimin sa kantite letap ki en biznes i bezwen pas atraver avan ki i kapab ganny en *license*.

E sa i en legzersis ki nou pran vreman serye. Parske nou lentansyon se pour fer, pou kre en lanvironnman ki *conducive* pou biznes i vedir ki ed biznes epanouir e non pa enn ki anpes biznes lanse e grandi.

Dezyenmman, an sa ki konsern ledikasyon finansyer, nou'n vwar atraver nou bann travay ki nou pe fer ki sa i enn

bann pli gro konstrent ki la kominote biznes i annan. E sa se ledikasyon finansyer i annan bokou dimoun ki annan sa bon nide ki lide biznes i bon, zot antre, zot lans dan biznes.

Me selman apre pou *manage* sa larzan i pa vin en keksoz fasil pou zot e alor zot vwar zot dan bann sityasyon difisil ki swiv. E alor Minister i angaze pou li travay lo en program ledikasyon finansyer pou kapab met a dispozisyon la kominote biznes. Mersi.

### **MR SPEAKER**

Mersi. Onorab Romain.

### **HON GEORGE ROMAIN**

Mersi Mr Speaker. Bonn apre midi Minis ek ou delegasyon. Minis an vi ki nou konnen ki i annan bokou demann pou later, e nou konnen i pa, napa later ase pou la demann;

Eski ou Minister i pe mazine pou devlop en pe bann later dan distrik kot bann pti biznes dan distrik menm zot kapab benefisye par egzant biznes garaz, sarpantye?

Akoz sa i annan bokou demann, mon pe regarde alors si ou pe mazine pou devlop detrwa kare later dan distrik pou sa bann pti kalite biznes? Mersi Mr Speaker.

### **MR SPEAKER**

Mersi Onorab. Minis nou pe depas en pe kestyon la, kontinyen. Ale si ou annan en repons.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Annefe mon ti a vremen kontan si ti annan detrwa kare later pou nou devlope. Malerezman later parey ou konnen i en keksoz ki pa a laporte tou dimoun.

Malgre sa i annan serten distrik kot in deza annan, in deza ganny idantifye bann morso later ki in ganny dezinyen spesifikman pou fer bann devlopman biznes.

E sa parey mon'n fer sorti oparavan i sa bann morso later ki nou pou angaze dan *PPP* avek savedir bann partenarya avek bann dimoun prive pou devlop sa bann later pou fer, pou konstrir zisteman bann lespas ki i ava ganny met a dispozisyon bann pti biznes pou zot zis lwe sa bann lespas. Mersi.

### **MR SPEAKER**

Mersi. Onorab Loizeau.

### **HON NORBERT LOIZEAU**

Mersi Mr Speaker. Bonzour Minis ek ou delegasyon. Mr Speaker nou ariv en moman dan Sesel kot tou Seselwa i anvi

vin biznesmenn. E ozordi Seselwa pe konplent i annan tro bokou etranze ki pe travay dan bann lendistri, dan bann konstriksyon en pe partou.

Ozordi i en senp pti dimoun i fini *SIT* zot travay kot en konpanyen, lanmen i deside al kot *tax* rod en liv anpli, deswit i vin *sole trader*, deswit i vin en biznesmenn, i annan i *fail*, i tay kot Gouvernman pou lasistans.

Mon anvi demann Minis ki zot pe fer pou dil ek sa sityasyon kot petet en dimoun ki anvi al dan tel biznes i bezwen annan tan letan leksperyans?

Ou pa kapab al koud kot Onorab Uranie 2 mwan, ou'n kapab fer en pti fofile ou ale ou rod en liv *tax*, al kot *SBFA* sepa kot sa bann *Scheme*, ganny larzan aste en masin komans koud, ou *fail*, ou troun kot Gouvernman ou vin rod lasistans.

Ki zot pe fer konmsi dan sa domenn pou ankouraz dimoun, annan en Polisi kot pou ou antre dan sa biznes ou bezwen annan tan letan leksperyans. Pou ki nou ava annan otan zouvriye kalifye li fer bann louvraz. E nou ava elimin bann travayer etranze ki nou pe konplent lo la. Mersi.

### **MR SPEAKER**

Mersi Onorab. Minis ou a kapab adrese?

### **MINISTER DEVIKA VIDOT**

Mersi Mr Speaker. Mersi Onorab pou ou kestyon e ou konsern.

Bon, lo sa kote ki la mon Minister i rekonnèt poudir i annan en gran mankman e mon krwar Sesel annantye i rekonnèt poudir ki i annan en mankman dan sa ki konsern mendev. Espesyalman bann sektè kot nou war ne kantite etranze pe pran louvraz e sa i dan domenn konstriksyon.

Mon'n angaze avek Minister Ledikasyon e Minister Lazenès ek *Sports* pou zisteman regarde mannyer nou kapab enkorpor bann eleman, serten eleman dan bann *curriculum*.

Setadir ki mannyer nou enkorpor *customer service*, *service delivery* e fer sa vin en konponan dan laprantisaz avek letan sa bann zanfan pe fer zot bann kour.

Sa i akòz mazorite letan petet i pa en defi ki sa zenn lo li menm li se ou konnen i pa pe kapab *succeed* dan sa biznes se gras a serten mankman, ou konnen formasyon ki manke.

So in seye, nou bezwen donn li sa kredi konmkwa in

seye me nou pa kapab osi *discount* li akoz i en zenn ki pa pou kapab fer. I posibilite i kapab, son *output* i kapab plis ki en dimoun ki'n bokou plis letan dan sa biznes ki li.

E alor nou pa kapab *discount* sa. Zenn i annan bokou lenerzi, zenn i kapab travay, *output* i kapab double, triple. Me sa formasyon ki enportan, sa konesans, realizasyon par sa zenn pou li konpran responsabilite pour ki ler i pran en louvraz i bezwen delivre lo sa louvraz.

I annan sa konesans ki i bezwen konnen ki letan i ganny li sa larzan dan son lanmen i ganny peye, i pa vedir sa i tou son profi, i bezwen kit en pe de kote pou depans biznes. I annan zis en pti konponan ladan ki son profi ki i kapab depanse.

So sa i bann keksoz ki nou bezwen ed sa bann zenn ganny en konpran dan zot formasyon, pour ki letan si zot annan sa dezir zot annan sa lanvi pou zot antre dan biznes deswit zot kapab fer li.

E osi dan sa formasyon nou bezwen montre zot poudir biznes i vin avek risk. Zot pa kapab krwar poudir biznes i zis larzan. Nou pe ganny zis sa larzan, me i von avek son risk.

E alor mon panse dan sa formasyon si nou kapab ankadre tou sa bann konponan byen, avek sa bann zenn, zot ava kapab letan zot si zot deside poudir *ok* mon kapab, mon anvi antre dan biznes zot fer li avek en lespri ouver e zot konnen kwa ki zot pe al ekspekte. Mersi.

### **MR SPEAKER**

Mersi Minis. I reste mwan en kestyon orizinal lo lalis, alor mon krwar i a preferab nou prolonz sa sesyon e nou pran sa, koumsa i a permet nou petet termin boner.

Sa kestyon i lo *leisure park* Anse Royale. Me menm ki i lo en distrik, mon krwar *leisure park* i en size ki enteres dimoun an zeneral. So nou a tret li koman en size zeneral. Alor mon apel Onorab Sylvanne Lemiel pou son kestyon.

### **HON SYLVANNE LEMIEL**

Mersi Mr Speaker. Bonn apre midi Minis avek ou delegasyon. Bonn apre midi tou dimoun ki a lekout. Minis distrik Anse Royale ti pou benefisye avek en proze li osi e lezot fasilite dan *leisure park* pou bann pti antreprenner lokal. Proze ti pou ganny finanse par en don ki Lanbasad Sinwan ti'n fini agree.

Pandan deliberasyon dan diskisyon pou Bidze 2021 Minis ti konfirman ki pou annan en sonm R2.3milyon pou sa proze ki ti pou komanse nenport ki moman an 2021.

Mon'n ganny enformen ki sa proze ki ti pou benefisye bann dimoun dan distrik Anse Royale pa pou ganny fer, me san okenn leksplikasyon aköz.

Eski Minis i kapab eksplik sa Lasanble e osi zabitan Anse Royale ki rezon son Minister e osi *Cabinet* in deside pou pa kontinyen avek sa proze? Mersi.

### **MR SPEAKER**

Mersi. I sanble mwan nou annan en pe problemm avek mikro parla, petet *ok*. Byen Minis ou adres sa kestyon silvouple?

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Sa don ti inisyalman pou proze Beau Vallon mye koni koman sit Bazar Labrin.

Dapre lenformasyon sa sit ki ti en propriyete prive ti ganny aste par Gouvernman atraver *Societe Seychelloise D'Investissement (SSI)* an 2019.

Pandan sa bann letan sete *ESA* lamenzman sa sit, e sa don ti pou ganny servi pou konstrir bann *kiosk* permanan

ki ti pou benefisye bann artizan e vander manze, *snack* e osi labwason.

Me la fason ki sa levennman ti pe deroule dan sa bann letab pa ti neserman dan en fason ordonnen ou menm izyenik pou bann laranzman vann manze. E sa ti rankontre bokou problemm avek amenzman sa sit, e i ti menm ganny difikilte pou pran aksyon legal kot i ti neser aköz i pa ti propriyeter sa later.

Alors amenzman sa sit ti ganny mete anba *SSI* e an rezilta sa, sa plan bann *kiosk* ti ganny abandonnen e en plan pou devlop sa sit Anse Royale ti ganny konsevwar.

Letan ki mon ti pran pozisyon moman Minis mon ti fer li mon devwar pou reget tou bann plan devlopman ki ti tonm anba responsabilite mon Minister. E plan ti osi ganny prezante avek Konsey Minis pour ki tou dimoun konsernen i a ganny konsilte lo bann proze.

Swivan deba lo diferan prose prezante devan sa Konsey e an prenon kont nou sityasyon ekonomik sa in fer ki serten proze in ganny revize e prioritize baze lo vizyon Gouvernman, lefikasite, demann ek bann lezot konsern ki Manm piblik e Gouvernman osi ti annan.

E se dan sa lespri ki desizyon pou revwar *kiosk* Anse Royale ti ganny pran. An vi ki *SSI* in ganny dizourd an Zen sa lannen, Gouvernman ti vwar li dan en pozisyon pou bezwen asiste distrik Beau Vallon pou fasilite bann vander pou rebran zot travay.

An plis, apre konsiltasyon avek Lanbasader pou Repiblik Sinwan isi Sesel, Gouvernman pe rekonsider pou sa don retourn anver proze devlopman Beau Vallon, ki an se moman pe ganny konsevwar par Minister responsab pou Later ek Lakaz.

Sa ti ava ede rezourd sa bann problem ki bann pti biznes pe rankontre pou ganny laprouvasyon pou kontiny zot loperasyon, an vi bann konsern ki serten Lotorite in averti. Mon oule asir ou Onorab ki Gouvernman pou revwar devlopman pou Anse Royale a en moman apropiye.

Entansyon pou sa sit i ankor an diskisyon, e nou pe viz plis ver kre en sit rekreyasyonnel e famiyal pou bann zanfan. Mersi.

### **MR SPEAKER**

Siplemanter Onorab. Wi.

### **HON SYLVANNE LEMIEL**

Mersi Mr Speaker. Enn mon kekyon i se ki mon ti pou

demann Minis ki plan son Gouvernman la?

*Sorry...* i dir son pa pe marse, ou tann mon?

### **MR SPEAKER**

Son, wi mon war i annan en problem, nou a zis les sa, nou a termin la apre nou a les madanm Clerk sey regarde kisisa. Sa ki mon pli trakase se ki si sa pe afekte nou *broadcast* e nou a kapab fer en resers avek *IT* apre. Sey kontinyen.

### **HON SYLVANNE LEMIEL**

Mersi Mr Speaker. I bon? *Ok.* Bon Minis mwan sa ki mon ti konsernen la i se ki i deza annan en plan, sa plan in fini, mon pa konnen si in fini ganny aprouve. Me selman en zoli plan ki la avek zot lo latob.

E mwan mon ti pou kontan konnen par egzamp ou'n dir Gouvernman i annan en plan en lot desizyon zot oule pran lo kote sa landrwa.

Me antan ki mon oule konnen ou Minister ansanm avek *ESA* antan ki nou, nou'n deza annan en Komite ki ti'n deside, ki ti'n pran serten desizyon osi lo ki pou pase dan nou distrik Anse Royale.

Akoz mon krwar zabitan Anse Royal e osi ler nou tann sa Komite nou annan en *say ok?*

So eski pou annan sa bann dyalog ant ou Minister avek nou pou nou pran en desizyon ansanm ki nou Anse Royale nou ti a kontan?

E si nou, nou oule kontinyen petet avek sanmenm sa proze, petet a lavenir, kot lezot demars i ganny fer kot nou get kote ki nou kapab ganny en don ankor ek en lot landrwa.

Akoz nou met nou poze devan e nou get si nou annan en landrwa en Lanbasad *or anybody* ki anvi *sponsor* nou proze. Parey letan mon ti fek antre nou ti al rode nou ti ganny *sponsor* pou nou *playground*. E eski Minister pou konsider sa osi? Mersi.

### **MINISTER DEVIKA VIDOT**

Mersi Mr Speaker. Mersi Onorab pou ou keston. Byensir parey mon'n avoue lo konmansman Minister i vremen enterese pou antre dan la partenarya eskize, avek ant L'Egzekitiv ek Lezislatif.

Alor byensir nou pou *welcome* sa loportinite pou nou fer sa bann diskisyon pou nobou kapab regarde kwa egzaktaman.

Selman parey mon'n fer resorti, ti annan sa lespri, nou bezwen regard osi devlopman lot kote semen osi ki Minister Later pe fer.

An se moman i pa kler i pe deroule, me ler nou pou balans tou sa bann keksoz aprezan nou pou kapab ganny en platform pli byen pou nou kapab kominike e diskite avek distrik. Mersi.

### **HON SYLVANNE LEMIEL**

Mersi Mr Speaker. Minis pou le moman sa landrwa mannyer i ete antan ki travay to pou pe al komanse.

Sa ki nou, nou ti'n fini ganny dir, prezan sa landrwa napa personn ki pou pe *manage*. Sa landrwa i zis reste la e mwan mon pe, mon ti a kontan konnen avek ou lo kote *manage* sa landrwa li menm kit li prop, fer sir ki tou sa bann keksoz ki la nou tire nou.

Akoz i en landrwa ki obor semen e i vilenn pou touris pou pe pase aköz nou, nou ti'n krwar *PUC* i ava vini, i a tir son bann tol, son bann debri nou *clear* sa landrwa nou fer li prop. Aköz nou konstriksyon ti pe al ganny fer.

So ki demars la pou nou fer sir ki sa landrwa oi reste pop? *PUC* mon konnen pe vini pe vin tir tou son bann zafer lam, pou li pa vin en *eyesore* prezan? Lekel ki pou responsab?

Akoz mon konpran poudir *ESA* ki ti pou pe *manage* sa

landrwa ansanm avek ladministrasyon distrik. So ki arive prezan Minister? Mersi.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Annefe la fason ki mon konpran sa morso later i pa ti'n ankor ganny donnen avek *ESA*, alor i ankor zis en gran morso ki pa ankor ganny divize.

So ler ou pe regarde i ankor *still* anba amenazman Minister Later, so zot ki annan sa responsabilite. Me selman parkont nou osi koman Minister nou konnen poudir sa ti en morso ki ti pe al ganny dezinyen pou nou, e nou ankor annan en responsabilite anver sa later.

E alor nou pou fer li nou drwa e nou devwar, pou fer sir poudir nou pe regarde ki mannyer nou pou fer sir poudir sa landrwa i pa vin en *eyesore* parey nou'n fer resorti. Definitivman, mersi.

**MR SPEAKER**

Mersi. Onorab Lemiel mon krwar i annan en problem serye ek ou *micro*. *Ok* dernyen pwen vitman seye.

**HON SYLVANNE LEMIEL**

Mersi Mr Speaker. Mr Speaker mersi pou donn mwan sa sans

ankor. Mon konnen mon pe sey demande akoz i mon distrik kot mon ete, mon bezwen sey *fight* en pti pe pou mon bann dimoun. So, pour sa mon dir ou mersi Mr Speaker.

E Minis mwan mon ti a kontan konnen, par egzanp letan landrwa, akoz sitan lontan bann dimoun pe espere en? Akoz menm bann dimoun ti'n deza demann mwan madanm Lemiel si kekfwa i kapab ganny netwaye, en pti *kiosk* nou vini, nou mete en pti pe dan zar 'leve debrouye.'

Eski ki prezan i arive ek sa bann dimoun ki ti'n deza pe mazine poudir zot pe vin dan sa landrwa?

Eski letan landrwa in prop in netwaye, eski zot kapab vini ek en *stall* ek en keksoz ki byen organize zot met la zot komans fer serten pti aktivite pou le moman, apre anmase al avek aswar bomaten ou vini, ou fer sa ki annan pou fer, eski sa pou ganny permet?

E ki prosedir petet ou pou pe mazine poudir bann dimoun ou bezwen fer si zot pou oule servi sa landrwa? Mersi.

**MR SPEAKER**

Mersi Onorab. Minis wi.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Sa i pou en konversasyon ki nou pou bezwen antreprann avek konsiltasyon premyerman lo Gouvernman, lo nivo Gouvernman.

Epi la nou pou kapab anmenn ou bann *constituents* dan sa konversasyon atraver ou Onorab, si ou pou kapab aranz sa pou nou.

Me selman ki mon kapab dir ou la selman se ki nou ava donn ou sa langazman pou kit ou dan sa kominikasyon pou fer sir ki ou lo menm paz, ou konnen ki bann devlopman ki pe ganny arive. Mersi.

### **MR SPEAKER**

Mon krwar definitivman nou annan en probleman ek sa mikro. Kekfwa madam Clerk i a kapab diriz son teknisyen pou regarde apre.

Selman i annan en pe probleman avek mikro an zeneral. E petet nou pou war plis difikilte an mezir nou ale. Mon annan Onorab Mondon mon krwar. Onorab.

### **HON TERENCE MONDON**

Mersi Mr Speaker. Mr Speaker Minis in mansyonn, an menm tan i ti pe koz Anse Royale sa lespas lwazir in koz lo sa lespas

lot kote semen ki Gouvernman i annan plan petet pou revwar.

I pa tro kler kwa mannyer pe ganny servi e mon dakor avek akoz ler nou pe koz later limite e nou, nou get groser batiman ki pe ganny fer, par egzanz *PUC*. Nou pa pe maksimiz lespas dan sa landrwa.

Mon pa pe koz bor lanmer mon pe koz lot kote semen ki ou'n mansyonnen Minis. Eski dan sa bann diskisyon ki zot pe fer zot vremen pe mazine ki mannyer zot kapab pe maksimiz sa bann lespas Anse Royale, pour ki nou kapab annan plis loportinite, fasilite pou biznes e bann lezot aktivite? Mersi.

### **MR SPEAKER**

Mersi. Minis a reponn sa ki i kapab, annou pa bliye i pa Minis Later. Minis mon pa konnen si ou kapab eklersi en pe.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab sa ki mon kapab dir se ki sa ki nou anmenn lo latat letan nou form parti diskisyon, se ki nou anmenn sa lespri biznes a sak fwa.

So letan Minister Later pe konsevwar en plan, nou, nou

anmenn sa lespri, sa *business thinking* lo la. So vedir petet mon kapab donn ou reasirans lo sa nivo ki nou ava fer sir ki nou ava fer nou pwen konte dan sa laliny. Mersi.

**MR SPEAKER**

Mersi Minis. Onorab Gill.

**HON CHURCHILL GILL**

Mersi Mr Speaker. Mr Speaker mon pe demann ou permisyon, vi ki diskisyon i lo kiosk e dan sa diskisyon Baie Ste Anne Praslin ti enkli.

Mon pou demann ou permisyon vi ki Minis i la si i posib pou mwan demann li ki si menm sityasyon ki pe arive avek Mahe, Baie Ste Anne osi kiosk pa pou ganny fer, omwen Baie Ste Anne i pou ganny fer akoz plan ti'n fini fer tou keksoz.

So si ou donn mwan permisyon zis pou mon demann Minis sa. Mersi.

**MR SPEAKER**

Anfen vi ki nou ankor *ok* avek letan nou a, Minis a kapab pran ou kestyon.

**HON CHURCHILL GILL**

Wi, Minis mon ti pe zis gete si nou Baie Ste Anne li son plan kiosk pou kontinyen, vi ki Bidze ti la, plan ti'n fini fer, e si non ki

konmsi ou pe mazine fitir, kan ki sa pou adrese si an ka non? Mersi.

**MR SPEAKER**

Mersi. Minis si ou kapab reponn, menm ki ou pa'n prepare pou sa.

**MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab lo sa ki konsern sa plan pou Cote D'Or pli prezizeman en, Cote D'Or wi me i osi i sitye Bai Sainte Anne menm li. *Ok* dan distrik Baie Ste Anne.

Si ou pou Cote D'Or i ti vremen en pti onm, pa tro, wi 500mil e alor pou le moman plan se pou mentenir sa. Me selman letan nou pou pe re balans sa Bidze avek Beau Vallon nou pou bezwen revwar si sa pou posib menm. Depandan lo Bidze ki nou annan *available*. Mersi.

**MR SPEAKER**

Byen, mersi Minis. Nou ava, Onorab Cosgrow ou ti'n lev lanmen? Wi *ok*, nou a retourn lo kestyon orizinal? Ale.

**HON WALLACE COSGROW**

Mersi Mr Speaker mersi, mersi pou *allow* mon kestyon. Minis lo kestyon orizinal mon vremen dezapwente pou aprann ki

Gouvernman pa pe *go on* avek sa proze Anse Royale, annefe Anse Royale dan sid.

Sa landrwa i prezant en *real* posibilite pou bann pti biznes dan sid kapab fer zot bann aktivite, bann pti biznes lwazir parey menm bann ki vann dan *kiosk*.

E i ti ava en loportinite pou nou tir en pe sa kalite aktivite dan nor e anmenn li dan sid pour ki dimoun dan sid osi i a kapab *enjoy* sa kalite aktivite. Pa bezwen sorti dan sid pou vin Beau Vallon tou lazournen.

So Minis mon pe gete eski ou Minister, mon pa konnen lekel ki'n kennsel si ou Minister ki'n kennsel ouswa in ganny kennsel o nivo Gouvernman an zeneral.

Eski ou kapab donn nou lasirans ki ou pou sey tou ou mye pou kapab rod en alternativ finansman pour ki bann dimoun dan sid osi i a kapab *enjoy* sa kalite aktivite, sa kalite *leisure* zot osi Minis? Mersi bokou.

### **MR SPEAKER**

Mersi Onorab. Wi Minis.

### **MINISTER DEVIKA VIDOT**

Mersi Mr Speaker. Mersi Onorab pou ou kestyon. Onorab lo sa ki konsern sa plan

pou kre bann aktivite ekonomik, sa morso later *opposite* Anse Royale menm i pou enn ki mon pe mazine i pou viz li pou santraliz ver en keksoz dan sa menm laliny. Mersi.

### **MR SPEAKER**

Tre byen. Mersi Minis. Bon mon napa ankor lot Manm. So nou a kapab termin sa sesyon la. Mon a remersye Minis ek son delegasyon pou zot partisipasyon e remersye bann Manm pou zot kestyon.

Nou ava *adjourn* pou ozordi e nou a rebran travay demen bomaten 9er. Mersi nou *adjourn*.

### **(ADJOURNMENT)**